

MATEO ITSIRINKAKOTAKERI JESOKIRISHITO TYARA IKANTA YOGAVISAAKOTANTIRA

Yashikiiganakeririra Jesokirishito
(Ir. 3.23-38)

1 ¹Maika nontsirinkakogetakero ivairopage pairaninirira yashikiiganakeririra Jesokirishito. Irirori inti iyashikiiganakerira Averan intiri Iravi.

²Antari okyara yogari Averan itomintakari Isaako.^a

Irokya Isaako itomintakari Jakovo.^b
Irokya Jakovo itomintakari Jora intiegiri irirentiegi.^c

³Irokya Jora itomintakari Parese intiri Sari. Ogari iriniro opaitaka Tamare.

Impogini Parese itomintakari Eserome.

Irokya Eserome itomintakari Arame.

⁴Irokya Arame itomintakari Aminaravo.

Irokya Aminaravo itomintakari Naason.

Irokya Naason itomintakari Sarimon.

⁵Irokya Sarimon itomintakari Voose. Ogari iriniro opaitaka Iraava.

Impogini Voose itomintakari Oveti. Ogari iriniro opaitaka Irote.

Impogini Oveti itomintakari Isai.

⁶Irokya Isai itomintakari Iravi pegankicharira igoveenkariegite iseraereegi.

Irokya koveenkari Iravi itomintakari Saromon. Ogari iriniro Saromon onti yagavetarira Oriashi.

⁷Impogini Saromon itomintakari Irovoame.

Irokya Irovoame itomintakari Aviashi.

Irokya Aviashi itomintakari Asa.

⁸Irokya Asa itomintakari Josapate.

Irokya Josapate itomintakari Jorame.

Irokya Jorame itomintakari Osuashi.

⁹Irokya Osuashi itomintakari Joatame.

Irokya Joatame itomintakari Akase.

Irokya Akase itomintakari Esekiashi.

¹⁰Irokya Esekiashi itomintakari Manaseshi.

Irokya Manaseshi itomintakari Amon.

Irokya Amon itomintakari Joseashi.

¹¹Irokya Joseashi itomintaigakari

Jekoniashi intiegiri irirentiegi

impo yamaiganunkani maganiro

iseraereegi Vavironiaku.^d

¹²Impogini yogari Jekoniashi itomintakari Saratieri.

Irokya Saratieri itomintakari Sorovaveri.

¹³Irokya Sorovaveri itomintakari Aviote.

a 1.2 Jen. 21.1-3. b 1.2 Jen. 25.21-26. c 1.2 Jen. 35.22-26. d 1.11 2 Kov. 24.14-15.

Irirokya Aviote itomintakari Eriakime.
Irirokya Eriakime itomintakari Asoro.

¹⁴ Irirokya Asoro itomintakari Saroko.
Irirokya Saroko itomintakari Akimo.
Irirokya Akimo itomintakari Eriote.

¹⁵ Irirokya Eriote itomintakari Ereasaro.
Irirokya Ereasaro itomintakari Matan.
Irirokya Matan itomintakari Jakovo.

¹⁶ Irirokya Jakovo itomintakari Jose.
Ogari itsinanetsite Jose opaitaka
Maria. Irorori onti iriniro Jeso
ikantaganirira aikiro Kirishito.^e

¹⁷ Maganiro tsirinkakoigankicharira
ivairopage aka ikaravageigake 14
itsititapanutara itimakera Averan
ikaravagetake itimakera Iravi. Ario
ikañoigaka aikiro maganiro tsirinkakoi-
gankicharira ivairopage itsititapanutara
itimakera Iravi ikaravagetake yamaiga-
nunkanira Vavironiaku ikaravageigake
14. Impo ario ikañoigaka aikiro
maganiro tsirinkakoigankicharira
ivairopage itsititapanutara yamaiganun-
kanira Vavironiaku ikaravagetake
itimakera Kirishito ikaravageigake 14.

Imechotakera Jesokirishito

(Ir. 2.1-7)

¹⁸ Maika nonkenkitsatakotakeri
Jesokirishito tyara ikantaka ikyasano-
kyara ipokutira aka kipatsiku imechota-
kera. Pairani otimake tsinane opaitaka
Maria. Inti kashigakaro surari ipaita Jose.
Impo tekyara iragero itimake otyomiani,
intitari timakagakeri Isure Tasorintsi.
¹⁹ Yogari Jose ikogavetaka irapakuaaero-
mera gara yagiro, intitari negintevageta-
charira, kantankicha itsarogakagakaro
nerotyo tera inkoge intsavetantakerora
irogipashiventakerora, onti isurevetanaka

irapakuaaeromera maireni gara ikanti
tatoita yapakuavitanairo. ²⁰ Kantankicha
iroro isurevetanakara inkañotakeromera
maika ikoneatimotakeri isaankariite
Tasorintsi igisanireku ikantiri: “Jose,
virori vinti iyashikitanakerira Iravi.
Maika onti nopokashitake nonkantakem-
pira kametitake pagakerora Maria
pamanakerora pivankoku. Yogari otomi
intitari timakagakeri Isure Tasorintsi,
irorotari itimantakarira. ²¹ Impogini
omechotakerira pimpaidakeri Jeso,
irorotari gavisaaokigakerine itovaireegi
ganiri ikisaviigiri Tasorintsi ikañovagei-
gara.”

²² Ario okañotaka maika kameti
ontsatagakempaniri ikantakerira
Atinkami Tasorintsi pairani iniakagake-
rira kamantantatsirira Isaiashi ikanti:

²³ “Ogari terira ineimatero surari
ankamonkitake
intimake otomi.

Irorori impaitakempa Imanoeri”
(onkantakera: “Ikonoiigakai Tasorintsi”).

²⁴ Impo ikireanaira Jose ikematsatakeri
isaankariite Tasorintsi ovashi iatake
yagakitiro Maria yamanakerora
ivankoku, ²⁵ kantankicha tera ineimatero
kigonkero imechotakerira otomi. Antari
imechotakera yogari Jose ipaitakeri Jeso.

Yogonkeigakara govageigatsirira Jerosarenku

2 ¹ Antari imechotakera Jeso Verenku
Joreaku año igoveenkariegite
Joreakunirira paitacharira Erorishi.
Impogini ipokaigake Jerosarenku
pashini govageigatsirira iponiaigaka
oatakara ikontetira poreatsiri. Iriroegi
inti ipirininventaigi impokiropage
irogotantaigakemparira posante. Antari

e 1.16 Jeso onti onkantakera “yogavisaakotantake Atinkami”. Kirishito onti onkantakera
“ikogakagakerira Tasorintsi imegakempara Igoveenkariegite iseraereegi”. (Kamosotero
“Jesokirishito” ontiri “Meshiashi” *Glosarioku*.)

yogonkeigapaakara ²ikantaigapaakeri timaigatsirira kara:

—¿Tyara inake kara igoveenkariegite jorioegi ikyaenkarira mechotankitsi?, noneaigakeritari impokiro ikontetapaakera yogaenokanakara nogotantaigakarira mechotake, nopokantaigakarira nonkamosoiguterira nontigeroaventaigakitemparira.

³Irorompatyo ikemavakera koveenkari Erorishi ogatyo ikenake yovankinavageta-nakatyo kara, ariotyo ikañoiganaka maganiro timaigatsirira Jerosarenku.

⁴Impogini irirori ikaemakagantaigakeri maganiro itinkamiegi saseroroteegi intiegiri aikiro gotagantaigirorira itsirinkakotanakerira Moiseshi ikogakotagantaigakeri tyara kara imechotakera Ikogakagakerira Tasorintsi imegakempara Igoveenkariegite iseraereegi. ⁵Iriroegi ikantaigiri:

—Anta Verenku Joreaku, ariotari ikantakeri pairani kamantantatsirira itsirinkakotanakerora Veren ikanti:

⁶‘Virori, Veren, nankitsirira Joraku, paio pavisake inkemakoitakempira pavisakerora pashinipage apatogetara pankotsi itimantaigakarira tovaini Jorakunirira, imechotantakempitari Igoveenkariegite maganiro iseraereegi.’

⁷Impogini Erorishi maireni ikaemakagantaigakeri govageigatsirira teraty tyani inkamante. Iro ro yogonkeigapaakara ikantaigavakeri:

—¿Tyati pineantaigakari ikontetapaakera impokiro?

⁸Impogini ikemakera ikamantaigakerira itigankaigakeri Verenku ikantaigavakeri:

—Atsi piaige pinkogasanoigakiterira, impo pineaigakeririka pimpigaigae pinkamantaigakenara kameti noatakiteniri naro aikiro nontigeroaventakitemparira.

⁹Iro ro ikemaigakera ikantaigakerira iaiganake Verenku. Yogari impokiro ineiaigakerira okyara anta itimaigira iivaiganakeri impo yaganakerora

okatinkatakera pankotsi inantakarira Jeso ario ikusoenkatapaake kara. ¹⁰Antari ineiaigairira aikiro ogatyo ikenaiigake ishineveageiganakatyo kara. ¹¹Impo yogonkeigapaakara pankotsiku ikaiganake tsompogi ineiaigapaakeri Jeso ontiri iriniro ovashi itigeroaventaigapaakari. Impo itsaakoigakero yamaigakeneririra ipaigakeri kori, kasankapaneri ontiri mira. ¹²Impogini imagaigakera ikamantaigunkani igisanireku ganiri ipigaiganaa Erorishiku, neroty ikenapitsatantaiganaaririra parikoti iaigaira itimaigira.

Jose ishigakaganakarira

Jeso anta Ejipitoku

¹³Impogini iaigaira iriroegi yogari isaankariite Tasorintsi ikoneatimotairi Jose igisanireku ikantiri: “Tinaanake ganakero pitsinanetsite intiri otomi plate shiganake anta parikoti Ejipitoku, inkogakagantakeritari Erorishi irogakagantakerira. Pinkantakani pintimakera kara kigonkero nonkamantaempira kametitake pimpigaera.”

¹⁴Iroroty ikemakera ikantakerira ogatyo ikenake itinaanaka yaganakero itsinanetsite intiri otomi ishiganinkaiganaka tsitenigetiku iaigakera Ejipitoku.

¹⁵Itimuntevageigake anta asatyo ikamanaira Erorishi. Ario ikañoigaka maika kameti ontsatagakenkaniniri ikantakerira Tasorintsi pairani itsirinkakagakerira kamantantatsirira ikanti: “Itimavetaka Notomi Ejipitoku, impogini nokaemairi.”

Erorishi yogakagantaigakerira ananekiegi

¹⁶Impogini yogari Erorishi ineakera tera impigaigae govageigatsirira ikisamatana-katyo ovashi itigankaigakeri soraroegi irogaigakiterira maganiro ananekiegi timaigatsirira Verenku intiegiri aikiro timageigatsirira ochoenigetira impogereagakerira maganiro ikyarira mechoi-

gankitsi kigonkero inkaratagaigakeri shiriagakoigankicharira piteti. Irerotari ipampiateke ikantaigakeririra govageigatsirira. ¹⁷Ario ikañotaka maika otsatagun-kanira itsirinkakotanakerira pairani kamantantatsirira Jeremiashi ikanti:

¹⁸ “Okemunkani anta Iramaku okaemavatunkanira, ontityo oyashikiiganakerira Irakere iragatsikanaiganakarira otomiegi teratyo onkaraigae. Tyampa onkantaigakenkani ogishineagaenkanira, kamavioigaketari maganiro otomiegi.”

¹⁹Impogini ikamanakera Erorishi yogari isaankariite Tasorintsi ikoneati-motairi Jose igisanireku ikantiri:

²⁰“Maikari maika tinaanake ganaero pitsinanetsite intiri otomi piataera anta Iseraereku, kamaigaketari kogaigavetan-kicharira irogaigakerimera.”

²¹Iroko ikemavakera ikaviritapanuta yaganairo itsinanetsite intiri otomi iataira Iseraereku, ²²kantankicha antari ikemakotakerira Arekerao itomi Erorishi ipugairira iriri ipegakara koveenkari Joreaku ogatyo ikenake itsaroganake ovashi tera inkoge iriataera anta. Impogini ikamantunkani igisanireku ganiri iatai Joreaku, nerotyo iatantakarira Garireaku. ²³Yogonketapaa-kara anta itimapaake Nasareku. Ario okañotaka maika otsataganakara ikantaigakerira kamantantaigatsirira iniakoigakerira Jeso ikantaigakera onti inkantakenkani, “Inti Nasarekunirira.”

Joan Giviatantatsirira

ikenkitsavagetakera osarigagitetapaakera
(*Mr. 1.1-8; Ir. 3.1-9, 15-17; Jn. 1.19-28*)

3 ¹Aiñokyara itimaveta Jeso Nasareku iatake pashini matsigenka paitacharira Joan ikenkitsavagetanakera anta osarigagitetapaakera ikanti: ²“iKantati-gaiganakempa pampakuaiganakerora povetsikageigira terira onkametite,

panikyatari aganakempa impegantakem-parira Tasorintsi Igoveenkariegie maganiro kematsaigakerinerira!”

³Yogari Joan irerotari ikamantakotakerira kamantantatsirira Isaiashi pairani ikantakera:

“Triatake pashini matsigenka anta osarigagitetapaakera inkenkitsakera imaraenkarika kara inkante: ‘Pakuaiganakero povetsikageigira terira onkametite pingintetashiigavakemparira Atinkamiegi.’”

⁴Irirori onti yogagutaka manchakintsi ovetsikantunkanirira iviti kameyo, aikiro isuntoratsatakari imeshina. Intagani yogaka tsinaro intiri pitsi. ⁵Impogini iaigake inkamosoigakerira tovaini matsigenkaegi timaigatsirira Jerosarenku intiegiri pashiniegi Joreakunirira intiegiri aikiro choenitakoigakarorira nia paitacharira Jororan. ⁶Antari ikemaigakerira ikenkitsavagetakera ovashi ikamantakoiganakero magatiro yovetsikageigira terira onkametite impo yogiviaigakeri Jororanku.

⁷Kantankicha iatashiigakeri aikiro tovaini pariseoegi intiegiri saroseoegi ikantaigakerira irogviaigakerira. Irirori ineaigavakerira ikantaigavakeri: “iViroegi kañogakavi tsiroti! Ontitari pamatagaigaka tera arisano pinkematsatagantsiige. ¿Matsi tyanimpatyora kantaigakempira pimpokaigakera aka nogiviaigakempira ganiri ikisashiigimpi Tasorintsi impogini inkisashiigakemparira maganiro kañova-geigacharira? ⁸Atsi negintetasanoigempantyo kameti ineaigakempiniri maganiro arisano pikantatigaigaka papakuaigakerora povetsikageigira terira onkametite pikematsatasanoigakerira Tasorintsi.

⁹Gara pikantaigi: ‘Gara ikisashiigana Tasorintsi, nantitari iyashikiegi Averan.’ Nonkamantasanoigakempi inkogakerika Tasorintsi iragaveaketyo inoshikagetake-

rora ogapage mapu impegakagagetakemparora iyashikiiganakerira Averen.

¹⁰Kantankicha maika panikya inkisashii-gakempari Tasorintsi maganiri terira inkematsatasanoigeri inkañotagakemparora otogaganira inchato terira ontimumate okitsoki impo otagunkanira.

¹¹“Narori onti nogiviaigakempi niaku oneakenkaniniri arisano pikantatigaigaka papakuai-gakerora povetsikageigira terira onkametite, kantankicha panikya iripokake pashini tigankimoigakempineririra Isure Tasorintsi intimasurentagaran-taigakempira, kantankicha pinkonogagaran-taigakempa intigankagarantaigakempi morekariku. Irirori pairotyo yavisakena yagaveavagetakera. Narori garorokarityo nokañotumatari irirori, onti nagamaavagetakari, pairotari yavisavagetakena.

¹²Antari iripokapaakera inkantapaake tyani kematsatasanoigakeri Tasorintsi, aikiro tyani terira inkematsaigeri. Yogari kematsatasanoigakeririra intentaiganakeri intimimoigakerira Tasorintsi. Yogari terira inkematsaigeri intigankaigakeri morekariku garira otsivakumati.”

Yogiviatunkanira Jeso

(*Mr. 1.9-11; Ir. 3.21-22*)

¹³Impogini iponianaka Jeso Garireaku iatakera Jororanku ikantakerira Joan irogiviatakerira. ¹⁴Kantankicha Joan ikantavakeri:

—Narori garorokari nogiviatumatimpi narompatyo naro pogiviatake.

¹⁵Ikanti Jeso:

—Arioty onkañotakempa maika kametitaketari antsatagaigakerora ikantakerira Tasorintsi.

Impo ikantake Joan:

—Je'ee.

Ovashi yogiviatakeri. ¹⁶Impo iroroty yaganairora Jeso otsapiaku ogatyo

okenake ashirenakimatanakatyo inkite ineiri yapusatinkagutapaakari Isure Tasorintsi ikañotapaakari shiromega.

¹⁷Impo inianake Tasorintsi enoku ikanti: “Yogari yoga inti Notomi, notasanova-getarityo kara noshineventakarityo.”

Ikogavetakara kamagarini irapakuakagakerimera Jeso ganigera ikematsatairi Iri

(*Mr. 1.12-13; Ir. 4.1-13*)

4 ¹Iroto yagatakera iniakera Tasorintsi yogari Isure yamanakeri Jeso parikoti osarigagitetapaakera kameti ineasanotakerira kamagarini ariorika iragaveake irapakuakagakerira ganigera ikematsatairi Iri. ²Ario inake kara 40 kutagiteri onti ipitashitakaro kogapage tera isekatumatempa niganki itaseganake. ³Impo yaiñonitanakari kamagarini ikantakerira: —Irorotari vintira Itomi Tasorintsi atsi kanteronityo oga mapu ompeganakempa sekatsi pisekatakempira.

⁴Kantankicha Jeso ikantiri:

—Aityo otsirinkakotunkani Irinianeku Tasorintsi okanti: ‘Ogari sekatsi oshintsi-tagantavetaka kantankicha tera patiro onkogakotenkani irorori. Pairo avisake okogakotunkanira ogotasanotakenkanira magatiro ikantagetakerira Tasorintsi, irorotari shintsitagantatsi suretsiku.’^f

⁵Impo ariokya itentanakari Jerosarenku yaratinkaigapaakera ivankoku Tasorintsi otishitapanokoku onavagetarityo enoku kara ⁶ikantiri:

—Irorotari vintira Itomi Tasorintsi atsi mitaanakenityo savi, okantaketari otsirinkakotunkanira okanti:

‘Intigankaigakeri Tasorintsi isaankariite irisentaigakempira.

Iragai-gavaempityo ganiri piparigi mapuseku.’

⁷Inii-tanaatyo Jeso ikantiri:

f 4.4 Ireo. 8.3.

—Kantankicha aityo pashini otsirinkakotunkani aikiro okanti: ‘Gara potsimajairi Pitinkami Tasorintsi^g pinkantanakerira: Irorotari pagaveavegetira atsi nanityo maika neakagenaro pagaveane.’

⁸Impo ariokya itentanakari enoku ochovaankakera otishi yogikoneatimotutarityo magatirosanoty kipasi ontiri aikiro magatiropage timantagetakarorira. ⁹Impo ikantiri:

—Pintigeroaventakenarika maika pimpegakenara pitinkami, naro nompagetakempiro magatiro pineagetakerira maika.

¹⁰Iniitanaaty Jeso aikiro ikantiri:

—Virori Satanashi, piataenityo parikoti, otsirinkakotunkanitari okanti: ‘Gara pipegumati pashini pitinkami. Panirosanoty Tasorintsi pinkematsatasanotake.’^h

¹¹Impo ovashi iatai. Irirokya pokaigapaatsi isaankariite Tasorintsi yamaigakenerira iseka ishintsitagaigakerira.

Ikenkitsavagetakera Jeso Garireaku

(*Mr. 1.14-15; Ir. 4.14-15*)

¹²Impogini yogari Jeso ikemakotakerira Joan yashitakotunkanira iatake Garireaku, ¹³kantankicha tera intimae Nasareku, onti iatake itimakera Kapere-naoku. Ogari Kaperenao onti onake otsapiaku inkaare paitacharira Garirea ochenitakotakarora kipatsipage itimantaigarira pairani iyashikiiganakerira Savoron intiri Nepetari. ¹⁴Ario ikañotaka maika kameti ontsataganakaniniri itsirinkakotanakerira kamantanatsirira Isaiashi pairani ikanti:

¹⁵“Ogari kipasi itimantaigarira

iyashikiiganakerira Savoron
intiri Nepetari,

ontu onake intati Jororanku

okenantapinitaganira oatapinitaganira omaraaniku nia.

Ontu opaita aikiro Garirea;
itimantaigaru tovaini terira iriroegi
iseraereegi.

¹⁶Yogaegiri timaigatsirira kara yapavatsaakoigavetaka, kantankicha maika atake ikoneagitetakoiganake; panikya impogereagakempa, kantankicha maika onti ipokashiigakeri Gavisaakotantatsirira irogavisaakoigakerira.”

¹⁷Impo ikenkitsavagetanake Jeso ikanti: “Kantatigaiganakempa pampakuaiganakerora povetsikageigira terira onkame-tite, panikyataru aganakempa impegantakemparira Tasorintsi Igoveenkariegite maganiru kematsaigakerinerira.”

Jeso ikantaigakerira

4 kitsavageigatsirira irogiaganakerira

(*Mr. 1.16-20; Ir. 5.1-11*)

¹⁸Impogini ikenanake Jeso kara ishitetanaka otsapiaku inkaare Garirea. Ineaigapaakeri Sumo intiri irirenti paitacharira Anturishi kitsavageigake, irorotari ipiriniventavageigi iriroegi.

¹⁹Impo ikantaigiri:

—Maikari maika onti pipiriniventavageigi pikitsavageigira, kantankicha maika pakuaiaganakero pikitsavageigira tsame pogiaiganakenara ariokya nagaveakagagakempi irirokya pimpiriniventavageigamatsigenkaegi pinkematsatagaigakerira.

²⁰Impo iriroegi iokageigapanutiro igitsareegi yogiaiganakerira.

²¹Iaigavetanaka antakona anta irirokya ineaapaake Santiago intiri irirenti paitacharira Joan pirinitaigake pitotsiku shitikagisevageigake igitsareegi. Itentaigakari iriri paitacharira Severo. Impo yogari Jeso ikantagiri Santiago intiri Joan:

—Tsame pogiaiganakenara.

²²Iroro ikemaigavakerira ogatyo ikenaignake iokaiganakeri iriri pitotsiku yogiaiganakeri Jeso.

Jeso yogotagaigakerira tovaini matsigenkaegi

(Ir. 6.17-19)

²³Impogini iatanake Jeso itsotenkana-keroty Garirea yogotagantavagetakera pankotsipageku yapatoitantaigarira jarioegi ikenkitsatimoigakerira ikantaigakerira tyara inkantaigakempa kameti irogavisaakoigakeriniri Tasorintsi impegakempara Igoveenkariegite. Aikiro yovegagematityo tovaini oposantetashi-geigakarira mantsigarintsipage, tenigetyo tyara inkatsitumageigae paa vegasanova-geigaa. ²⁴Impo yogaegiri timageigatsirira parikotipageku Suriaku ikemakoiganakeri yovegantagetaira neroty yamageigapaa-keneri maganiro mantsigaigankitsirira. Iriroegi iposanteivagetanakatyo kara ikonogaka yatsipereintevageigaketyo kara. Pashini onti ikamakamaigi, pashini-kyia ishinkogiseigaka, kantankicha irirori yovegagairi maganiro. Aikiro yoneaga-nontaigakari itimaguigakerira kamagari-nipage. ²⁵Impo yogiavageiganakerityo tovaini matsigenkaegi poniageigankicharira Garireaku, Tekaporishiku, Jerosarenku, Joreaku ontiri aikiro intati Jororanku, itovaigavagetiratyo kara.

Ikenkitsavagetakera Jeso otishiku

5 ¹Impogini ineaigakerira Jeso maganiro patovantaigakaririra itovaigavagetityo kara itonkoanake otishiku ipirinitakera kara, impo yaiñonii-gakari irogamereegi inkemisantaigakerira. ²Ovashi yogotagaigakeri ikantaigakerira:

Tyani shinevageigankichane impogini

(Ir. 6.20-23)

³“Pairo okametitake pinkantaigakera: ‘Garika itsarogakagana Tasorintsi

tyampa nonkantakempa, teranika tatakona nagaveimagete naro tsikyata.’ Antari pinkañoigakemparika maika ario pinkante pishinevageigakempa impegakempatari Tasorintsi Pigoveenkariegite.

⁴“Pairotari irishinevageigakempa impogini maganiro onkenkisureakagai-gakemparira maika tatapagerika oita terira onkametite, irogishineaigaeritari Tasorintsi.

⁵“Pairotari irishinevageigakempa maganiro tsipereakoigankichanerira magatiro tatarikara oita pokashiigake-rine, impoginitari ineaigakero magatiro ikashigakagaigakaririra Tasorintsi.

⁶“Pairotari irishinevageigakempa maganiro kogasanoigankitsinerira intsatagageigakerora magatiro ikogage-takerira Tasorintsi, iragaveakagaigakeri-tari irirori inkañoigakerora maika.

⁷“Pairotari irishinevageigakempa maganiro tsarogakagantaigankichane-rira, intsarogakagaigakemparitari Tasorintsi iriroegi aikiro.

⁸“Pairotari irishinevageigakempa maganiro suretasanoigakemparinerira Tasorintsi impanirotasanoiganakerira, impoginitari iriaigake itimira ineaigake-rira.

⁹“Pairotari irishinevageigakempa maganiro gametiaigaerinerira itovaireegi, impegakagaigakeritari Tasorintsi itomiegi.

¹⁰“Pairotari irishinevageigakempa maganiro iratsipereakagaigakenkanirira inkisaviigakenkanira ikematsaigakerira Tasorintsi itsatagageigakerora ikogage-takerira, matakatari pegaka Tasorintsi Igoveenkariegite.

¹¹“Maika atsi shinevageigempa viroegi pineaigakera irovosanteaigakempira pitovaireegi, inkisavintsavageigakempira, aikiro intsoeventavageigakempira ineaigakera pikematsaigakenara naro.

¹²Ariotari ikañoigunkaniri kamantantai-gatsirira pairaninirira yatsipereakagai-

gunkanira ikisaigunkanira. Antari pineaigakera inkañoigakempira maika, pishinevageigakempatyo kara, pogoigaketari pairotyo irogishineavageigakempi Tasorintsi impogini anta enoku.

Kematsaigatsirira onti ikañoigakaro tivi
(*Mr. 9.50; Ir. 14.34-35*)

¹³“Viroegi onti pikañoigakaro tivi. Pineirotari tivi opochatira pairo okogasanotagani, kantankicha antari omasankatera ganigera opochatai, ¿ario tatatyo onkogavitaenkani? ¿Matsi tyampatyo onkantaenkani kameti ompochatanaera? Ontityo ovuokakenkani parikoti okenapinitaganira agatitinatakenkanira.

¹⁴“Aikiro viroegi kañoigamatakavi tenenkakoigiririra maganiro matsigenkaegi. Pineirotari pankotsipage ovetsikagetunkanira otishiku apatotunkanira otovaigavagetityo kara, ¿matsi gara oneagani? Oneakenkanityo, koneataketari. ¹⁵Ario ikañotaka aikiro mechero yogimataganira tera ario intatakotenkani kovitiku, ontityo yovitakotunkani enoku kameti irontenenkakoigakeriniri maganiro naigankitsirira pankotsiku. ¹⁶Ario pinkañoigakempa viroegi pinegin-tevageigakempara povetsikaigakerora kametiripage kameti ineaigakempiniri maganiro, ovashi inkantaiganake pairo ikametiti Piri timatsirira enoku.

Jeso ikantake ontsatagakenkanira
Itsirinkakagantakerira Tasorintsi

¹⁷“Gara pikantaigi: ‘Onti ipokashitake Jeso inkantakera ganigera otsatagaagani itsirinkakotanakerira Moisheshi ontiri aikiro itsirinkakoiganakerira kamantantaigatsirira’, teranika iroro nompokashite, ontityo nopokashitake nontsatagasantakerora magatiro ikantaigakerira. ¹⁸Maika nonkamantasanoigakempi antari

gatatara otsonkata inkite ontiri kipatsi ontsatagasantakenkanityo magatiro ikantagetirira Tasorintsi itsirinkakagaigakeririra pairaninirira. ¹⁹Tyanirika gagakerone patiro ikantakerira, aikiro irogotagaigakeri pashini irimaigakempara iriroegi, garatyo ishineventumaigari maganiro pegaigakeririra Tasorintsi Igoveenkariegite. Kantankicha yogari tsatagasantakeronerira, aikiro irogotagaigakeri pashini irimaigakempara irirori intsatagasanoigakerora, pairotyo irishineventavagetakenkani. ²⁰Nonkantantaigakempirira maika garika pinegin-tetasanoiga pavisagakerira gotagantaigirorira itsirinkakotanakerira Moisheshi intiegiri pariseoegi garatyo pitimimoigiri Tasorintsi impogini.

Jeso yogotagantake ganiri okisantagani
(*Ir. 12.57-59*)

²¹“Pogoigakerotari ikantaigunkanirira pairani yashikiiganakempirira ikantagani: ‘Gara poganti,ⁱ inkisashitakenkanitari maganiro gantaigankitsinerira.’ ²²Kantankicha naro nonkantaigakempi tyanirika kisakerine itovaire irimatakenkanityo irirori impogini inkisashitakenkanira. Aikiro tyanirika kantakerine: ‘Viro tera pogotumate’, iramanakenkanityo itinkampageku inkisashitakenkanira, kantankicha yogari kantakerinerira: ‘iVinti ivegaga!’, intagakempatyo morekariku.

²³“Irorotari nonkantantaigakempirira piaigakerika ivankoku Tasorintsi pamana-kenerira pipira povetisakagantakenerira impo katsiketyo pisuretanakemparo pinkante: ‘Ariotari aityotari ikisavitakenarira notovaire’, gatatatyo povetisakagantari. ²⁴Onti poganakeri pimpigapanaate pogametitapanuterira pitovaire. Impogini ario pinkante pimpigashitanaeri pipira povetisakagantakenerira Tasorintsi.

²⁵“Inkisakempirika pitovaire ineakera pipegakotakerira impo inkogavetakempa iramanakempira joeseku kameti inkantakera irirori tyara inkantaitakempi. Kantankicha viro pinianiatanakeri avotsiku pogishineaerira ganiri yamimpi. Antari iramanakempirika joeseku irirokya kaemakerine soraro, irirokya soraro onti iragapanutempi irashitakotakempira. ²⁶Nonkamantasanotakempityo garika pipunatasanotairi kisakempirira magatiro pipegakotakeririra garatyo yapakuaimpi shitakotakempirira.

**Jeso yogotagantake ganiri
oneavintsatagani tsinane**

²⁷“Viroegi pogoigakerotari okantunkanirira pairani okantagani: ‘Gara piatashitiro tsinane.’²⁸Kantankicha naro nonkantaigakempi tyanirika neavintsanatakerone tsinane kañomataka ontinirikatyo iatashitakero, isuretakarotari ineakerora. ²⁹Irorotari nonkantaigakempirira maika irorora kañovagetagakempine poki pakosanorirakutirira ariometryo pinkitsogitakerome, pairotari okametitake pinegintetasanovagetakempira impo pinkamana-kerika piatakera pintimimotakerira Tasorintsi, avisakero pinkañovagetakempira impo pinkamanakerika piatakera morekariku. ³⁰Aikiro pakosanorira irorora kañovagetagakempine ariometryo povatua-kerome, pairotari okametitake pinegintetasanovagetakempira impo pinkamanakerika piatakera pintimimotakerira Tasorintsi avisakero pinkañovagetakempira impo pinkamanakerika piatakera morekariku.

**Ikantake Jeso gara tyani
okumatiro itsinanetsite**
(Mt. 19.9; Mr. 10.1-12; Jr. 16.18)

³¹“Aikiro okantunkani pairani: ‘Tyanirika kogankitsine iokanaerora

itsinanetsite kantetyo impakerora sankevanti onkantakera: Maika mataka nokanaimpi.’ ³²Kantankicha naro nonkantaigakempi ompanirotakempirika pitsinanetsite garatyo piokiro. Pokanakerorika impo agaerika pashini pimatakero pikañovagetagakaro, agaitari pashini. Ario pinkañotakempa viro pagakerika tsinane okunkanirira matakavi kañovagetakavi.

**Jeso ikantake gara tatoita
oniakotumatagani**

³³“Aikiro pogoigakerotari ikantaigunkanirira pairani yashikiiganakempirira ikantagani: ‘Tatarika pinkantake piniakotakeririka Tasorintsi pinkantakera: Ineakena Tasorintsi tera nontsoegumatempa, garatyo pikantatigumatiro impogini, ontityo pintsatagakero.’ ³⁴Kantankicha naro nonkantaigakempi omirinkara pintsatagageigakero magatiro pikantaigakerira ganiri pikogakotumaiga pinkantaigera: ‘Ineakenatari Tasorintsi tera nontsoegumatempa.’ Gara piniakoi-giro inkite pinkantaigakera: ‘Nontsoegakempirika kantakarikatyo opitankirika inkite’, intitari shintaro Tasorintsi Igoveenkariegite maganiro. ³⁵Ario okañotaka kipatsi irorori gara piniakoi-giro pinkantaigakera: ‘Nontsoegakempirika kantakarikatyo onigirika kipatsi’, ontitari yashintagitearira, aikiro gara piniakotumaigiro Jerosaren pinkantaigakera: ‘Nontsoegakempirika asatyo ompegakempa Jerosaren’, intitari shintaro Koveenkari Gaveavagetatsirira terira intimumate viserinerira. ³⁶Aikiro gara piniakoi-giro pigishi pinkantaigakera: ‘Nontsoegakempirika ogatyo nonkenake nonkutyapaetanake’, teranika pagaveaige viroegi pinkutatagaigakerora ontirika pimpotsitagaigakerora papeatiro pigishi.

³⁷Gara tatoita piniakotumaigi, intagatityo pinkantaigake: ‘Jeeje, arisano’, ontirika pinkantaigake: ‘Teratyo.’ Antari ontirika piniakogeigake tatarika oita kameti inkematsaigakempiniri pashini, intityo suretagaigakempine kamagarini.

**Jeso ikantake gara ipugatani
kisantankitsirira**
(Ir. 6.29-30)

³⁸“Viroegi pogoigakerotari okantunkanirira pairani: ‘Tyanirika tisoreaatantakerone okitsi ariotyoka inkañotagakenkani irirori intisoreaatantenkanyo iroki. Aikiro tyanirika tinkaraitantakerone aitsi, ariotyoka inkañotagakenkani irirori intinkaraitantenkanyo irai.’ ³⁹Kantankicha naro nonkantaigakempi gara pipugaigari kisaigakempinerira. Kañotari intimera taakempinerira pivoroku garatyo pipugatarik.^k ⁴⁰Ontirika intimake kogankitsinerira iramanakempira joeseku iragutakempirora pogagutakarira savitankitsirira gara pitsaneanakaro^l pimananchaki enokutankitsirira. ⁴¹Ario onkañotakempa aikiro ariorika intimake ganakempinerira iromperatakempira inkantakempira pogavokitakiterira choenikona anta, piatetyo pavisanakero tyo ikantakempirira pogavagetakiterityo antakona anta. ⁴²Pintsarogakagakempirira nevitakempinerira tatarikara oita, pimpakerityo ikogakotakarira, aikiro tyanirika kogankitsine pampinatakera tatarikara oita gara pitsaneapitsatari.

**Inkavintsajaigakenkanira
kisaantaigatsirira**
(Ir. 6.27-28, 32-36)

⁴³“Pogoigakerotari okantunkanirira pairani: ‘Pintakempirira piamigote pinkavintsaaikerira. Irirorkya kisakempirira

pimpugatanakemparityo pinkisaikerira.’ ⁴⁴Kantankicha naro nonkantaigakempi pinkavintsajaigakerityo iriroegi kisashiigakempirira, aikiro piniaventaigakerira maganiroro tsipereakagaigimpirira. ⁴⁵Pintsatagaigakerorika magatiro nokantaigakempirira maika onti pinkañoiganakempirira Piri timatsirira enoku. Kañotari irirori iporeakagirira poreatsiri kameti imporea-koigakeriniri maganiroro matsigenkaegi, irirorika kametiigatsirira intirika terira inkametiige. Ario okañotaka inkani irorori yogivariginirira maganiroro kematsaigiririra intiegiri terira inkematsaigeri. ⁴⁶Nonkantaigakempi antari intaganirika pinkavintsajaigake kavintsajaigimpirira, ¿matsi tatatyo irishineviigakempi Tasorintsi? Ariotarika ikañoigari maika kogantaigagirira itovaireegi koriki irashi koveenkari. ⁴⁷Ario okañotaka aikiro intaganirika piniavagavake pitovaireegi, ¿matsi ario pineagake paio pavisagake pikematsaigakerira Tasorintsi? Ariotarika ikañoigari maika yogaegi terira inkematsaigeri. ⁴⁸Irorotarika nonkantaigakempirira maika pinkavintsaaantavageigakera pinkañoigakempirira Piri timatsirira enoku ikavintsaaantavageterira.

**Jeso yogotagantake tyara okantagani
okavintsaaantaganira**

6 ¹“Gara intagati pikavintsaaantagani pineakagaigakempirira pitovaireegi. Pinkañoigakempirika maika garatyo ishineventaigimpirira Piri timatsirira enoku.

²“Pintsarogakagaigakempiririka terira irashintumaigempa pimpaigakerira ikogakoigakarira gara pikamantaigirira pitovaireegi ganirika pikañoigari kematsa- mampegaigacharira kogapage. Iririroegi ontitarika ineakagantaigaka pankotsipageku yapatoitantaigagirira ontirika aikiro kara

k 5.39 Garatyo pipugatarika: *literalmente*, pishonkanakempa irimatakerora apiporotene irorori.
l 5.40 Gara pitsaneanakaro: *literalmente*, pimakerityo.

avotsipageku kameti irishineventaigakempariniri itovaireegi, kantankicha maika nonkantaigakempi gatanika ishineventumaigari Tasorintsi kañoigirorira maika, intaganityo shineventaigakari itovaireegi neaigakeririra. ³Antari pipaigirira tyanirika kogakoveigankicharira garatyo tyani pikamantumati, ⁴impogini yogari Piri neagetakerorira magatiro irishineventakempi ovashi inkavintaakempi.

Jeso yogotagantake tyara inkantakenkani irinienkanira Tasorintsi
(*Tr. 11.2-4*)

⁵“Antari piniaigerira Tasorintsi gara pikañoigari kematsatamampegaigacharira kogapage iniamampegaigarira. Iriroegi ontitari ikogavintaigi irarintkaigakera pankotsipageku apatoitantaganirira ontiri aikiro avotsiku iniamampegaigakarira kameti ineaigakeriniri itovaireegi. Yogaegiri kañoigacharira maika garatyo ishineventumaigari Tasorintsi. Intagani shineventaigakari maganiro neaigakeririra. ⁶Kantankicha viro pinierira Tasorintsi piatake pinkianake pivankoku pashitakotakempa paniro, impo piniakeri. Irirogi ineaikempi panirora papuntaka piniakerira inkemavakempi irishineventakempi ovashi irogishineakempi. ⁷Nerotyo pinierira Tasorintsi gara piniavageti kogapage vero vero vero ganiri pikañoigari terira inkematsaigeri Tasorintsi. Onti ineaigari ariori inkemaigakeri iniavageigakera. ⁸Nonkantutaigaempityo aikiro garatyo pikañoigari iriroegi, yogotitari Tasorintsi tatarika pikogakoigaka tekyaenkara pineviigeri. ⁹Antari piniaigerira onti pinkañoigakero maika pinkantaigakerira: ‘Apa Tasorintsi timatsirira enoku, nokogaigake impinkatsasanoigakempira maganiro matsigenkaegi ¹⁰ inkematsasanoigakempira impegai-gakempira Igoveenkariegite.

Nokogaigake ontsatagakenkanira aka kipatsiku magatiro pikogakerira viro onkañotakempara otsataganira kara enoku.

¹¹ Pimpaiagakenara omirinka nogaigakemparira.

¹² Pimagisantaerora novetsikaigakerira terira onkametite gara pikenkiagaiganaro.

Ariotari nokañoigakari naroeigi nomagisantaigakero yovetsikaigakerira tsipereakagaigakenarira tera nonkenkiagaigeri.

¹³ Pimpampogiakoigakenara ganiri opokashigeigana garira noshintsitashigeigiro.

Onti nokogaigake pishintsitagaigakenara ganiri yagaveigaana kama-garini inkañoavagetaigaenara.’

¹⁴“Pimagisantaigaerorika yovetsikaigakerira tsipereakagaigakempirira ario inkañotakempa Piri timatsirira enoku imagisantaero magatiro povetsikaigakerira viroegi terira onkametite gara ikenkiagaimpuro. ¹⁵Kantankicha garika pimagisantaigiro yovetsikaigakerira tsipereakagaigakempirira garatyo imagisantairo Piri povetsikaigakerira viroegi terira onkametite.

Jeso yogotagantake tyara onkantakenkani ompitashitakenkanira kogapage

¹⁶“Ariorika pinkogaigake pimpitashii-gakemparora kogapage gara pisekataiga kameti pimpiriniventaigakeroniri pisuretakoigakemparira Tasorintsi gara pikenkisureamampegaiga kogapage, garira onti pinkañoigakempari kematsatamampegaigacharira. Iriroegi ontitari ikenkisureamampegaiganaka kogapage kameti ineaigakenkaniniri. Kantankicha yogaegiri kañoigacharira maika garatyo ishineventumaigari Tasorintsi, intaganityo shineventaigakari maganiro

neagakeririra. ¹⁷Kantankicha viroegi pimpitashiigemparrora kogapage pinkishiigakempaty, aikiro pinkivaiigakempa ¹⁸ganiri yogoigimpi pitovaireegi onti pipitashiigakarora kogapage. Intagani neagakempine Piri Tasorintsi impo irirori irishineventaigakempi ovashi pineakoigakemparo impaigakempirora onkatinkageigakempirira impogini.

**Oshineventavagetakenkanira magatiro
ikogagetakerira Tasorintsi**
(*Jr. 12.33-34*)

¹⁹“Gara onti pishineventavageiga pashintavageigakempara aka kipatsiku, onkonogagarantakempatari irogagetakemparo gagetarorira, pashinikya onkiterigetanaake, pashinikya onkoshigetakenkani, ontsongagetakenkani magatiro. ²⁰Onti pishineventavageigakempa magatiro ikogagetakerira Tasorintsi kameti inkavintaavageigakempiniri irogishineigakempira impogini anta enoku. Antari anta gara tatoita tsonkatu-magetaacha. ²¹Antari irororika pishineventavagetakempa timagetatsirira aka kipatsiku iroroty pimpiriniventavagetake, intagatitari pisuretaketakempa. Antari irororika pishineventavagetakempa ikogagetirira Tasorintsi ario pinkante iroroty pimpiriniventavagetake, irorotari pisuretaketakempa.

**Suretakotasantororira Iriniane Tasorintsi
onti ikañotakari neatsirira**
(*Jr. 11.34-36; 16.13*)

²²“Yogari suretakotasanoavagetakemparonerira Iriniane Tasorintsi irogotasannotakero magatiro ikogagetirira irirori, onti inkañotakempari neatsirira tyarika iati ineasanotanake tera irontivatumatempa, okoneagitetimotakeritari magatiro. ²³Kantankicha yogari terira isuretakotasanoemparora Iriniane

Tasorintsi tera irogotero ikogagetirira, onti ikañotakari terira inee, tyampa inkantakempa iranuiavetakera, onti yontivatavagetaka, teranika onkoneagitetimoteri, onti ineakero pavatsaasemataka. Garika pisureigaro Iriniane Tasorintsi, intagatirika pisuretakovageigakempa timagetatsirira aka kipatsiku onti pamatavinaigaka tsikyata viroegi, kañoigamatakavi terira ineagumate, ontitari apavatsaasetimoigakari.

²⁴“Gara tyani gaveatsi intimakera piteni shintaririra inkematsasanoigakerira piteniro. Panirotyo irishineventa-kempa inkematsasanoigakerira, yogari irapitene gara ikematsatiri, gatanika ishineventari. Ario ikañotaka tyanirika kogankitsine irashintaarantavagetakempara garatyo ikogumati inkematsasannotakerira Tasorintsi.

**Tasorintsi impaigakeri
kematsasanoigiririra magatiro
ikogakogeigakarira**
(*Jr. 12.22-31*)

²⁵“Nonkantantaigakempirira gara povankinaventaigaro pisekaegi pinkantaigakera: ‘Maikaniroro kamani ðtatarikatyo nogaempa?’ Aikiro gara povankinaventaigaro pogaguigakemparira pinkantaigakera: ‘¿Tyarikatyo nagakero nogagutaemparira?’ Kañotari pisure paniantaigarira yagaveaketyo Tasorintsi itimakagakerora irorompari piseka paio impaigakempiro. Ario okañotaka pogaguigakemparira, kañotari yagaveakera Tasorintsi itimakagakerora pivatsa irorompari pogaguigakemparira paio impaigakempiro. ²⁶Pineagiritari aragetatsirira teratyo impankivageigavetempa, aikiro teratyo ontimavetempa irogantaigakemparorira iseka iriatapiniigakera iragapiniigakera isekataigakempara, kantankicha Piri timatsirira enoku ipaigirityo

irogaigakemparira. iViroegimparorokari paio impaigakempi pisekaegi pogaigakemparira, pairotari pavisaigakeri aragetatsirira! ²⁷Antari povankinaventaigemparora pinkimoiganakera ¿matsi ario pagaveaigake pinkimoiganakera? Garatyo pagaveimaigi.

²⁸⁻²⁹“Iroventi ¿tyara okantakara povankinaventaigakarora pogaguigakemparira? Pineagironiroroty oka otegapage tsikyata oshivokashiigaro irorori tera antumaigavetempa, aikiro tera onkirikai-gavetempa akyari okametivageigi avisavagetaketyo kara okametitakera, avisagetakerotyo kamisa kametimagorisanorira pairanitirira yogagutarira koveenkari Saromon pairorira avisake okametimagotakera. ³⁰Kañotari oka otegapage porenkamaivagetake ikametitagetirora Tasorintsi, kantankicha kamani ovatuakenkani ontagakenkanira, iviroegimparorokari paio impaigakempi pogaguigakemparira! Kantankicha viroegi tera pinkematsatasanoigeri onti povankinaventaiga posantepage. ³¹Nonkantantagakempirira gara povankinavageiga pinkantaigakera: ‘¿Tatarika nogaempa? ¿Tatarika noviikaempa? ¿Tyarikatyo nagakero nogagutaemparira?’ ³²Intitari kañoigiro maika yogaegi terira inkematsaige yovankinaventaigarora posantepage, irorotari ipiriniventaigi iriroegi. Kantankicha viroegi gara pikañoigiro maika, aiñotari Piri timatsirira enoku. Irirori yogotake omirinka tatarika oita pikogakoigaka. ³³Irorompatyo pinkogasanogaito pimpiriniventaigakerora magatiro ikogagetirira Tasorintsi pintsatagaigakerora, impo irirori impaigakempiro magatiro pikogakogeigakarira. ³⁴Gara povankinaventaigaro pinkantaigakera: ‘¿Tyarikatyo nonkantanakempa kamani?’ Omirinkatari kutagiteri aityo posantepage tsipereakagaigakempirira pisuretakoigakemparira. Onkutagitevetanaempa

pashinikyatyo timaatsine osuretakotaenkanirira.

**Gara iniashinatagani
atovaireegi kogapage**
(Ir. 6.37-38, 41-42)

7 ¹“Gara piniashinaigari pitovaireegi kogapage pinkantaigakera yovetsikaigake terira onkametite ganiri ikisashii-gimpi Tasorintsi impogini. ²Pinkantavageigakerika kogapage pantsipereakagantaigakera arioty inkañotagaigakempi viroegi impogini inkisaigakempityo iratsipereakagaigakempira irirori. Tyarika pinkantaigakeri pashini arioty inkañotagaigakempi Tasorintsi irirori. ³¿Tyara pikantakara pikanomajaigirira vetsikaigirorira terira onkametite? ¿Matsi tera pineero pashi virompatyo viro paio pogagaka? ⁴Kañomatakatyo ontinirika pikantanakeri pitovaire: ‘Atsi taina nogotagakempira ganigeniri pikañovage-taa’, tenirikatyo pineemparo viro tyarikaroro apatoventavagetakempityo kara. ⁵iOntityo pineakagantavintsatakara! Atsi negintetasanovagetempanityo viro kameti pagaveakeniri pinkanomaantakera.

⁶“Gara pikenkitsatimoigiri Iriniane Tasorintsi samatsanaigirorira garira onti inkisaigakempi.

**Tyara inkantakenkani
iriniakenkanira Tasorintsi**
(Ir. 11.9-13; 6.31)

⁷“Neviigeri Tasorintsi tatarika pikogakogeigaka impo irirori impaigakempirotyo. Pinkogasanogakerorika pineakogakemparoty. Atanatsirika pinevinatakeri Tasorintsi inkemaigakempityo impaigakempirora. ⁸Yogari nevitantatsirira ipunkani. Yogari kogankitsirira ineakero. Aikiro yogari tyanirika atanatsirira inevitantira ikemunkani ipunkanityo. ⁹¿Matsi pinkañoigera

viroegi inevitempira pitomi pan pinoshike mapu pimperi? ¹⁰Intirika inevitakempi shima, ¿pinoshike pimperi maranke? ¹¹Kañotari viroegi pikañova-geigavetari akyari pipaigiri pitomiegi tatarika oita kametiripage ineviigakempirira, iirromparorokarityo Piri timatsirira enoku pairorokari impaigakempiro tatarika oita kametiripage pineviigakeririra!

¹²“Irorotari nonkantantaigakempirira pikogaigakerika inegintevageitakempira iroroventi pinegintetantavageigaketyo viroegi aikiro. Ariotari okantiri itsirinkakotanakerira Moiseshi ontiri aikiro itsirinkakoiganakerira kamantantaigatsirira.

Sotsimoro maaniñakitirira

(*Jr. 13.24*)

¹³“Pinkiantaiganakemparora sotsimoro maaniñakitirira, aityotari pashini sotsimoro omaranakini ontiri aikiro avotsi ariopokirikatyo onake atatsirira saví morekariku. Onti okenantavintsatantaganirira iatantaigaro tovaini matsigenkaegi. ¹⁴Kantankicha ogari apipokitene avotsi maanisano ochapavokivagetaka onti oavokitake enoku Tasorintsiku. Gara ineaigairo igamane maganiro kenantanakemparonerira. Ario okañotaka sotsimoro irorori maaniñakitisanano okañovagetaka. Tesakona intovaige neaigakeronerira inkiantaiganakemparora ganiri ineaigairo igamane.

Ogari inchatopage onti oneantagani oi

(*Jr. 6.43-44*)

¹⁵“Tsikyanira yamataviigimpikari kenkitsatakotamampegaigaririra Tasorinti inkañogavetapaakempari ovisha terira tyara inkantantavagete, kantankicha onti ikañogakari matsontsori pogereantatsirira. ¹⁶Viroegi onti pineantaigavakempari irororika yogotagantaigake Niagantsisanorira

ontirika yogogaigakero iramatavinaigakempira. Pineagironiroro ova tera oneenkani ontimantemparora kivitsa. Ario okañotaka igo tera oneenkani ontimantemparora tanko. ¹⁷⁻¹⁸Ario okañotaka inchatopage. Magatiro timatsirira oi ogaganirira gara agaveimati ontimera oi terira ogenkani. Intagatityo timankitsine oi ogaganirira. Ario okañotaka aikiro inchatopage timatsirira oi terira ogenkani gara agaveimati ontimera oi ogaganirira. Intagatityo timankitsine terira ogenkani. ¹⁹Ogari timatsirira oi terira ogenkani onti otogagani impo otagunkani. ²⁰Ario ikañogaka matagavageigacharira iroro pineantaigavakempari tera inegintevageigempa, aikiro tera katinka irogaigero yogotagantaigara.

Gara itimimoigiri Tasorinti maganiro

kantaigavetakemparinerira:

‘Notinkami, Notinkami.’

(*Jr. 13.25-27*)

²¹“Antari impogini irapatoitaigakerira Apa maganiro kematsaigiririra impegakempara Igoveenkariegite, gara itimimoigiri yogaegi maganiro kantaigavetakenanerira: ‘Notinkami, Notinkami.’ Intaganityo timimoigakerine vetsikaigakeronerira ikogagetakerira irorori. ²²Antari aganakempara kutagiteri nonkisantagakemparirira maganiro terira inkematsaigena tovainityo kantaiganakenane: ‘Notinkami, Notinkami, nokenkitsatagakempi, aikiro naventashiigakari pivairo noneaganontaigakarira itimaguigakerira kamagarini, aikiro novetsikaigakera terira oneimagetenkani nokantaigake vinti gaveakagakena.’ ²³Kantankicha naro nonkantaigerityo: ‘Teraty naro shintaigempine. iPiaigetyo parikoti maganiro viroegi vetsikagisevageigirira terira onkametite!’

**Jeso ikantakoigakerira matsigenka
ikañotagaigakari vetsikioririra pankotsi**
(Mr. 1.22; Ir. 6.47-49)

²⁴“Maika nonkantaigakempi tyanirika kematsatakenane irovetsikagetakerora nokantagetakerira onti inkañotakempari govagetatsirira yovetsikakerora ivanko ikigantashitakero yogavagetakerotyto savi kameti onkusotasanotakeniri. ²⁵Impogini oparigavetanaka inkani okimoatanake nia, otampiavagetanaketyo jiriririri, kantankicha teratyto agaveero ontuanakerora, okusotasanotaketari. ²⁶Yogari kemisantavetakenarira kantankicha tera irovetsikero nokantakeririra onti ikañotakari terira irogote yovetsikakerora ivanko tera irogasanotero savi ²⁷impogini opariganake inkani okimoatanake nia, otampiavagetanaketyo jiriririri ogatyto okenake otuanakero okantavageti togn, teranika onkusotasanote.”

²⁸Impo yagatanaira Jeso ikenkitsavagetakera yogavageiganaketyo kavako maganiro kemisantaigakeririra, ²⁹ineigaiketari yogotagaigakerira yogovagetiratyo kara, tera ario inkañoigempari gotagantaigirorira itsirinkakotanakerira Moiseshi.

Jeso yovegairira vesegasenari
(Mr. 1.40-45; Ir. 5.12-16)

8 ¹Impogini yanonkaara Jeso ipokaira, yogiaigapaakeri tovaini matsigenkaegi. ²Ikenapaake paniro vesegasenari itigeroaventapaakari ikantiri:

—Notinkamii, nokogavetaka povegae-nara, kantankicha impatyora viro tyarika pinkante.

³Yogari Jeso yakontsaanake itsagatakeri ikantiri:

—Jeeje, nokogake, imaika veganaempa!

Irorotyto ikantakerira ogatyto ikenake yoveganaa yovesegavetakara. ⁴Impo ikantavakeri Jeso:

—Gara tyani pikamantumati. Inti piatimotake saserorote pokotagakemparira ontiri aikiro pamagetanakenerira piratsipage pintsatagakerora ikantakerira Moiseshi kameti inelasanotakempiniri ovashi inkantakempi vegaavi irogoigakempiniri maganiro vegasantaavi.^m

**Jeso yovegairira iromperane
itinkamiegi soraroeigi**
(Ir. 7.1-10)

⁵Impogini iatanake Jeso Kaperenaoku. Iroro yogonketapaakara ineiri ikenapaake paniro iromano. Irirori inti itinkamiegi soraroeigi. Impo ikantapaakeri:

⁶—Notinkami, imantsigavagetanake nomperane aiño inoriaka anta novankoku. Ishinkogisevagetanaka yatsipereavagetaketyo kara.

⁷Ikantiri Jeso:

—Iroroventi noatake novegaerira.

⁸Inianake itinkamiegi soraroeigi ikanti: —Notinkami, garorokari pikiimatiro novanko, nogotaketari vinti gaveavagetatsirira. Piniimatakera intagatityo irovegantanaempa nomperane. ⁹Kañotari naro itimavetari peraiganarira, akyari itimi nashi nomperaneegi. Tyarikara nonintake nontigankakerira ikematsatakenatyto iatake. Pashinikya nokaemirira ipokake. Aikiro aiño pashini tatarika nomperatakari ikematsatakenatyto.

¹⁰Iroro ikemavakerira Jeso ikantakera maika yoganaketyo kavako ikantaigiri gaigapaakeririra:

—Arisanotyto nonkantasanoigakempi teratyto noneimageteri paniro Iseraerekunirira inkañotakemparira yoka iromano yogotasanotakera nagaveavagetira.

¹¹Impogini irapatoitaigakerira Tasorintsi

maganiro kematsaigiririra impegakempara Igoveenkariegite iripokaigake pashini tovaini terira iriroegi jorioegi imponiageigamatempatyo samani parikotipageku. Imponiageigamatempatyo oatakara ikontetira poreatsiri, pashini imponiageigamatempatyo iatira poreatsiri intentaigakemparira Averan, Isaako intiri Jakovo isekataigakempara, ¹²kantankicha yogaegiri jorioegi ikogavetakarira Tasorintsi intentaigakemparimera garatyo itentaigari, onti intigankaigakeri parikoti apavatsaasevagetara. Antari anta inkantakani iriraguntevageigakempara inkaemavaveigaketyo kara iratsikagisevageiganakerotyoti irai.

¹³Impo ishonkashitari itinkamiegi soraroegei ikantiri:

—Maika piatae pivankoku, pogotaketari nagaveakera novegaerira pomperane, maika irovegaempatyo.

Iroto iniakera Jeso ogatyoti ikenake yoveganaa.

Jeso yovegairora yagashintotirira Perero
(*Mr. 1.29-31; Ir. 4.38-39*)

¹⁴Impogini iatake Jeso ivankoku Perero ineapaakero yagashintotirira mantsigatake noriaka oanativatekera. ¹⁵Itsagatapaakero akoku ogatyoti okenake opeganaka oanatire ovashi otinaanaa opakoiigakeri isekataigakempara.

Jeso yovegaigakerira tovaini mantsigaigankitsirira
(*Mr. 1.32-34; Ir. 4.40-41*)

¹⁶Impogini ochapinitanakera yamaigapaakeneri Jeso tovaini itimaguiigakerira kamagarini. Irorotyoti iniakera Jeso oga ikenagake kamagarinipage iokaiganairi itimaguiigavetakarira iaigaira parikoti. Aikiro yamaigapaakeneri tovaini mantsigaigankitsirira, yovegagigairi maganiro. ¹⁷Ariotari ikantakeri pairani kamantantatsirira Isaiashi ikamantako-

takerira ikantakera: “Yatsipereaventai-gakaira akañovageigara, aikiro yovegaigakaira amantsigaigakera.”

Kogaigavetankicharira irogaiganakerimera Jeso
(*Ir. 9.57-62*)

¹⁸Antari ineigakerira Jeso yapatoven-taiganakarira tovaini matsigenkaegi ikantaigiri irogamereegi:

—Tsame amonteigaiganakera intati.

¹⁹Impo ikenapaake gotagantirorira itsirinkakotanakerira Moiseshi ikantiri Jeso:

—Gotagantatsirira, nokogake nonkantanira nogiavagetakempi.

²⁰Ikanti Jeso:

—Yogari etini aityo ikiantarira. Ario ikañoigaka tsimeripage irirori aityo imagantaigarira, kantankicha yogari Kañotasanotakaririra Matsigenka teratyoti ontime ivanko irimagantakemparira.

²¹Impogini inianake paniro irogamere ikanti:

—Notinkami, nokogavetaka nogiatanakupimera, kantankicha aiñokyatari apa gatata nopoki. Antari inkamanaera nonkitatanaerira, ario pinkante nompokake nonkantanira nogiavagetanakupempi.

²²Ikanti Jeso:

—Givagetenatyoti maika. Yogari igamagapage kantetyoti inkitaigaerira terira inkematsaigeri Tasorintsi.

Okematsatakerira Jeso tampia ontiri inkaare
(*Mr. 4.35-41; Ir. 8.22-25*)

²³Impo yomatetanaka Jeso pitotsiku itentaiganaari irogamereegi iriaigaera intati. ²⁴Osamanitanakera otampiamatanaketyoti omaranerikatetyoti tampia kara jiriririri ogatyoti okenake ovoresekantanake inkaare osagusagutanakerotyoti pitotsi. Yogari Jeso magasevagetake.

²⁵Itsarogaiganake irogamereegi
yogireaugutarityo ikantaigiri:
—iNotinkamii, tainakario atake
atsitigakoiganake!

²⁶Irorori ikantaigiri:

—¿Antari gara pitsarogaigi? iTekya
pogotasanoigero yagaveavagetira
Tasorintsi!

Itinaamatanakatyo inianakerora
tampia ikantiro:

—iPeganaempa, intaga pitampiati!

Iniuro aikiro inkaare ikantiro:

—iMaireatanae!

Ogatyo okenake opeganaa tampia, ario
okañotaka inkaare irorori omaireatanai.

²⁷Iriroegi yogavageiganaketyo kavako
ikantaiganakera:

—¿Tyanimpatyora yoga, nerotyó
okematsagematanakerira tampia irorori
ontiri inkaare?

**Jeso yoneaganontaigaarira
itimaguigakerira kamagarinipage**
(Mr. 5.1-20; Ir. 8.26-39)

²⁸Antari yogonketapaakara Jeso intati
Gararaku ikenai gapaake piteni
matsigenka itimaguigakerira kamaga-
rini. Iriroegi onti iponiaigapaaka
imperitanakiku yogantaganirira
igamaga. Isurarivagegiratyó kara
ipinkasanovageigunkani, teratyó tyani
kenantumatemparone avotsi atacharira
inaigakera. ²⁹Impo ineaigavakerira Jeso
ikaemavaitanake ikantaigiri:

—iEeee! iJeso, Itomi Tasorintsi,
arionena gara tyara pikantaigana! ¿Iroro
pipokashitake pantsipereakagaigakenara
maika tekyan kara agumatempa
nantsipereantaigakemparira?

³⁰Ario inaigake kara shintori isekatava-
geigakara itovaigavagetiratyo kara.

³¹Impogini yogari kamagarini timaguiga-
keririra inianiaiganakeri Jeso ikantaigiri:

—Poneagaigakenarika onti pintigan-
kaigakena nontimaguigakerira shintori.

³²Ikanti Jeso:

—Nanityo piaige.

Igenanekyatyo ikonteigapanuti
iokaiganairi itimaguigavetakarira
irirokya iatashiigavetaka shintori. Iroro
itimaguigavetapaakarira ogatyó
ikenai gake ishigaiganaka otseraaku
yanonkaiganaka iokaavioigaka pokorom
pokorom pokorom, ipogereagakatyo
maganiro. ³³Iroro ineaigavakerira
sentaigiririra itsarogavageiganaketyo
kara ishigaiganaka iaigai itimaigira
ikamantageigapaakeri itovaireegi
iokajaigakara shintori. Aikiro ikaman-
taigapaakeri tyara ikantaiganaka
itimaguigavetakarira kamagarinipage.

³⁴Ikemaigutatyo iriroegi iaigake anta
inakera Jeso ikantaigapaakeri:

—Nokogaigavetaka piataera parikoti.

Jeso yoganuitairira shinkogisenari
(Mr. 2.1-12; Ir. 5.17-26)

9¹Impogini yomatetanaa Jeso
pitotsiku imonteanaa iataira
itimira. ²Impo ipokaigapaake pashini
matsigenkaegi ikompitakoigapaakeri
paniro shinkogisenari yamaiganakene-
rira irovegaerira. Antari ineaigakerira
Jeso arisano opaitaka yogoigakera
iragaveakera irovegaerira ikantantakari-
rira shinkogisenari:

—Notomi, shinetanakempa. Maikari
mataka omagisantaagani magatiro
povetsikagetakerira terira onkametite,
garatyó ikenkiagaimpiro Tasorintsi.

³Ario inaigake kara gotagantaigirorira
itsirinkakotanakerira Moiseshi. Ikemai-
gavakerira ikantakera maika, iniasuren-
tavageiganaka ikantaigi: “Antari gara
ikañota maika, onti ikañotagumanatana-
kari Tasorintsi.” ⁴Kantankicha Jeso
yogoigavakerityo iniasurentaigakara
ikantaigutarityo:

—¿Tyara pikantaigakara piniasuren-
taigakara pikañoigakerora maika?

⁵¿Tyatimpatyo pairo avisake okomutakara? ¿Irororika nonkantakerira: 'Maikari mataka omagisantaagani magatiro povetsikagetakerira terira onkametite, garatyo ikenkiagaimpiro Tasorintsi', ontirika nonkantakerira: 'Tinaanake nuitanake'? ⁶Maika noneakagaigakempi yagaveake Kañotasantakaririra Matsigenka imagisanta-koigaerira matsigenkaegi magatiro terira onkametite yovetsikagegirira.

Impo ovashi ishonkatetanakari shinkogisenari ikantiri:

—Tinaanake, ganaero pinoriantakarira, piatae pivankoku.

⁷Ogatyo ikenake itinaanaka iatai ivankoku. ⁸Antari ineaigavairira maganiro patoitaigankicharira itsarogavageiganaketyo ovashi ishineventaiganakari Tasorintsi ineaigakera onti yagaveakagaigakeri matsigenkaegi irovetsikaigakera posante terira oneimagetenkani.

Jeso ikantakerira Mateo irogiatanakerira
(*Mr. 2.13-17; Ir. 5.27-32*)

⁹Impogini iatake Jeso ikenanakera kara inepaakeri paniro surari ipaita Mateo. Irorori onti ipirinitake anta pankotsiku itimashiigavakerira visapiniigatsirira ikogantaigavakarira koriki maganiro maiganankitsirira iarakipage ontirika tatapagerika oita, intitari kogantiniririra koveenkari koriki. Impo yogari Jeso ikantapaakeri: —Tsame, pogiatanakenara.

Irorori ikaviritapanuta iatanake yogiatanakerira.

¹⁰Impogini Jeso iatake ivankoku isekatavagetakara itentaigakari irogamereegi intiegiri aikiro pashini kogantaigaririra itovaireegi koriki irashi koveenkari intiegiri aikiro pashini kañovageigacharira. ¹¹Yogari pariseoegi ineaigakerira Jeso itentaigakarira isekataigakara ikantaigiri irogamereegi:

—¿Tyara ikantakara yoga gotagaigimpirira isekatakovageigakarira kogantainiririra koveenkari koriki intiegiri aikiro pashini kañovageigacharira?

¹²Antari ikemavakera Jeso ikantaigiri:

—Yogari terira imantsigaige tera inkogakoigempari gavintantatsirira. Intagani kogakoigari mantsigaigankitsirira. ¹³Piaigae pisuretakoigakemparora pogoigakeroniri ikantakerira Tasorintsi ikantakera: 'Pairo avisake nokogakera pintsarogakagantaigakempara, avisakero povetisaigakenarira piratsipage pintagaigakenarira.' Teranika iriro nompokashiige terira inkañovageigempa nonkantaigakerira inkantatigaiganakempara, intityo nopokashiigake kañovageigacharira kameti inkantatigaiganakempara irapakuaiganakerora yovetsikageigakera terira onkametite.

Tyara okantaka tera irapakuapiniige irogamereegi Jeso gara isekataiga
(*Mr. 2.18-22; Ir. 5.33-39*)

¹⁴Impo ipokaigapaake irogamereegi Joan Giviantantatsirira ikantaigapaakeri Jeso:

—Naroegi intiegiri pariseoegi napakuapiniigi tera nosekataigempa, kantankicha yogari pogamereegi tera ario inkañoi-gempa maika. ¿Tyara ikantaigakara?

¹⁵Impo irrorori ikantaigiri:

—Pine intimera pashini icyarira gankitsi itsinanetsite inkaemaigakeri iamigoegite isekataigakemparira, ¿matsi gara isekataiga? Isekataigakempaniro, itentaigakaritari kaemaigacharirira ishinevageigaka. Kantankicha antari aganakempara inkisakenkanira iramanakenkanira parikoti ario pinkante impitashiigakemparotyogapage gara isekataigaa, inkenkisu-reakoiganakemparitari.

¹⁶“Tera onkametite pinkematsatagarantaigerora yogotagaigakempirira

pariseoegi irokoya pimaigavake nogotagaigakempirira naro. Ontinirika-tyo okañotakaro onkotatenkanira kamisa ogantagarira onkotatantakenkanira okyamagokyarira. Onkivavetanakempa oga onkenake ontsiomagotanakempa ariompa ontisaraanakerori. ¹⁷Aikiro ontinirikatyo okañotakaro ompiaatenkanira vino okyaakyarira tekyarira ompoite ompiaatantenkanira kaverameshina igantagarira atakerira yaratsimeshinatana-ke. Ompoivetanakempa aravonkanake oga onkenake ontimpoanakeri imeshina ovashi ontisaraanakeri osanakempa vino, aikiro iraparatakempa imeshina irisaraa-nakera. Nerotyو pairo okametitake ompiaatantenkanira ikyameshinakyarira kameti ganiri aparata vino, aikiro ganiri yaparata imeshina.”

Jeso yoganiarora irishinto Jairo

(*Mr. 5.21-43; Ir. 8.40-56*)

¹⁸Aiñokyarira iniavageti Jeso ikenapaake paniro itinkamiegi jorioegi ipaita Jairo itigeroaventapaakari ikantiri: —Okyaenka kamanankitsi noshinto. Tsame pimpatikaituterora ogitoku anianaeniri.

¹⁹Impo ikaviritanaka Jeso yogiatanakeri ivankoku itentaiganaari irogamereegi.

²⁰Ario onake aikiro kara paniro tsinane mantsigavagetankitsirira oseriintevegetanityo pairani ogatyو onakotanake 12 shiriagarini tera ogote ovegaempara, teranika onkaraagaenika oriraa. Irorori aiñonitanakari okenashitapaakari itishitaku otsagatakotapaakari okaratsaiku imanchaki. ²¹Oniasurenta-vagetakatari inkaara okanti: “Intagati-tyo nontsagavetakemparo imanchaki noveganaempatyو.” ²²Impo ishonkana Jeso ineiro aratinkake ikantiro:

—Noshinto, shinetanakempa. Maika pogotaketari nagaveakera novegaem-pira, nerotyو povegantaarira.

Ovashi ovegasanovagetanaa. ²³Impo iroro yogonketapaakara ivankoku Jairo ineigapaakeri kovuvageigatsirira kovuigamatake. Yogari iragatsikaigari-rira igamaga iragaigamatataka kaemavai-mataketyo kara. ²⁴Ikantaigapaakeri:

—Atsi mereiganake konteiganake. Tera ario onkame, onti omagake.

Ogatyو ikenai-gake ikavakavaimatana-ketyo ikaavintsanaiganakerira. ²⁵Iroro yogikonteigakerira ikianake tsompogi ikatsavakotapaakero. Ogatyو okenake otinaanaa okaviritanaa. ²⁶Impo ovashi maganiro timageigatsirira kara parikoti-pageku ikemakoigakeri yoganiarora irishinto Jairo.

Jeso ineakagairira piteni terira ineai-g

²⁷Impogini iatanaira Jeso yogiaigana-keri piteni terira ineai-g ikaemakonai-gavakeri ikantaigiri:

—iViرو, Iyashikitanakerira Iravi, tsarogakagavageigenakario!

²⁸Impo yogonketapaakara Jeso pankotsiku ikiapaake tsompogi. Yogaegiri terira ineai-g gaigapaakeririra yaiñonii-gapaakari. Inianake Jeso ikantaigiri:

—¿Tyara pinkantaige viroegi?
¿Nagaveake noneakagaigakempira?

Iniaiganake iriroegi ikantaigiri:

—Jeeje, Notinkami, pagaveakeniroro.

²⁹Impo itsagaigakeri irokiku ikantaigiri: —Iroroventi pogoigaketari nagaveakera noneakagaigakempira, maika neaigakevi.

³⁰Ogatyو ikenai-gake ineiganake.

Impo Jeso ikantaviigavakeri ikantaigiri: —Arisanora tsikyanira pikamantantai-girokari.

³¹Kantankicha teratyو inkematsaigeri. Irorotyو iaigaira ikamantantageiganakero tyara ikantaigakeri Jeso ineakagaigakerira.

Jeso iniakagakerira terira irinie

³²Choeni osamanitanake ikenai-ga-paake pashini yamaigapaakeneri terira

irinie, itimagutakeritari kamagarini.

³³Iroroty yoneaganontaarira Jeso ogatyto ikenake inianai. Yogavageigana-ketyo kavako maganiro ikantaiganakera: —iTeratyto oneimagetenkani kañopa-gerira oka!

³⁴Kantankicha yogaegiri pariseoegi ikantaiganaketyo:

—Irirori arisano yagavei yoneagageta-rira kamagarinipage timagugeigakeri-rira matsigenka, intitari gaveakagakeri itinkami kamagarinipage.

Jeso itsarogakagaigakari maganiro

³⁵Impogini iatake Jeso ikenanake kara itsotenganakero apatogetakara pankotsi-page yogotagantagematanake pankotsipa-geku yapatoitantaigarira jorioegi ikaman-taigakerira maganiro tyara inkantaiga-kempa kameti irogavisaakoigakeriniri Tasorintsi impegakempara Igoveenkarie-gite. Aikiro yovegagematityo tovaini oposantetashigeigakarira mantsigarintsipage, tenigetyo tyara inkatsitumageigae paa vegasanovageigaa. ³⁶Antari ineaiga-kerira maganiro yapatoventaigapaakarira itsarogakagaiganakarityo kara ineaigake-ritari yatsipereavageigakera posantepage ikenkisureavageigakara, onti ikañoigakari ovisha terira intime sentiririra.ⁿ

³⁷Impogini ikantaigiri irogamereegi:

—Nonkantasanoigakempi aiño tovaini kogakoigankicharira irogoigakera tyara inkantaigakempa kameti irogavisaakoi-gakeriniri Tasorintsi impegakempara Igoveenkariegite, kantankicha tesakona intovaiqe gotagaigakerineririra. Onti ikañoigakaro osampatira turigoki ogatuitakoni tesakonara intovaiqe gaigakeronerira. ³⁸Irorotari maika nonkantaigakempi piniaigakerira Tasorintsi pinkantaigakerira intigankai-gakera gotagaigakerineririra.

Jeso yagaveakagaigakerira irogamereegi
(Mr. 3.13-19; Ir. 6.12-16)

10 ¹Impo iroro yagatanakera Jeso iniavagetakera ikaemaigakeri irogamereegi naigatsirira 12 ovashi yagaveakagaigakeri ironeaganontaiga-kemparira itimaguigakerira kamagarini-page, aikiro irovedageigakerira oposan-tetashigeigakarira mantsigarintsipage. ²Iriroegi onti ikantaigunkani aikiro iritigankaneegi. Onti ipaiigaka:

Sumo, ikantaganirira aikiro Perero;
Anturishi, irirenti Perero;
Santiago intiri Joan, itomiegi Severeo;

³Jeripe,

Varitorome,
Tomashi,
Mateo, kogantiniririra koveenkari
koriki;

Santiago, itomi Arejeo;

Tareo,

⁴Sumo komperagetatsirira, intiri
Jorashi Ishikariote, gakagantakeri-
rira Jeso.

Jeso itigankaigakerira irogamereegi
iriaigakera inkenkitsavageigakera
(Mr. 6.7-13; Ir. 9.1-6)

⁵Impogini itigankaigakeri ikamantai-gavakeri ikanti: “Gara piatimoigiri terira iriroegi jorioegi pogotagaigake-rira. Yogaegiri Samariakunirira garatyto pikamosotumaigiri anta itimageigira.

⁶Intagani piatimoigake maganiro iseraereegi, ontitari ikañoigakari ovisha timpinaigankitsirira. ⁷Maika piaige pinkenkitsatimoigakerira pinkantaigake-rira panikya aganakempa impeganta-kemparira Tasorintsi Igoveenkariegite maganiro kematsaigakerinerira.

⁸Povegaigaerira vesegasenari intiegiri aikiro pashini mantsigaigankitsirira.

Poganiaigaerira kamaigankitsirira, aikiro poneaganontaigakemparira itimaguigakerira kamagarinipage, kantankicha garatyo pikogantaigari. Kañotari naro teratyo nonkogantai-gempi nagaveakagaigakempira, ario pinkañoigake viroegi garatyo pikogantaigari yogaegi tyanirika povegaigaerira.

⁹“Gara pamumaigi koriki. ¹⁰Gara pamaigi pitsagine. Intagatityo pamaiganake pamagotiro pimanchaki pogagui-gakarira, aikiro pisapatote pisapatoigakarira. Gara pamaigi pigotikiiri. Maganirotari piriniventavageigirorira ikogagetirira Tasorintsi kametitaketyo impaigakenkanira iseka.

¹¹“Tyarika kara pogonkeigapaakempa aiñorika negintevageigacharira, iriro pimagimoiganake kigonkero piaiganaera parikoti. ¹²Piaigakerika ivankoku pinkiaigapaakera piniagapaakerira pinkantaigari: ‘Nokogake inkavintsajaigakempira Tasorintsi.’ ¹³Irishineventavakempirika inkemisantaigakempira pinkenkitsatimoigakerira irirokya shineventaigakemparine Tasorintsi inkavintsajaigakerira. Antari garikara ishineventaigavakempi garatyo ishineventaigari Tasorintsi inkavintsajaigakerira, panirotyo inkavintsajaigakempira viroegi. ¹⁴Antari tyarika piaigake kara garikara ishineigavakempi piaigake parikoti, kantankicha oketyo pimpotevonkititasanoiganaemparo kipatsipane pagatikakoigakeririra. ¹⁵Maika onkamantanoigakempi impogini aganamantanoigakempirakempira Tasorintsi pairotyo inkisashii-gakempari yogaegi terira irishineigavakempi avisagetakeroty inkisashiigaemparira timaigavetankicharira pairani Soromaku ontiri Gomoraku.^o

Iratsipereakagaigakenkanira irogamereegi Jeso

¹⁶“iAtsi gaige kavako! Naro nontigan-kaigakempi itimaigira kisantaigatsirira iratsipereakagaigavakempityo kara kañomatata intinirikatyo notigankake ovisha iriatakera yapatotara garirira ovisha. Onti pinkañoigakempari maranke yogovaetira, kantankicha gara pagashitantavageiga, aikiro gara pipugatsatantavageiga onti pinkañoigakempari shiromega. ¹⁷Tsikyanira ikisaigimpikari iramaiganakempira pitinkamiegiku inkisakagantaigakempira impasapasatagantaigakempira pankotsipageku yapatoitantaigarira pitovaireegi. ¹⁸Gara intagati oka. Iramaiganakempityo aikiro koveenkari-pageku inkisakagantaigakempira ovashi pimaiganakeri iriroegi pinkenkitsatimoganakerira intiegiri aikiro maganiro terira iriroegi jorioegi pinkamantakoigakenara naro. ¹⁹Antari iramaiganakempira koveenkari-pageku gara pisureigaroty tyarika pinkantaige. Gara pikantaigi: ‘¿Tyarika nonkantaigari?’, isuretagaigakempitari Tasorintsi kameti pogoigakeniri tyara pinkantaige. ²⁰Gatanika tsikyata piniaigi viroegi, intitari suretagaigakempine Isure Tasorintsi timasurentaigakempinerira.

²¹“Intimaiganake tovaini matsigenkaegi imparantaiganakempari irirentiegi irogakagantaigakerira, pashinikyagakagantaigakerine itomiegi. Ario inkañoigake pashini imparantaiganakempari iriri irogakagantaigakerira. ²²Maganirosanoty inkisaviiganakempiro pikematsaigakenara, kantankicha yogari tyanirika tsipereakotanankichanerira garira yapakuimati ikematsatakenara ovashi inkamanake iriro pinkante

irogavisaakotakenkani. ²³Tyarika kara iratsipereakagaitakempira, piaigakera pishigaiganakera parikoti. Arisanoty nonkantasanoigakempi tekbara pintsotenkaigero magatiro itimaigira iseraeeregi pinkenkitsatimoigakerira, impigaate Kañotasanoitakaririra Matsigenka.

²⁴Yogari yogotagaganirira teratyo iravisumateri gotagiririra. Ario ikañotaka yonampitaganirira teratyo iravisumateri nampitaririra. ²⁵Aikiro yogari yogotagaganirira arioty inkañotakempari gotagiririra. Ario ikañotaka yonampitaganirira arioty inkañotakempari nampitaririra. Kañotari naro Pitinkami akyari ikantaitana Veresevo viromparorokari paio irogagaitakempi.

**Panirosanoty impinkakenkanira
Tasorinti
(Ir. 12.2-7)**

²⁶Irorotari nonkantantaigakempirira gara tyani pipinkumaigi, magatiroteri terira ogotenkani maika impoginityo ogotakenkani. Ario okañotaka magatiro omanagetunkanirira maika impoginityo ogikoneatakenkani. ²⁷Narori maireni nogotagaigakempi, kantankicha viroegikya gitivarokaigakerone pinkamantaigakerira maganiriro. ²⁸Gara pipinkaigiri gaveaigankitsinerira irogamagaigakempira. Iriroegi irogamagaigakempirika intagatitari kamankitsine pivatsa, kantankicha garatyo yagaveimaigi irogamagaigakerora pisure. Inti pimpinkaigake Tasorinti, paniotari ikantara irirori yagaveira inkantakera tyani kamankitsine impo iragaveake intiganakerora isure morekariku. ²⁹¿Matsi tera pineaigiri tsimeripage intagatira ipunata piteni tsimeri pamentyakiniro koriki?, kantankicha teratyo inkamumate paniro terira iriro kogatsine Piri. ³⁰Kañotari pigishiegi akyari yogotiro papeapagetiro. ³¹Irorotari nonkantantai-

gakempirira gara pitsarogaigi, pairotari pavisavageigakeri tsimeripage.

**Terira impashiventagaigempari
Jesokirishito
(Ir. 12.8-9)**

³²Maika nonkantaigakempi tyanirika kantasanoitankitsine ikematsasanoitakenara inkamantaigakerira itovaireegi, arioty nonkañotakempa naro impogini nonkantaketyo: 'Nanti shintari', inkemakenara Apa timatsirira enoku. ³³Kantankicha tyanirika kantankitsine: 'Tera nonkematsateri Jeso, inkante', arioty nonkañotakempa naro impogini nonkantaketyo: 'Tera naro shintemparine', inkemakenara Apa timatsirira enoku.

**Tera iroro iripokashite Jeso
inkantaigakerira maganiriro
irishinevakagaigakempara
(Ir. 12.51-53; 14.26-27)**

³⁴Viroegi pineaigiri irorori nopokashitake irishinevakagaigakempara maganiriro, kantankicha teratyo iroro nompokashite, ontityo nopokashitake onkenantanakemparora inkisavakagaiganakempara,

³⁵'intimaketari surari inkisanakeri iriri. Ario onkañotanakempa tsinane onkisanakero iniro, aikiro gatomintantatsirira onkisanakero ovagirote.

³⁶Yogaegiri garira ikematsaigana inkisashivageiganakemparitari iitaneegi kematsaigakenanerira.'

³⁷'Nonkantaigakempi garatyo nopegumatiri nogamere tyanirika pairorira itasanotakari iriri ontirika iriniriro, narokya ogakona intakena. Aikiro garatyo nopegumatiri nogamere tyanirika pairorira itasanotakari itomi ontirika irishinto, narokya ogakona intakena.

³⁸Ario nonkañotakempa aikiro garatyo nopegumatiri nogamere tyanirika terira

inkoge impirini ventavagetanakerora nokogagetirira naro iratsipereaventavagetakenera. ³⁹Tyanirika tsarogakagacha ikiiro tera inkoge iratsipereaventavagetakenera ikiirotyo kañotagantanankicha, intagatitiri ikogake irovetsikagetakera tatarika ikogagetakerira irirori. Kantankicha yogari pirini ventirorira nokogagetirira naro yatsipereaventakenara, iriro pinkante iriatake itimira Tasorintsi inkantakani intimake.

Tyani inkavintsaake Tasorintsi impogini
(Mr. 9.41)

⁴⁰“Tyanirika gaigavakempine inkematsaigavakempira nanti ikematsatake, ario ikañotaka tyanirika kematsatakenane naro, inti ikematsatake aikiro tigankakenarira. ⁴¹Tyanirika gavakerine kenkitsatakotiririra Tasorintsi inkematsatavakerira ineakera inti tigankakeri Tasorintsi, irirori irishineventakempari impo ovashi ineakotakemparo impakeririra impogini inkañotagakemparira impakerira yoga kenkitsatakotiririra. Ario inkañotagakenkani tyanirika gavakerine negintevagetacharira ineakerira inegintevagetakara, irishineventakempari Tasorintsi inkañotagakemparira yoga negintevagetacharira. ⁴²Ario inkañotakempa aikiro tyanirika kavintsaakerine irapigematsatene terira impaitumatempa ineakerira ikematsatakenara, irishineventakempari Tasorintsi impo ovashi ineakotakemparo impakerira onkatinkatakeririra impogini. Intagatitayo impavetakempari imire irorotakenitoyo.”

Joan itigankaigakerira irogamereegi inkogakotagantaigakiterira Jeso
(Ir. 7.18-35)

11 ¹Impogini yagatanakera Jeso yogotagaigakerira irogamereegi iatanake parikotipage apatogetakara pankotsipage ikenkitsavagetakera, aikiro

yogotagantavagetakera. ²Yogari Joan Giviantantsirira aiñokya yashitakotaka. Impo ikemakotavakerira ikenkitsavagetakera, aikiro yovegagiegakerira tovaini mantsigaigankitsirira, itigankaigake piteni irogamereegi inkogakotagantaigakiterira. Antari yogonkeigapaakara inakera ³ikantaigapaakeri:

—¿Virorika nogiaigakerira ontirika atanatsi nogiaigera pashini iripokakera?

⁴Yogari Jeso ikantagiri:

—Maika piaigae pinkamantaigapaakerira Joan magatiro pineageigutirira ontiri pikemageigutirira. ⁵Yogari terira ineaiagavetempa ineaiaganake. Yogari terira iranuitagantsiigavetempa yanuitagantsiiganake. Ario ikañogaka vesegaigavetankicharira yovegaiganaa. Yogari terira inkemaiagavetempa ikemaiaganake. Aikiro yogari igamagapage yaniaiganai. Intiegiri aikiro terira irashintavageigempa ikenkitsatimoigunkani ikamantaigunkani tyara inkantaigakempa kameti irogavisakoigakenkaniniri. ⁶Irishinevagetakempa tyanirika kantakanirira inkematsatasano-takenara gara yapakuimatana!

⁷Impo iaiganaira iriroegi iniavageta-nake Jeso iniakotakerira Joan ikantagiri maganiro: “¿Tatoita piatashiigakiti anta osarigagitetapaakera? ¿Iriro piatashiigakiti pineaigakitirira matsigenka terira ishintsitashigetero magatiro matavitantagantsi, irorokya ikanti irorokya ikanti? ¿Ario ikañotakaro savoroshi amirora tampia akya otuiti akya otuiti? ⁸¿Ario tatatyo piatashiigakiti? ¿Iriro piatashiigakiti pineaigakitirira matsigenka gagutacharira mechomagori kamisa? Pogoigaketari maganiro gaguigacharira mechomagori kamisa onti ipirinitaigi ivankoku koveenkari. ⁹Iroroventi ¿tatatyo piatashiigakiti? ¿Iriro piatashiigakiti pineaigakitirira kamantantsirira? Jeeje, irironiroro, kantankicha paio

yavisavagetakeri kamantantatsirira,
¹⁰irivotari itsirinkakotunkanirira pairani
 iniakerira Tasorintsi Itomi ikantiri:

‘Notomi, impogini nontigankake
 paniro ivatanakempinerira
 inkantaigakerira itovaireegi inegin-
 tetashiigavakempira.’

¹¹Maika nonkantaigakempi maganirosa-
 notyo matsigenkaegi tera intimumate
 paniro visakerinerira Joan, kantankicha
 tyanirika yogavisaakotake Tasorintsi
 ipegakara Igoveenkarite, irirori
 pinkante yavisakerityo.

¹²“Pairani ikyasanokyara tsititanakero
 Joan ikenkitsavagetanakera ovashi
 maika yogari kisantaigatsirira tera
 inkogaigavetempa inkenkitsatakotaken-
 kanira Tasorintsi tyara ikanta yogavisaa-
 kotantira ipegakara Igoveenkariegite
 maganiro kematsaigiririra, kantankicha
 ariompatyo ishineventasanoiganakarori
 tovaini matsigenkaegi ikematsaigana-
 kera. ¹³Maganivotari kamantantaigatsi-
 rira ikamantakoigakero pairani ovashi
 ikenkitsatanakera Joan. Ario ikañotaka
 Moisheshi irirori itsirinkakotakero.
 Maganiro ikantaigaketari iripokake
 intigankakerira Tasorintsi irogavisaako-
 tantakera ovashi impegakempa Igoveen-
 kariegite maganiro kematsaigakerine-
 rira. ¹⁴Yogari Joan irivotari kamantanta-
 tsirira Eriashi pikemakoigakerira
 iripokakera iivatakerira intigankakerira
 Tasorintsi. Pinkogaigakerika viroegi
 pinkematsaigakenara kematsaigenatyo.
¹⁵Pikemaisaigakenarika maika atsi
 suretasanoigemparotyo nokantaigakem-
 pirira.

¹⁶“¿Tatarikatyo nonkañotagaigakempi
 viroegi? ¿Tata pikañoigaka? Inti pikañoi-
 gaka ananekiegi impitaigera pampatuiku
 imagempivageigakera impo ovashi
 inkisavakagaiganakempa inkantaige:
¹⁷“Nokovutimoigavetakempi teratyo
 pintiontaigempa. Impo nomatikimoiga-

vetakempi matikagantsi kenkisureaenka-
 tavagetakatyo kara teratyo piragai-
 gempa.’ ¹⁸Ariotari pikañoigakari viroegi.
 Ipokavetaka Joan tera isekatavagetempa,
 aikiro tera iroviikumatemparo poiri, onti
 pikantaigakeri itimagutakeri kamagarini.
¹⁹Impo maika ipokavetaka Kañotasanota-
 karirira Matsigenka isekata, aikiro
 yoviika ariokya pikantaigakeri: ‘Pairo
 isekaata aikiro pairo ishinkiseta, aikiro
 inti itsipaiga kañovageigacharira intiegiri
 kogantaiginiririra koveenkari koriki.’
 Kantankicha ogotunkani tyani kematsa-
 tasanotiri Tasorintsi aikiro tyani terira
 inkematsateri, ontitari oneantunkani
 yovetsikagetakerira.”

Jeso ikanomajaigakeri timaigatsirira
Korasunku, Vetsairaku ontiri
Kaperenaoku
(Ir. 10.13-15)

²⁰Impogini Jeso ikanomajaigutarityo
 yovetsikimoigakerira tovai terira
 oneimagetenkani, ineaigakeritari tera
 inkantatigaigempa inkematsaigakerira
 Tasorintsi, ikantaigiri: ²¹“iMaikaniroro
 pantsipereavageigake viroegi timantaiga-
 rorira Korasun! iMaikaniroro pantsipe-
 reavageigake viroegi timantaigarorira
 Vetsaira! Pineavagetakarotyo novetsiki-
 moigavetakempirira, kantankicha teratyo
 pinkogaige pinkantatigaiganakempara
 pampakuaiaganakerora povetsikagegira
 terira onkametite. Yogari pinkante
 timaigavetacharira pairani Tiroku ontiri
 Suronku iriroegimetyo neaigakerome
 inkantatigaiganakempametyo irogagui-
 ganakemparome tontaporokiri, aikiro
 intiaitaiganakempametyo samampopane
 iokotagantaigakempara ikenkisureaiga-
 kara ineaigakera yovetsikagegira terira
 onkametite inkantatigaiganakempara.
²²Kantankicha viroegi aganakempara
 inkisashitantakemparirira Tasorintsi
 maganiro terira inkematsaigeri, pairotyo

irogagaigakempi kara avisavagetakero-tyo inkisashiigakemparira Tirokunirira intiegiri Suronkunirira. ²³Viroegiri timaigatsirira Kaperenaoku paventakova-geigaka. ¿Pineagiri ariori piaigake enoku? ¡Garatyo! Ontityo piaigake morekariku. Ariome ovetsikakenkanime terira oneimagetenkani pairani anta Soromaku onkañotakemparora novetsiki-mogeigakempirira viroegi maika gamerorokari ipogereaiga maganiro, añokyametyo intimantaigemparo maika.^p ²⁴Irorotari nonkantantaigakempirira impogini aganakempara inkisashit-antakempara Tasorintsi, pairoty inkisashitasanoigakempi viroegi avisakero inkisashiigaemparira Soromakunirira.”

**Jeso ikantake
irampishigopireakagaigakemparira
ventaigakaririra
(Ir. 10.21-22)**

²⁵Impogini Jeso inianakeri Tasorintsi ikanti: “Apa, vinti vetsikagetakerorira inkite ontiri kipatsi ontiri aikiro magatiro timantagetarorira. Noshineventakempityo kara, pomanapitsaigakeritari govageigatsirira tera pogotagaigeri tyara pikanta viro. Inti pogotagaigake terira irogoageige. ²⁶Arioniroro okañotaka maika, ariotari pikogakeri viro.”

²⁷Impo ikantaigiri maganiro: “Ipageta-kenaro Apa magatiro, aikiro yagaveaka-gavagetakena posante. Tera tyani gotatsine tyara nokanta. Intagani gotankitsi Apa. Aikiro tera tyani gotatsine tyara ikanta irirori. Intagani naro gotankitsi intiegiri aikiro yogaegi nonkogakagaigakerira nogotagaigake-rira. ²⁸Maganiro viroegi tsipereaiganki-tsirira pipomirintsiigakarora pintsataga-geigakerora magatiro ikogagetirira

Tasorintsi, atsi tainaegi naroku paventai-gakenara nampishigopireakagaigakem-pira. ²⁹Pinkematsaigakenara kameti nogotagaigakempira ovashi pampishigo-pireagakempa pisureku, teranika naro kisantatsirira, aikiro nantitari tsiperea-kovagetacharira tera naventakotuma-tempa. ³⁰Tera onkomutempa pintsata-gaigakerora magatiro nogotagaigakem-pirira, nantitari shintsitagaigakempine nogishineasanoigakempira.”

**Irogamereegi Jeso yagaigakera turigoki
kutagiteriku apishigopireantaganirira
(Mr. 2.23-28; Ir. 6.1-5)**

12 ¹Impogini aganakara kutagiteri apishigopireantaganirira iatake Jeso ikenanake turigoshiku itentaiga-naari irogamereegi. Iriroegi itasegagai-ganake yagaigamatanaketyo turigoki yogaigakarora. ²Iroroty ineaigakerira pariseoegi ikantaigutarityo Jeso:

—¡Atsi gaigeri kavako pogamereegi!
Yagaiganake turigoki maika kutagite-riku apishigopireantaganirira, okantavi-tantaganitari antavagetantenkanira.

³Kantankicha irirori ikantaigiri:

—¿Matsi tera piniavantumaigero viroegi otsirinkakotunkanira yovetsikakerira Iravi pairani? Itaseganake irirori intiegiri itentaigakarira, mamerisanoty tatampatyo irogaigakempa, ⁴impo ikiamatanaketyo ivankoku Tasorintsi yogakarora pan okantavitantaganirira ogenkanira, ontitari irashi Tasorintsi. Intagani gaigaro saseroroteegi, ariotari ikantiri Tasorintsi, kantankicha yogari Iravi yogakaroty, aikiro ipaigakeri itentaigakarira.[¶] ⁵¿Matsi tera piniavantumaigero aikiro itsirinkakotanakerira Moiseshi okantira yogari saseroroteegi tavageigatsirira ivankoku Tasorintsi yantavagetantaigakaro kutagiteri apishigopireantaganirira

kantankicha teratyo iroso irovetsikaige terira onkemetite? ⁶Maikari maika aikiro nonkamantaigakempi aino aka pairorira yavisavagetakero ivanko Tasorintsi.

⁷Viroegi tera pinkemaigavakeronika Itsirinkakagantakerira Tasorintsi kantatsirira: ‘Pairo avisake nokogakera pintsarogakagantaigakempara, avisakero povetisai-gakenarira piratsipage pintagaigakenarira.’ Pinkemaigavakeromera oka gamerorokari pineantavageigi yovetsikaigakera terira onkemetite. ⁸Yogari Kañotasnotakaririra Matsigenka irirotari kantatsirira tyati okantavitantagani antantenkanira kutagiteriku apishigopireantaganirira, aikiro tyati terira onkantavitantenkani.

Jeso yovegairira shinkovakotankicharira
(*Mr. 3.1-6; Ir. 6.6-11*)

⁹Osamanitanakera iatake Jeso pankotsiku yapatoitantaigarira jorioegi ikianake tsompogi. ¹⁰Ario inake kara paniro shinkovakotankicharira. Yogaeigiri kisaigakeririra Jeso ikantaigiri: —¿Kametitake irovegantakenkanira mantsigatankitsirira kutagiteriku apishigopireantaganirira?

¹¹Ontityo ikantaigakeri maika ineaigakera tyarika inkante kameti intsaventaigakerira inkisakagantaigakerira. Kantankicha irirori ikantaigiri:

—Añorika shintacharira irovishate impogini irashiriantanakemparo paniro ovegantara kutagiteriku apishigopireantaganirira, ¿matsi gara iatashitiri inoshikaaterira? ¹²Iriromparorokari matsigenka pairo intsarogakagakenkani, pairotari yavisavagetakeri ovisha. Irorotari maika kametitake onkavitsaantakenkanira kutagiteriku apishigopireantaganirira.

¹³Nerotyo ishonkashitantanakaririra shinkovakotankicharira ikantiri: —Atsi kontsaanake.

Irorotyo yakontsaanakera ogatyo okenake irako paa vegasanovagetaa

kañotasnovagetaatyo apipakotene.

¹⁴Iroso ineaigavakerira pariseoegi yovegairira ikonteigapanuti ovashi isariaiganakari Jeso irogakagantaigakerira.

Isaiashi ikamantakotakeri Jeso pairani

¹⁵Iroso yogotavakera Jeso isariaigakerira irogakagantaigakerira iatake parikoti ovashi yogiaiganakeri tovaini matsigenkaegi. Irirori yovegaeigamatirityo maganiro mantsigaigankitsirira, ¹⁶kantankicha ikantaviigakeri ganiri itsavetantagiri. ¹⁷Antari ikañotakara maika itsatagakero ikantakerira kamantantatsirira Isaiashi pairani itsirinkakotakerora ikantakerira Tasorintsi ikanti:

¹⁸“Neri yoga nomperane nokogakagakerira nontigankakerira.

Notasanovagetakari, aikiro noshineventakari.

Nontigankimotakeri nosure intima-surentakerira.

Irirori inkamantaigakeri maganiro matsigenkaegi tyati kametiripage, aikiro tyati terira onkemetite.

¹⁹Gara ikisantumati, aikiro garatyo ikakitsatantumati irogemisantantakera.

²⁰Garatyo ikisumaigiri tyanirika tesakonarira ishintsitashiigero terira onkemetite.

Inkantakani inkavitsajaiigakeri maganiro

kigonkero aganakempara impegakempara Igoveenkariegite maganiro matsigenkaegi.

²¹Maganiro matsigenkaegi timageigatsirira aka kipatsiku iraventaigakemparityo.”

Ikantunkanira Jeso inti tinkamitakari kamagarini

(*Mr. 3.20-30; Ir. 11.14-23; 12.10*)

²²Impogini yamaiganakeneri Jeso paniro matsigenka terira inee, aikiro

tera irinie, itimagutakeritari kamagarini. Impo irirori ineakagairi, aikiro iniakagairi. ²³Yogaveigaketyo kavako maganiro ikantaigi: “Irirorakarityo Iyashikitanakerira Iravi agiaigakerira.”

²⁴Iroto ikemaigakerira pariseoegi ikantaigakera, iriroegi ikantaigi: “Inti tinkamitakari Veresevo itinkami kamagarinipage. Irirotari gaveakagakeri yoneaganontantaigakaririra itimaguigakerira kamagarinipage.”

²⁵Kantankicha irirori yogotavakerotyo isureigakarira ikantaigiri: “Pine intimera matsigenka irapatoitakeri itovaire imegakempara itinkami impo intsitiiganakerorika inkisavakagaiganakempara ovashi irashirikovakagaiganakempara iokaiganakeri itinkami panivani irinae, mameri tyanimpatyo iromperataempa. Ario ikañoigaka tentaigaririra iitaneegi ikiirora parantavakagaiganaachane inkisavakagaiganakempara oga inkenai-gake irashirikovakagaiganakempara ganige itspavakagaigaa. ²⁶Ario ikañotaka Satanashi irirori, ¿matsi tyara inkantakempara ikiirora neagaachane? Inkañotakemparika maika ikiirora parantaachane, ¿matsi iragaveake atanatsira imeganakempara itinkamiegi maganiro kamagarinipage? ²⁷Viroegi onti pikantaigake inti tinkamitakena Veresevo nagaveantakaririra noneaganontantaigakaririra itimaguigakerira kamagarinipage. Iriromera gaveakagakenane kamagarini, ¿ario tyaniratyo gaveakagaigakerira pitovaireegi yoneaganontantaigakaririra itimaguigakerira kamagarini? Irorotari ogotantunkani onti pikomuigakaro viroegi. ²⁸Kantankicha intityo gaveakagakena Isure Tasorintsi noneaganontantaigakaririra itimaguigakerira kamagarinipage, iroro pogotantagavakempara atake yogikoneatimoigana-kempi Tasorintsi iragaveane.

²⁹“Maika nokogake nonkantaigakempira: ¿Tyara inkantakenkani inkiashita-

kenkanira pairorira isurariti inkoshigetakenkanira garira oketyo yogusotagani? Antari oketyorika irogusotakenkani ario pinkante inkoshiantakenkani.

³⁰“Maganiro terira irishinetena onti ikisashitakena, aikiro yogari terira intentena napatotantakera onti itivarokantake.

³¹“Nonkamatasanoigakempi maika tatarika irovetsikaigake matsigenka terira onkamekite ontrika isamatsanaigakeri Tasorintsi, irirori iragaveaketyo imagisantakoigaerira garatyo ikenkiimatairo, kantankicha yogari neavetakemparonerira iragaveane Isure Tasorintsi impo inkantake intityo gaveankitsi kamagarini, garatyo imagisantakotumatiri. ³²Ario okañotaka aikiro tyanirika samatsanatakerine Kañotasantakaririra Matsigenka iragaveake Tasorintsi imagisantakotae-rira, kantankicha tyanirika samatsanatakerine Isure Tasorintsi, iriro pinkante garatyo imagisantakotumatairi.

**Tatoita ogotantunkani
tyara ikanta matsigenka**

(Ir. 6.43-45)

³³“Yogari matsigenka onti ineantunkani yovetsikagetirira ovashi yogotunkani tyara ikanta. Yogari terira inkamekite onti yovetsikagetake terira onkamekite. Yogari kametiri omirinka onti yovetsikagetake kametiripage.

³⁴iViroegi apaiventavaveigakempi kañoavetagentsi! ¿Tyara pinkantaigakempara povetsikaigakera kametiripage?, vintiegitari kañoaveigacharira. Magatirotari osuretakitunkanirira irorotari oniakotunkani. ³⁵Ario ikañota matsigenka negintevagetacharira onti iniakogeti kametiripage, irorotari isuretakogeta. Yogari terira inegintevagetempara onti iniagisevagegi posante, irorotari isuretakogeta irirori. Magatirotari osuretakitunkanirira irorotari

oniakogetunkani. ³⁶Naro kantaigakempine antari aganakempara inkisashitan-taigakenkanirira kañovageigacharira inkenkiakagaigakenkani magatiro iniagisevageigakerira kogapage.

³⁷Tatarika piniavageti irorotari inkantaviigakempi Tasorintsi kametitakevirika ontirika tera pinkamete. Pinegintetakerorika piniane irishineventakempi. Antari piniagisevagetakerika ineakempi tera pinkamete, inkisashitakempi intigankakempi morekariku.”

**Kañovageigacharira ikantaigavetakarira
Jeso ineakagaigakerira terira
oneimagetenkani
(Mr. 8.12; Ir. 11.29-32)**

³⁸Impogini ipokashiigapaakeri Jeso pariseoegi intiegiri gotagantaigirorira itsirinkakotanakerira Moiseshi ikantaigiri: —Gotagantatsirira, atsi okotagaigena-nityo terira oneimagetenkani.

³⁹Ikantaigiri Jeso:
—Viroegi apaiventavageigakempi kañovagetagantsi, pikogantaigavetakarira noneakagaigakempira terira oneimage-tenkani, kantankicha garatyo noneakagu-maigimpi. Intagatityo noneakagaiga-kempi pashini onkañotakemparo ikañota-gunkanira kamantantatsirira Jonashi pairani.⁷ ⁴⁰Pikemakoigakeritari irirori inigakerira omani imaranesanorikatyo kara impo yomavatakotanakara kutagiteri anta isegutoku. Ario inkañota-kempa impogini Kañotasannotakaririra Matsigenka iromavatakotanakempa kutagiteri anta kipatsiku. ⁴¹Impogini aganakempara inkisashiigakempirira Tasorintsi maganiro terira inkematsaigeri inkantake yogari timaigavetacharira pairani Niniveku pairoty yavisaiga-kempi viroegi, maganirotari Ninivekuni-rira ikematsaigakeri Jonashi ikenkitsati-

moigakerira ikenkisureaiganaka ineai-gaketari yovetsikagisevageigira terira onkamete ovashi ikantatigaiganaka. Kantankicha maika ipokavetaka pairorira yavisavagetakeri Jonashi teratyo pinkematsaigeri. ⁴²Ario onkañotakempa aikiro impogini inkantake Tasorintsi ogari igoveenkariegite Savakunirira pairoty avisaigakempi viroegi, opokashi-takeritari Saromon pairani oponiavageta-katyo samani kara onkemisantakerira irogotagagetakerora,⁸ kantankicha maika ipokavetaka pairorira yavisavagetakeri Saromon teratyo pinkematsaigeri.

**Kamagarini ipigashitarira itimaguvetarira
(Ir. 11.24-26)**

⁴³“Antari itimagutirira matsigenka kamagarini impo iokanairi iatake anta osarigagitetapaakera yanuiavetakera. Impo ikogavetaka irapishigopireavageta-kempamera, kantankicha teratyo iragavee ovashi ⁴⁴isurematanaatyo ikanti: Irirompa-tyo nompigashitanae notimaguvetarira.⁷ Impo ipigavetaa ineapaakeri giakomatak-tyo kañomataka pankotsi otarogaganira onegintetaganira saagitemataketyo kara mameritari timanteparonerira. ⁴⁵Ovashi iatake yagakitira pashini 7 kamagarini pairorira yogagavageigaka. Impo itimagui-gapaakeri yoga itimaguvetarira okyara ovashi irirori oga ikenake pairoty yogavavetanaka. Ario pinkañoigake viroegi apaiventavageigakarira kañovage-tagantsi ariompatyo pogavavageiganakem-para, tera pinkematsaigenika.”

**Tyani impegaigake Jeso iitaneegi
(Mr. 3.31-35; Ir. 8.19-21)**

⁴⁶Aiñokyara ikenkitsavageti Jeso opokapaake iriniro intiegiri irirentiegi ikogaigavetaka iriniaigakerira, kantan-kicha tyampa inkenaigake, itikaigakeri-

tari maganiro patoitaigankicharira neroty ointi inaigapaake sotsi. ⁴⁷Impo ikamantunkani Jeso ikantagani:

—Pokake piniro intiegiri pirementiegi año inaigake kara sotsi ikogaigake iriniaigakempira.

⁴⁸Kantankicha irirori ikantiri kaman-takeririra:

—¿Tyanimpatyora ina? ¿Tyanimpa-tyora igeegi?

⁴⁹Impo ishonkateiganakari irogame-reegi ikoigakeri ikanti:

—Neri yogaegi nopegaigakerira ina aikiro igeegi. ⁵⁰Imirinkatari tsatagagerorira ikogagetirira Apa timatsirira enoku irirotyo nopegake ige ontiri incho ontiri aikiro ina.

**Jeso ikantakotakerora okenkitsataganira
Iriniane Tasorintsi**
(*Mr. 4.1-9; Ir. 8.4-8*)

13 ¹Impogini ikontetanai Jeso iatake otsapiaku inkaare ipirini-tapaake. ²Yapatovageiganakatyo tovaini matsigenkaegi inakera irirori, ovashi yomatetanaka pitotsiku ipirinitake ikenkitsaigakerira. Maganiro patoitaigankicharira ipitaigake otsapiaku.

³Impo yogotagaigakeri ikantakogetake-rora posante ikantaigiri: “Iatake paniro matsigenka impankivagetakera turigoki.

⁴Iokagisetanakero pakarara pakarara itsotenkavagetanakero. Okonogagaran-taka oparigigetanake avotsiku, impo iparigashiigakero tsimeri yogaigakarora.

⁵Pashinikya onti oparigigetanake mapuseku, shinti oshivokavetanaka, tesakonatari ontimasanotenika kipatsi.

⁶Impogini iporeavetanaka poreatsiri itaganakero oshigirikanake okamanake, tetanika oatasanote oshitsaki savi, otikakerotari mapu. ⁷Okonogaka pashini oparigigetanake okitagigetakara okitsoki tovaseri timatsirira otsei. Impo oshivokavetanaka turigo ogenaneyaty oshivoku-

tanaka tovaseri irorori asaganakero okamanai, tera ontime okitsoki. ⁸Pashini okonogaka oparigigetanake okametipa-tsatakera kipatsi. Irorori pinkante oshivokanake okimotanake otimanake tovaiti okitsoki, okonogaka otimake 100, pashini 60, pashini otimake 30. ⁹Pikemaigakenarika maika atsi suretasanoigemparoty nokantaigakempirira.”

**Jeso yogotagaigakeria
irogamereegi tyara okantaka
ikantakogetakerora magatiro**
(*Mr. 4.10-12; Ir. 8.9-10*)

¹⁰Impogini yogaegiri irogamereegi yaiñoniiganakari ikantaigiri:

—Antari pogotagaigakerira maganiro matsigenkaegi, ¿tyara okantakara pikañotakerora maika pikantakogetake-rora magatiro?

¹¹Irirori ikantaigiri:

—Pairani tera ogovetenkani tyara inkantaigakeri Tasorintsi matsigenkaegi irogavisaakoigakerira kameti imegakempara Igoveenkariegite. Maikari maika ikogake pogoigakerora viroegi, kantankicha iriroegi gara yogoigiro.

¹²Nonkantasanoigakempi maika tyanirika kogankitsinerira inkemavake-rora Iriniane Tasorintsi ariompaty o irogotasnovagetanakeri, kantankicha yogari terira inkoge inkemavakerora ontityo onkomutapitsatakempari, garatyo yogotumageti maani. ¹³Irorotari nokañotantaigakaririra maika. Iriroegi otimaigavetaka iroki, kantankicha kañomataka tenirikatyo ontime. Aikiro otimaigavetaka igempita kantankicha kañomataka tenirikatyo ontime, tera inkemaigavakeronika nokantaigakeririra. ¹⁴Okañotaka maika otsataganakero ikantakerira Isaiashi pairani ikanti:

“Viroegi pinkemaigavetakempaty, kantankicha garatyo pikemu-gavakero.

Aikiro pineaigavetakempatyo,
kantankicha garatyo pogotu-
maigavakero.

¹⁵Tera pinkogaigenika pogoigakera,
kañoigamatakavi tenirikatyo
ontimaige pisure.

Tera pinkemaige, kañomataka
tenirikatyo ovegantaigempa
pigempita.

Aikiro tera pineaige, kañoigamata-
kavi tenirikatyo pogaige kavako.

Onti pikañoigaka maika ganiri
pineantaigaro poki, aikiro ganiri
pikemantaigaro pigempita,
aikiro ganiri pikemumaigi maani.

Tera pinkogaigenika pinkematsata-
sanoigakenara

kameti nogavisaakoigakempiniri.’

¹⁶“Kantankicha viroegi paio ikavintsaa-
vageigakempi Tasorintsi pineantaigakar-
rira magatiro pineageigakerira maika,
aikiro pikemaigakena nogotagaigakempi-
rira. ¹⁷Arisanoty nonkantanoigakempi
maika itimaigavetaka tovaini kamantan-
taigatsirira intiegiri negintevageigacharira
ikogaigavetaka ineaigakeromera pineaiga-
nakerira viroegi maika, kantankicha
teratyo ineimaigero. Aikiro ikogaigave-
taka inkemaigakeromera pikemaigakerira,
kantankicha teratyo inkemumaigero.

**Jeso ikamantaigakerira irogamereegi
ikantakotakerira inkaara**
(*Mr. 4.13-20; Ir. 8.11-15*)

¹⁸“Maika atsi kemisantaigena
nonkamantaigakempira tatoita nokanta-
kotake inkaara. ¹⁹Ogari turigoki parigige-
tankitsirira avotsiku inti nokantakoigake
matsigenkaegi kemisantaigavetakarorira
Iriniane Tasorintsi okenkitsatunkanira.
Ikamantaigavetunkani tyara inkantaiga-
kempa kameti irogavisaakoigakerira
Tasorintsi imegakempara Igoveenkarie-
gite, kantankicha igenanekyatyo
ipokashiigakeri kamagarini imagisantaka-

gaigakeri magatiro. ²⁰Ogari parigigetankitsirira mapuseku inti nokantakoigake kemisantaigavetakarorira Iriniane Tasorintsi ishineventaigavetakaroro, kantankicha tera inkematsatasanoigero, ²¹neroty imagisantaiganairo shintsi. Impogini opokashitakeri tsipereagantsi ontirika ikisaviigunkani Iriniane Tasorintsi oga ikenaiigake yapakuaiganairo ikañoiganaara okyara tekyara inkematsatumaige. ²²Ogari parigigetankitsirira okitagigetakara okitsoki tovaseri inti nokantakoigake kemisantaigakerorira Iriniane Tasorintsi ikemaigavetakaroro, kantankicha impogini irorokya imaigavai isureigavaarora magatiropage timagetsirira kipatsiku. Impo iiroegi tenige isuretakoigaemparo Iriniane Tasorintsi, ontitari isureiganaka irashintvioigakempara koriki. Tyampa inkantaigakempa inkematsatasanoigakera. ²³Kantankicha ogari parigigetankitsirira okametipatsakera kipatsi inti nokantakoigake kemisantaigavakerorira Iriniane Tasorintsi impo ikematsatasanoigakeri irirori. Ovashi itimaigake kameti ikañoigakaro turigo timankitsirira okitsoki 100, pashini ikañoigakaro timankitsirira 60, pashini kya ikañoigakaro timankitsirira 30.”

**Jeso ikantakotakerora imegakempara
Tasorintsi Igoveenkariegite
kematsaigiririra ikañotagakaro turigo
ontiri tovaseri**

²⁴Impo ikanti Jeso: “Maika irorokya nonkantakotake tyara onkantanakempa impogini irapatoitaigakerira Tasorintsi maganiro kematsaigiririra imegakempara Igoveenkariegite. Iatake matsigenka ipankitakera turigoki itsamaireku. ²⁵Impogini imagavioiganaira maganiro ipokaninkuti pashini kisakeririra ipankitanutiro tovaseri shigirorira turigo yapatuinkavagetakeroty kara. ²⁶Impogini oshivokavetanaka turigo ogenanekya-

tyo oshivokutanaka tovaseri irorori otentaganakaro. Antari otimanakera okitsoki turigo oneinkani onti okonogakaro tovaseri. ²⁷Yogari iromperaneegi pankitakerorira ineaigutaroty o ikantaigiri: ‘Kogapage noneaigake onti pipankitake turigokisanorira. ¿Maikari tyaratyo oponiakara tovaseri?’ ²⁸Ikantaigiri irirori: ‘Impa irirorakari kañotakero kisakenarira.’ Iniaiganai iromperaneegi ikantaigiri: ‘¿Atsi noaige nashiaigakiterora?’ ²⁹Ikanti irirori: ‘Gatata, pitentagantaigarokari turigosanorira. ³⁰Arionetata osampatanakera, impogini nontigankaigakeri gaigakeronerira ovashi irashiaigakero tovaseri irogusovatuiigakerora intagaigakerora. Impo irorokya iragaigake turigokisanorira ironaikapiniigakerora pankotsiku ontaikantaganirira turigoki.’”

Jeso ikantakotakerora ipegakara Tasorintsi Igoveenkariegite matsigenkaegi ikañotagakaro okitsoki mosetasa
(*Mr. 4.30-32; Ir. 13.18-19*)

³¹Impo inianai Jeso ikantakotakerora ipegakara Tasorintsi Igoveenkariegite matsigenkaegi ikañotagakaro okitsoki mosetasa ikanti: “Iatake paniro matsigenka ipankitakerora pakitsotiro mosetasa itsamaireku. ³²Irorori pairotyo avisavetaka otsirepekichotakera avisagetakerora pashinipage tsirepekichogetatsirira okitsoki, kantankicha oshivokumatanakera omaranevetanakettyo kara okañotanaaro inchato otsegororoitanake avisagetanakero pashinipage pankirintsi-page impo itimantaigaaro tsimeripage.”

Jeso ikantakotairoa ipegakara Tasorintsi Igoveenkariegite matsigenkaegi ikañotagakaro opeogantarira pan
(*Ir. 13.20-21*)

³³Impo ikantakotairo Jeso ipegakara Tasorintsi Igoveenkariegite matsigenkaegi ikañotagakaro opeogantarira pan

ikanti: “Antari ovetsikira tsinane pan agavatake kimopane turigopane, impo okonogantakaro opeogantarira ogaty okenake opeoganae magapatsatiro.”

Tyara okantaka ikantakogetakerora Jeso magatiro
(*Mr. 4.33-34*)

³⁴Ario ikañoiigakeri Jeso maika maganiryo yogotagaigakerira, onti ikantakogetakero magatiro. Tera irogotagaigeri kogapage, tatarika ikogake irogotagaigakerira ³⁵ont ikañotakero maika ovashi otsataganaka itsirinkakotanakerira kamantantatsirira pairani ikantakera:

“Noniaigerira onti nonkantakogeketake posantepage.

Nonkenkitsatakogetakero posantepage ogantagarira omanakogetunkani pairani okyasanokyara ovetsikunkani kipatsi kigonkero maika.”

Jeso ikamantaigakerira irogamereegi tatoita ikantakotake iniakotakerora tovaseri shigirorira turigo

³⁶Impogini iniaiganairi patoventaigakaririra iatai pankotsiku ikiapaake. Yogari irogamereegi yaiñoniiganakari ikantaigiri: —Nokogaigake pinkamantaigakenara tatoita pikantakotake inkaara piniakotakerora tovaseri shigirorira turigo.

³⁷Ikanti Jeso:

—Yogari pankitakerorira turigoki inti Kañotasanotakaririra Matsigenka. ³⁸Ogari tsamairintsi onti magatiro kipatsi itimantaigarira matsigenkaegi. Ogari turigoki intiegi matsigenkaegi pegaigakeririra Tasorintsi Igoveenkariegite. Ogari tovaseri intiegi yashintaigakarira kamagarini. ³⁹Yogari pankitakerorira tovaseri inti kamagarini. Antari nokantakera agakenkanira turigoki onti nokantakotake ontsontkanaempara kipatsi. Yogaegiri gaigakeronerira intiegi isaankariite

Tasorintsi.⁴⁰ Antari nokantakera ashiakenkanira tovaseri ontagakenkanira, onti nokantakotake tyara onkantana-kempa impogini ontsontakanaempara kipatsi.⁴¹ Antari irapatoitaigakerira Kañotasanoatakarrira Matsigenka maganiro kematsaigiririra impegakempara Igoveenkariegite, intigankaigakeri isaankariite irapatoitaigakerira kañovage-taigakeririra itovaireegi intiegiri aikiro maganiro vetsikagisevageigirorira terira onkametite⁴² iokaigakerira morekariku. Karari kara inkantakani iriragunteigakempa inkaemavaveigaketyo kara iratsikagisevageigakeroty irai.⁴³ Impogini yogaegiri negintevageigacharira iriaigake intimimoigakerira Tasorintsi inkañoiaganakemparrira poreatsiri ishimpo-kirerenkira ikyaenkara kontetapaatsi. Pikemaigakenarika maika atsi suretasa-noigemparoty nokantaigakempirira.

Jeso ikantakotairora ipegakara Tasorintsi Igoveenkariegite matsigenkaegi ikañotagakaro kori yomanunkanirira

⁴⁴“Antari ipegakara Tasorintsi Igoveenkariegite matsigenkaegi onti okañotaka maika: Yomanunkani kori ikitatunkani kipatsiku. Impogini itimake pashini neakeririra, kantankicha akirotyo ikitatanairi. Ishinevagetakatyo kara ipimantagetakero magatiro yashintagetarira yagantakarora koriki ipunaventantakarora oga kipatsi inantakarira.

Jeso ikantakotairora ipegakara Tasorintsi Igoveenkariegite matsigenkaegi ikañotagakaro perera pairorira okametiti

⁴⁵“Antari ipegakara Tasorintsi Igoveenkariegite matsigenkaegi onti okañotaka maika: Iatake paniro pimantavagetatsirira ikogavagetakera perera pairorira okametitanotake.⁴⁶ Impo ineake pakitsotiro pairorira avisavagetake okutamunkarekitasanovagetakera,

opunavagetaratyo kara. Ipimantagetakero magatiro yashintagetarira yagantagetakarora koriki ipunaventantakarora.

Jeso ikantakotairora impegakempara Tasorintsi Igoveenkariegite maganiro kematsaigiririra ikañotagakaro kitsari

⁴⁷“Maika nonkantakotaero tyara onkantanakempa impogini irapatoitaigakerira Tasorintsi maganiro kematsaigiririra impegakempara Igoveenkariegite onti nonkañotagakemparo kitsari okitsataganira oaaku, ishatekanaka shima iposanteitanakatyo kara.⁴⁸ Impo yogaegiri kitsaigankitsirira inoshiatakoigakeri yamakoiganakerira imparagekiku ipirinitaigakera ikogaigakerira shima yogaganirira yoyagaigavakerira kantiriku. Yogari terira irogenkani onti iokajai-gavairi.⁴⁹ Ario onkañotanakempa impogini ontsontakanaempara kipatsi iripokaigake isaankariite Apa Tasorintsi irapatoitaigakerira negintevageigacharira irashirikoi-gakerira maganiro terira inegintevageigempa⁵⁰ iokaigakerira morekariku. Antari anta inkantakani iriraguntevageigana-kempa inkaemavaveigaketyo kara iratsikagisevageiganakeroty irai.”

⁵¹Impogini ikantaigiri:

—¿Pikemaigakena nokantaigakempirira?

Iriroegi ikantaigiri:

—Jeeje, nokemaigake.

⁵²Ikantaigiri:

—Pine intimera shintavagetacharira timankitsirira posantepage iarakipage pairorira okametigetake irompiogetakero ivankoku irovetsikagetakerora. Impo irirori iragaveake inoshikagetakerora tatarika ikogake irororika ogantagarira yashintaro pairani ontirika okyarira yagagetake. Ario ikañoi-gaka maganiro gotasanoigirorira Iriniane Tasorintsi Itsirinkakagantakerira pairani, aikiro yogotagasanoigunkani tyara ikanta

Tasorinti yogavisaakoigirira matsigen-kaegi ipegakara Igoveenkariegite, yagaveasanoigaketari irogotagantaigakerora magatiro Iriniane Tasorinti ogantagarira timankitsi ontiri aikiro okyaenkarira nogotagaigakempi maika.

Yogotagantavetakara Jeso Nasareku

(Mr. 6.1-6; Ir. 4.16-30)

⁵³Impogini yagatanakera Jeso yogotagageigakerira patoventaigakaririra itai itimira. ⁵⁴Yogotagantapaake anta pankotsiku yapatoitantaigarira jorioegi. Yogavageiganaketyo kavako maganiro kemisantaigavakeririra ikantaiganake:

—¿Tyarikatyo kara yogotakerora magatiro oka? ¿Tyarikatyo ikantakara yagaveakera yovetsikagetakerora terira oneimagetenkani? ⁵⁵¿Matsi tera iriro tomintemparine karipintero timatsirira atimaigira? Ogari iriniro ontitari Maria. Yogari irirentiegi iriroegitari Santiago, Jose, Sumo intiri Jorashi. ⁵⁶Ario okañoigaka iritsiroegi iroroegi onti otimaigi aka, aneasanovageigiroitari aroegi. ¿Tyarikatyo yogotakera kara?

⁵⁷Ovashi teratyo inkogaige inkematsaigakerira onti ikisaenkaigakeri ovashi ikantaigakeri irirori:

—Yogari kamantantatsirira tyarika iatake parikoti ishineventavunkani, kantankicha antari inavetaka itimira teratyo irishineventenkani, ontityo ikisaenkatunkani, imaignakatyo iitaneegei iriroegi aikiro tera irishineventaigempari.

⁵⁸Ovashi tesakona irovetsikagete kara terira oneimagetenkani, teranika inkematsatumaigari.

Erorishi isuretakotaarira Joan

Giviantantatsirira

(Mr. 6.14-29; Ir. 9.7-9)

14 ¹Impogini yogari Erorishi neagetakeririra Sesa magatiro Garireaku ikemakotakeri Jeso yovetsika-

getakera terira oneimagetenkani. ²Impo ikantaigakeri inampinaegi ikanti: “Inti nianaatsi Joan Giviantantatsirira nogakagantakerira karanki, nerotyokañaotantakarorira maika yagaveavagetakera yovetsikagetakera terira oneimagetenkani.”

³Antari okyara irirotari Erorishi shitakotagantakeri Joan yogusotagantakerira karenatsaku ineakera ikantavitakerira Eroria yagapitsakerira irirenti paitacharira Jeripe. ⁴Yogari Joan ikantakeritari Erorishi: “Tera onkametite pagapitsakerira itsinanetsite pirenti.” ⁵Irorotari ikogantavetakarira Erorishi irogakagantakerimera, kantankicha ipinkaigairi maganiro timaigatsirira kara, ineigakeritari Joan inti kamantantatsirira.

⁶Kantankicha impogini agamatatyo kutagiteri agakara igutagiterite Erorishi impo irirori ikaemaigakeri iamigoegite isekatimoigakempirira. Impo isekatavageigakera okiapaake oshinto Eroria otosotapaakera oshonkashonkavagetanakatyoka kara. Ishineventamatanakarotyoka Erorishi ⁷ikantiro:

—Maika nonkantakempi arisanotyoka nonpakempiro tatarika pinevitakena, garatyoka namatavitimpi. Namatavitakempirika nonkamaketyo.

⁸Iroro okemakera oatake okantakitorora iniro okantiro:

—Ina, ¿tatarikatyo nonevitakeri?

Irorori okantiro:

—Atsi irorompatyoka pinevitakeri igito Joan Giviantantatsirira.

Ovashi opiganaa okantapaakeri Erorishi:

—Onti nokogake pintogitorenkagagantakerira Joan Giviantantatsirira oyagakenkanira igito peratoka pimpakotakenarora.

⁹Ogatyoka ikenake irirori ikenkisureanaka, kantankicha matakatarika ikantakero, aikiro ikemaigakeritari maganiro

ikaemaigakerira, tyampatyo inkanta-kempa inkantatigaerora ovashi ikanti:
—Iroroventi nanityo.

¹⁰Itigankake soraro inakera Joan yashitakotakara intogitorenkakiterira iramakotakenerora igito. ¹¹Impo yamako-takenero ipakotapaakero, irorokya gishonkakotakenero iniro. ¹²Impogini yogari irogamereegi Joan ipokashiigakeri yamaiganairira ikitaignairira. Impo iaigake ikamantaigakitirira Jeso.

Jeso yogitovaigakerora pan
(*Mr. 6.30-44; Jr. 9.10-17; Jn. 6.1-14*)

¹³Impogini yogari Jeso ikemakotakerira Joan yogakagantunkanira iatake parikoti intagani itentaiganaa irogamereegi onti ikenaiganake pitotsiku, kantankicha ineaigavakerityo timaigatsirira kara yogiaiganakeri yanuiiganake. ¹⁴Impo yogonkeigapaaka yagatakoigapaakera. Iroro yaguivetanakara Jeso ineaigapaakeri patovageigamatakaty matsigenkaegi kara itsarogakagaiganakari maganiro. Yovegaigakeri maganiro mantsigaigankitsirira. ¹⁵Impo inanaira poreatsiri shavini yogari irogamereegi ikantaigiri:
—Atake ishavitana poreatsiri. Akari aka tera tyani timatsine. Atsi pakuaigaeri maganiro yogaegi iriaigaera anta otimagetakera pankotsipage kameti impunaventavageigakeniri isekaegi isekataigakempara.

¹⁶Kantankicha Jeso ikantaigiri:
—Garatyo iaigi. Paigerityo viroegi isekataigakempara.

¹⁷Iriroegi ikantaigiri:
—Mameri tatampa nonpaigakeri. Intaganivatisanoty onai 5 pan, yogari shima pitenivani inai.

¹⁸Ikanti Jeso:
—Atsi maigakenaro.

¹⁹Impo ikantaigakeri impirinitaigakera maganiro shimpenashiku. Iriroegi ipirinitaigake impo yogari Jeso inoshika-

kero pan intiri shima yapagotakeri ineventanaka enoku iniakerira Tasorintsi ikantiri: “Apa, noshinevetakaty maika pipakenara nogaigakemparira.” Impo ikotagakero pan ipaigakeri irogamereegi, iriroegikya paigakeri maganiro. Ario ikañotagakari shima irirori. ²⁰Isekataigaka maganiro ikemaiganaka, impo yogari irogamereegi yapatoigairo aityokyarira onai yoyagaigairo tsivetaku shatekapagerikatyo kara onakotake 12. ²¹Maganiro sekataigankicharira ikaravageigaketyo 5,000, kantankicha intagani yogotunkani surariegi antariniegi, tera ogotenkani tsinaneegi intiegiiri ananekiegi.

Yanuiatakerora Jeso enokua nia
(*Mr. 6.45-52; Jn. 6.16-21*)

²²Impogini yogari Jeso ikantaigiri irogamereegi:

—Mateiganaempa pitotsiku piivaiganaera pimonteiganaempara intati. Narori gatata nopoki, tsikyata noneaigavaeri yogaegi iriaigaera.

²³Impo iaiganaira maganiro, irirori iatake otishiku iniakerira Iriri, paniro yapuntanaka. Ipitake anta ovashi ochapintanake. ²⁴Yogari irogamereegi atavageigake nigankia kara. Ogari inkaare ovoresekantamatanaketyo kara osagusagumatana-keroty pitotsi pogn pogn, otampiavaganaketari tampia jiriririri ogipigipitakoigavakerityo. ²⁵Impo osariagitetanaara kutagiteri ipokapaake Jeso yanuiatapaa-kero enokua nia. ²⁶Yogari irogamereegi ineaigurityo itsarogavageigamatanaketyo kara ikaemavaitaigamatanaketyo:

—iInaa, inaa, neri yoga kasuvarerini!

²⁷Iniamatanaketyo Jeso ikantaigiri:
—iNanti! iGara pitsarogaigi, shineiganaempa!

²⁸Iniamatanaketyo Perero ikanti:
—Notinkami, viroatyo, iroroventi kaemenanityo nompokakera kara viroku nanuiatanakerora enokua nia.

²⁹Ikantiri Jeso:

—Tainanityo.

Yaguitanake Perero yanuiavetanaka iriatakemera inakera Jeso. ³⁰Kantankicha ineakerora otampiavagetanakera itsarogamatanaketyo ogatyo ikenake itsitiganake ikaemamatanaketyo:

—iNotinkamii, gavaenaa!

³¹Igenaneyatyo yakontsaanake Jeso inoshiatavairi irakoku ikantiri:

—iTesakona pogote arisano nagaveavageti! ¿Antari gara pitsarogi?

³²Iroto yomateiganaara pitotsiku asatyo opeganaa tampia. ³³Maganiro naigankitsirira pitotsiku itigeroaventai-ganakari Jeso ikantaigiri:

—iArisanoniroro vinti Itomi Tasorintsi!

**Jeso yovegaigakerira
mantsigaigankitsirira Jenesakunirira**
(Mr. 6.53-56)

³⁴Impogini imonteaiganaka intati iaigake Jenesareku. ³⁵Yogaegiri timaiga-tsirira kara ineigavakerira inti Jeso ishigaigamatanakatyo ikamantavakagai-ganakara itsotenkavageiganakerotyoto itimageigira. Yamaigapaakeneri maganiro mantsigaigankitsirira irovegai-gaerira. ³⁶Impo iriroegi ikantaigiri:

—Notinkamii, nokogake nontsagatu-maigakerora okaratsaiku pimanchaki.

Impo maganiro tsagatakoigakeririra yovegaiganaa.

**Jeso yogotagaigakerira irogamereegi
tatoita kitsitinkantatsi**
(Mr. 7.1-23)

15 ¹Impogini ipokaigake pariseoegi intiegiri gotagantaigirorira itsirinkakotanakerira Moisheshi, iponiai-gapaaka Jerosarenku, ikantaigakeri:

²—¿Tyara ikantaigakara pogamereegi tera intsatagaigero magatiro ikantagei-

ganakerira yashikiiganakairira? Pine omirinka isekataigara tera inkivakoi-gempa inkañotagaigakerora ikantaiga-nakerira.

³Yogari Jeso ikantaigiri:

—¿Tyara pikantaigakara viroegi tera iroro pintsatagaige ikantagetakerira Tasorintsi, onti pikogaigake pintsatagai-gakerora ikantaiganakerira yashikiigana-kempirira pairani? ⁴Ikantavetakatari Tasorintsi: ‘Pimpinkatsaigakerira piri ontiri piniro gara pipugatsanaigari.’

Aikiro ikanti: ‘Yogari kisashitakemparine-ririra iriri ontirika iriniro irogakenkani-tyo.’ ⁵Kantankicha viroegi onti pogagai-gakero. Pine maika aiñoegi tomintaiga-charira kogakovageigankicharira ikantaigavetakari itomi intsarogakaga-kemparira impaigakerira ikogakoigaka-rira, kantankicha viroegi onti pikantai-gake kametitake inkantakerira: ‘Gara nagavei nopaigimpira pineviigakenarira, magatirotari nashintagetarira onti nashintakagakari Tasorintsi’, ⁶ovashi gara ipiri. Antari pikañoigakerora maika onti pokaiganakero ikantakerira Tasorintsi, irorokya pipampiatakoiganake ikantagei-gakerira yashikiiganakempirira pairani. ⁷Nokantantaigakempirira onti pikematsa-tamampegaigaka kogapage. Ikantasanota-keniroro kamantantatsirira Isaiashi itsirinkakoiganakempira pairani ikanti:

⁸‘Iriroegi ikantaigavetaka: Tasorintsi inti pairorira ikametivageti, kantankicha ontityo ikantamampe-gaigaka kogapage, teratyoto arisano isuretakoigena.

⁹Aikiro ikantaigavetaka: Tasorintsi inti Atinkamiegi, kantankicha onti yogotagantaigi isureigakarira matsigenkaegi.’

¹⁰Impo ikaemaigakeri maganiro yapatoitaigakeri ikantaigiri:

—Kemisantasanoigena maganiro viroegi pinkemasanoigakenara. ¹¹Ogari ogagetaganirira tera iroro kitsitinkantatsine. Ogari pinkante oniagisevagetaganirira posantepage irorotari kitsitinkantagetatsi.

¹²Impo yagatanakera iniavagetakera yaiñoniiganakari irogamereegi ikantaigiri: —¿Pineaigakeri pariseoegi ikisaiganakara ikemaigakempira pikantaigakerira maika?

¹³⁻¹⁴Ikanti Jeso:

—Arione inkañoigake, magatirotari pankirintsi terira iroro pankiterone Apa timatsirira enoku ashiakenkanityo impogini. Iriroegi ontitari ikañoigari terira inee ikatsavakoiganakerira pashini terira inee. Antari inkañotakemparika maika piteni terira inee inkatsavakagaimpara iranuitaiganakera, pitenirotyo iranonkaiganakempa otseraaku.

¹⁵Iniamatanaketyo Perero ikantiri:

—Atsi kamantaigena tatoita pikantakotake inkaara.

¹⁶Ikanti Jeso:

—iArioratyo pikañoigaka viroegi tera pinkemaige! ¹⁷¿Matsi tera pinkemaigero nokantaigakempirira? Nokanti magatiro ogagetaganirira onti oatake seguton-tsiku, impo oshitakotaagani. ¹⁸Kantankicha magatiro oniagisevagetaganirira onti oponiaka suretsiku, irorotari osuregisevagetantaganirira. Iroro pinkante okitsitinkantiniro suretsiku. ¹⁹Ariotari oponiagetari isureku matsigenka isuregisevageigarira posantepage, yogantaigira, inoshikaigirora tsinaneegi suraritakoigatsirira ontiri terira osuraritakoige, ikoshiigira, yamatavitantaigira, iniashivageigarora kogapage. ²⁰Magatiropage oka oovtsikagisetaganirira iroro pinkante okitsitinkantiniro suretsiku, kantankicha ogari pisekataigempara garira pikivakoiga pinkañoitagaigakerora

ikantaiganakerira yashikiiganakempirira teratyo onkitsitinkante.

Jeso yovegairora oshinto tsinane terira iroro joria

(Mr. 7.24-30)

²¹Impogini iatai Jeso Tiroku ontiri Suronku. ²²Impo okenapaake paniro tsinane kananea okanti:

—iNotinkamii, Iyashikitanakerira Iravi, kavintsaavagetanakario! Aiño noshinto itimagutakero kamagarini atsipereavagetaketyo kara.

²³Kantankicha yogari Jeso teratyo irinie, onti ikemisantanake. Impo yaiñoniiganakari irogamereegi ikantaigakerira:

—Atsi kematsatero kameti oataeniri, onti ogaigapaakai okaemavatapaakera.

²⁴Ikanti Jeso:

—Intagani itigankavitakena Tasorintsi nompokashiigakerira nonkavintsajaigakerira iseraereegi, ontitari ikañoigakari ovisha timpinaigankitsirira.

²⁵Kantankicha irorori ariompatyo aiñonitanakariri otigeroaventanakarira okanti:

—iNotinkamii, kavintsaavagetanakario!

²⁶Kantankicha Jeso ikantiro:

—Tera onkametite iragapitsaigakenkanira iseka ananekiegi impakenkanira otsiti.

²⁷Irorori okanti:

—Notinkami, arisanoniroro pikantasanotakeniroro, kantankicha otsiti ineakoigirira isekataigara shintaigaririra itimashitavake otopinaku mesa yogaverokitavakara ovoroki^u ashirianakara.

²⁸Ikantutarotyo Jeso:

—Irovento pogotakera nagaveakera novegaerora pishinto, maika nonkavintsaakempityo novegaerora.

Iroro ikantakera maika ogatyo okenake oveganaa.

u 15.27 Ovoroki: okantagani aikiro “oporoki”.

**Jeso yovegagetairi tovaini
mantsigaigankitsirira**

²⁹Impogini iatai Jeso ikenanake otsapiaku inkaare Garirea itonkoanake otishiku, ario ipirinitake kara. ³⁰Impo iatashiigakeri tovaini matsigenkaegi yamaiganakenerira terira iranuitagantsiige, terira ineaiige, terira iriniaige, terira irakoige, aikiro iposantevagetanakatyo kara mantsigaigankitsirira. Irirori yovegaigairi maganiro. ³¹Yogari patoitaigankicharira yogavageiganake tyo kavako, ineigakeritari ineiga-naira terira ineigavetempa, yakoigana- naira terira irakoigavetempa, yanuita- gantsivageiganaira terira iranuitagan- tsiigavetempa, aikiro iniaiganaira terira iriniaigavetempa. Ogatyo ikenaiigake ishineventaigamatanakari- tyo Tasorintsi kavintsajaigiririra iseraereegi.

**Jeso yogitovaigairora pan
(Mr. 8.1-10)**

³²Impogini ikaemaigakeri Jeso irogamereegi ikantaigiri:

—Notsarogakagaiganakari yogaegi, noneaketari ipiriniventaigakena aka mavati kutagiteri niganki itsonkatakoi- ganaka isekaegi. Maikari maika mameri tatampa irogaigakempa. Tera nonkoge nontigankaigaerira iriaigaera ivankoku, ontirorokari agaiganakeri itasegane avotsiku.

³³Impo ikantaigiri irogamereegi:

—iOjojoo itovaigavagetiratyo kara! ¿Ario tyara nagaigakero pan nompai- gerira isekataigakempara maganiro? Ontitari anaigake osarigagitetapaakera, tera tyani timatsine aka.

³⁴Ikantaigiri irirori:

—¿Akatovainivati onai pan pamaiga- kerira?

Ikantaigi:

—Intaganivati onai 7, impo aiño aikiro piteni shima.

³⁵Yogari Jeso ikantaigakeri impirinitai- gakeri maganiro, ³⁶impo yagagetana- kero pan intiri shima yapagogetanakeri inianakeri Tasorintsi ikantiri: “Apa, noshinevagetakatyo pipakenara oka noseka.” Impo ikotagakero pan intiri shima ipageigakeri irogamereegi, irirokyari pageigavakeri maganiro.

³⁷Isekataigaka maganiro ikemaiganaka.

Ogari aityokyarira onai, yoyagaigairo irogamereegi tsivetaku onakotai 7.

³⁸Maganiro sekataigankicharira ikarava- geigaketyo 4,000. Intaganisano yogoigunkani surariegi, tera ogoigenkani tsinaneegi intiegiri ananekiegi. ³⁹Impo Jeso yapakuaigairi iriaigaera ivankoe- giku. Irirori yomatetanaa pitotsiku itentaiganaarira irogamereegi iaigake pashiniku kipatsi paitacharira Magarara.

**Pariseoegi intiegiri saroseoegi
ikantaigavetakarira Jeso
ineakagaigakerira terira oneimagetenkani
(Mr. 8.11-13; Ir. 12.54-56)**

16 ¹Impogini ipokashiigapaakeri Jeso pariseoegi intiegiri saroseoegi ikantaigapaakeri ineakagai- gakerira terira oneimagetenkani onkoneatakera anta enoku inkiteku. Iriroegi onti ikogaigake ineigakerira arisanorikara opaitaka yagaveavagetira, nerotyoka ikañotantaigakarorira maika.

²Kantankicha irirori ikantaigiri:

“Viroegi pineaigirora okiraagitetira inanaira poreatsiri shavini onti pikantaigi: ‘Kamani onkametigitetake, kiraagitemata- ketari.’ ³Antari ontirika okiraagitetake tsitekyamani onti pikantaigi: ‘Maika gara okametigiteti, kiraagitetamanaketari, aikiro amokake.’ Tyarikatyo pikantaigaka viroegi pogoigakerora ariorika onkameti- gitetake ontirika gara okametigiteti, kantankicha tera pogotumaige tyara

okantaka okañotakara maika pineaigakerora posante terira oneimagetenkani pairani. ⁴Viroegi apaiventavageigakempi kañovagetagantsi, pikogantaigakarira noneakagaigakempira terira oneimagetenkani, kantankicha garatyo noneakagaimpimpi. Intagatityo noneakagaigakempipashini onkañotakemparo ikañotagunkanira Jonashi pairani.”

Ovashi iokaiganairi iatai.

**Jeso ikantakotakerora
irogotagantane pariseoegi
ikañotagakaro opoegantarira pan**
(Mr. 8.14-21)

⁵Antari imonteaigakara irogamereegi Jeso intati imagisantaiganakero iramaiganakera pan isekataigakempara.

⁶Impo yogari Jeso ikantaigiri:

—Viroegi, tsikyanira pogakoigarokari opoegantarira pan irashiegi pariseoegi intiegiri saroseoegi.

⁷Iroko ikemaigavakerira iniavakagai-ganaka ikantaigiri:

—Onti ineakera tera amaige pan, nerotyoko ikantantaigakairira maika.

⁸Yogari Jeso ineaigavakerira iniavakaganakara ikantaigutarityo:

—iTesakona pogotasanoige arisano nagaveavageti! ¿Tyara okantakara pikantaigakera: ‘Onti ineakera tera amaige pan’? ⁹¿Matsi tekyo pogoige? ¿Matsi tenige pisureigaemparo pan onavetakara 5 nokotagagetakerora nosekatagaigakarira 5,000 surariegi? Impo papatoigairora aityokyarira onai, ¿akatovaiti onakotai tsivetaku? ¿Matsi pimagisantaigairo?

¹⁰Aikiro ¿matsi tenige pisureigaemparo onavetakara pan 7 nokotagagetakerora nosekatagaigakarira 4,000 surariegi? Impo papatoigairora aityokyarira onai, ¿akatovaiti onakotai tsivetaku? ¿Matsi pimagisantaigairo? ¹¹Antari nokantaigakempira: ‘Tsikyanira pogakoigarokari opoegantarira pan irashiegi pariseoegi

intiegiri saroseoegi’, ¿tyara okantakara tera pogoigavake tera iroro noniakote pan?

¹²Ovashi yogoigake irogamereegi tera iroro inkantasanote opoegantarira pan, ontityo ikantakotake yogotagantaigirira pariseoegi intiegiri saroseoegi ganiri ikemisantaigiri yogotagantavageigira.

**Perero ikantakera Jeso inti
Igoveenkariegite iseraereegi**
(Mr. 8.27-30; Ir. 9.18-21)

¹³Impogini iatake Jeso ikenanake kara ochoenitakara Sesarea Piripo. Impo ikantaigiri irogamereegi:

—¿Tyara ikantaigiri maganirio matsigenkaegi? ¿Tyani yoga Kañotasa-notakaririra Matsigenka?

¹⁴Iriroegi ikantaigiri:

—Ikonogagarantaigaka ikantaigake: ‘Inti Joan Giviatantatsirira.’ Pashini kantaigankitsi: ‘Inti Eriashi.’ Pashinikya kantaigankitsi: ‘Inti Jeremiashi, terika iriro, inti pashini kamantantatsirira pairaninirira yanianaira.’

¹⁵Impo ikantaigiri:

—Viroegiri, ¿tyara pikantaigana?

¹⁶Iniamatanaketyo Sumo Perero ikantiri: —Viro vinti Ikogakagakerira Tasorintsi impegakempara Nogoveenkariegite, vinti Itomi Tasorintsi ikantakanirira itimi.

¹⁷Ikantiri Jeso:

—Viro Sumo, itomi Jonashi, shinetempa, teranika iriro matsigenkaegi gotagaigempirone oka pikantakenarira maika. Intitari gotagakempiro Apa timatsirira enoku, ikavintsaaempitari. ¹⁸Naro nonkantakempiro viro vinti Perero. Impogini tyanirika kañotakempine viro pikantakera maika, naro nogavisaakotakeri kameti intentakemparira maganirio kematsaigakenanerira. Garatyo yagaveimaigiri kamagarini, ariompatyo inkematsasanoiganakenari. ¹⁹Kantankicha viro nagaveakagakempiki kameti pinkamantaigakerira pashinipage

matsigenkaegi tyara inkantaigakempa kameti nogavisaakoigakerira iriroegi aikiro nompegakempara Igoveenkariegite. Tatarika oita pinkantavitantake aka kipatsiku, arioty inkañotakempa Tasorintsi timatsirira enoku inkantakera onkantavitantakenkanira, matakatari ikantavitantakero. Aikiro tatarika oita pinkantake kametitake, arioty inkañotakempa irirori inkantake kametitake.

²⁰Impo Jeso ikantaviigakeri irogameeregi ganiri ikamantakoigiri inkantaigakera inti Ikogakagakerira Tasorintsi impgakempara Igoveenkariegite iseraereegi.

**Jeso ikamantaigakerira
irogamereegi inkamakera**
(*Mr. 8.31-9.1; Ir. 9.22-27*)

²¹Impogini Jeso itsititanakero ikamantaiganakerira irogamereegi iriatakera Jerosarenku iratsipereakagaveigakerira itinkamiegi jorioegi intiegiri itinkamiegi saseroroteegi intiegiri aikiro gotagantaigirora itsirinkakotanakerira Moiseshi impo ovashi irogakenkani, kantankicha omavatanakempara kutagiteri iraniana. ²²Yogari Perero itentanakari antakona ikantavetanakarira ikantiri:

—iNotinkami, atsi garatyo pikañota maika! iGaratyo yogaitimpi!

²³Kantankicha Jeso ishonkatematana-karityo ikantutarityo:

—iVirori Satanashi, piataenityo parikoti, ontitari pikogavetaka pampakuakagakenamera ganigeniri notsatagatairo itigankavitakenarira Tasorintsi, teranika iroro pisuretakogetempa ikogagetirira irirori, ontitari pisuretakogetaka ikogagegirira matsigenkaegi!

²⁴Impo Jeso ikantaigiri irogamereegi: —Tyanirika kogankitsine inkantakera inkematsatasanotakena garatyo ipiriniventiro ikogagetirira irirori,

ontityo inkantakani impiriniventavagetanakero nokogagetirira naro, aikiro iratsipereaventavagetakenatyo ariorika inkamaventakena. ²⁵Tyanirika tsarogakagacha ikiro tera inkoge iratsipereaventavagetakenara ikirotyo kañotagan-tanankicha, intagatitari ikogake irovetsikagetakera tatarika ikogagetakerira irirori. Kantankicha yogari piriniventirira nokogagetirira naro yatsipereaventakenara, iroro pinkante iriatake itimira Tasorintsi inkantakani intimake.

²⁶Intimavetakempatyo gaveankitsinerira irashintakemparora magatiro kipatsipagekutirira kantankicha impoginityo inkamanae iriatake morekariku, ¿matsi ario agaveake oganiakerira iaraki? Garatyo agaveimati. Irashintagevetakemparoty magatiro kantankicha garatyo yagaveimati impunaventakempara ganiri iati morekariku. ²⁷Antari nompigaatera impogini nonkoveenkavagetapaake nonkañotapaakempari Apa ikoveenkavagetira. Antari nompokaatera nontentaigapaakempari isankariite nogishineagapaakerira maganiro shineventaiganarira, iriroegikya pashiventagaiganarira onti nogipashiventagaapaakeri. ²⁸Maika nonkamantanoigakempi antari gatatarika pikamaigi pinkonogagarantaigakempa pineaigakena nonkoveenkatanakera viroegiku.

**Jeso ikantatigimoiganakarira
irogamereegi**
(*Mr. 9.2-13; Ir. 9.28-36*)

17 ¹Impogini avisanakera 6 kutagiteri yogari Jeso iatake anta otishiku itonkoavagetanake. Intagani itentaiganaka Perero, Santiago intiri irirenti Santiago paitacharira Joan. ²Impogini inaigakera anta katsiketyo iriroegi ineaigiri ikantatigimoiganakari. Ogatyo ikenake ishimpokirerenkanake ivoroku kañomatata ishimpokirerenkara

poreatsiri, aikiro imanchaki onkutama-govageteratyo kara. ³Ineaigutarityo Moiseshi intiri Eriashi iniaigakerira Jeso ⁴iniamatanaketyo Perero ikantiri Jeso:

—Notinkami, imatsi ariokonatyo anaigake aka! Pikogakerika novashiigakera mavati pankotsi otyomiatirira, patiro pashi, patiro irashi Moiseshi, ogari omavatakemparira onti irashi Eriashi.

⁵Tekyaenkara iragatumate iniakera apamankakoigapaakeri menkori, impo ikemaigiri inianake Tasorintsi arionika apatosegakara ikanti: “Yokari yoka inti Notomi, notasanovageterityo kara noshineventakarityo. Maika atsi kemisantanoigeri viroegi.”^v

⁶Iroroty ikemaigakerira ogatyo ikenaiigake itsarogavageiganake yompataigamatanakatyo. ⁷Kantankicha Jeso yaiñoniiganakari itsagaigakeri ikanti:

—Tinajaiganae gara pitsarogaigi.

⁸Ikamaguigavetaa mameri iraratinkai-gaera, panivani inai Jeso.

⁹Impo ipigaigaara yanonkaiganaara yogari Jeso ikantaigiri:

—Gatata tyani pikamantumaigi oga pineaigakerira maika. Antari inkitareanaera Kañotasanotakaririra Matsigenka inkitavetakenkanira, ario pinkante pinkamantantaigakero.

¹⁰Impo iriroegi ikantaigiri:

—¿Tyara ikantakara gotagantaigirorira itsirinkakotanakerira Moiseshi ikantaigakera iketyo pokankitsine Eriashi?

¹¹Irirori ikantaigiri:

—Arisanoniroro ogari Itsirinkakagan-takerira Tasorintsi okantake iketyo pokankitsine Eriashi inkenkitsatimoigakerira jorioegi inkantaigakerira inkanta-tigaiganakempara inegintetashiigavakemparira impogitapaankitsinerira.

¹²Maika nonkamantaigakempi mataka ipokuti Eriashi, kantankicha tera

irogotavakenkani onti ikisavunkani yatsipereakagavagetunkanira ovashi yogunkani. Arioty inkañotagakenkani impogini Kañotasanotakaririra Matsigenka iratsipereakagavagetakenkanira ovashi irogakenkani.

¹³Iriroegi isureigamatanakaroty ikantaigi: “Inti iniakotake Joan Giviatantatsirira.”

Jeso yoneagaarira kamagarini

(Mr. 9.14-29; Ir. 9.37-43)

¹⁴Impogini yogonkeigapaakara inaiigakera matsigenkaegi yapatoitaigakara, ipokashitapaakeri Jeso paniro surari itigeroaventapaakari ikantiri:

¹⁵—Notinkamii, tsarogakagavagetem-parikario notomi ikamakamavagetake yatsipereavagetaketyo kara. Iokavokigematatyo tsitsiku, aikiro iokaakaavagetaka oaaku. ¹⁶Namaigavetakeneri pogamereegi irovegaigaerira, kantankicha teratyo iragaveaigeri.

¹⁷Ikanti Jeso:

—iArio pikantavageigaka viroegi tekyanekatyo pogoigero iragaveane Tasorintsi, teranika pinkogaige pinkematsaigakerira! ¿Akasamaninivatorokari nompiriniventaigakempi nantsipereakoigakempira? Iroroventi atsi maigakenarinityo aka.

¹⁸Impo initarityo kamagarini ikantiri:

—Maika piatae parikoti.

Ogatyo ikenake ikontetapanuti iatai parikoti ovashi yovegasanovagetanaa ananeke itimaguvetakarira.

¹⁹Yogari irogamereegi iniaigakeri Jeso parikoti ikantaigiri:

—¿Tyarika okantakara naroegei tera nagaveaige noneagaigakemparira?

²⁰Ikanti Jeso:

—Ontitari kantankicha tera pisuretasa-noigemparo nagaveane pinkantaigakera:

‘Arisanotari yagaveavageti Notinkami iragaveakagakenaty.’ Antari pinkañoigakeromera maika pisuresanotumaigakemparora maani, ario pinkante pagaveaigake-tyo pinkantaigakerora oga otishi: ‘Gagana-kempa plate parikoti’, ogaganakempaty. Garaty tatoita komutapitsatumaigimpi arisanorika opaitaka pisuresanoigakarora nagaveavagetira. ²¹Kantankicha yogari kamagarini kañorira maika garira oketyo piniaigiri Tasorintsi, aikiro garira pipitashiigaro kogapage gara pisekataiga, garaty pagaveimaigiri poneagaigarira.

Jeso ikamantaigairira aikiro inkamakera
(*Mr. 9.30-32; Ir. 9.43-45*)

²²Impogini Jeso itentaigakarira irogamereegi ikenaiaganakera kara Garireaku, ikamantaigakeri ikanti:
—Yogari Kañotasannotakaririra Matsigenka iragakagantakenkani ²³impo irogakagantakenkani, kantankicha omavatanakempara kutagiteri iraniana. Iroro ikemaigavakerira ikenkisureava-geiganakatyo kara.

Koriki ashi ivanko Tasorintsi

²⁴Impo yogonkeigapaakara Kapere-naoku, ipokashiigakeri Perero kogantagaririra itovaireegi koriki ashi ivanko Tasorintsi ikantaigiri:

—Yogari gotagaigimpirira çipunatityo koriki ashi ivanko Tasorintsi?

²⁵Ikanti Perero:

—Jeeje, ipunatiniroroty.

Iroro ikianakera tsompogi pankotsiku inakera Jeso iketyo niavakeri ikantiri:

—Sumo, çtyara pinkante viro? ÇTyani ikogantaiga koriki koveenkaripage timageigatsirira aka kipatsiku? ÇIroro ikogantaiga itomiegi intirika ikogantaiga pashini?

²⁶Ikanti Perero:

—Intagani ikogantaiga pashini.

Ikanti Jeso:

—Iroroventi tera iriro inkogantai-gempa itomiegi, ²⁷kantankicha aroegi ganiri iniashinaigai, plate inkaareku pintsagaatakitera impo yogari iketyorira pagake pintinkirankakerira pinoshikakerira korikimenta nankitsirira ivaganteku pamaigakenerira kogantantaigacharira koriki ashi ivanko Tasorintsi pimpaigakerira. Irogonketakempa ampunaventai-gakempara piteniro.

Tyani visaigakerine itovaireegi impogini
(*Mr. 9.33-37, 42-48; Ir. 9.46-48; 17.1-2*)

18 ¹Impogini yaiñoniiganakari irogamereegi ikantaigiri:
—ÇTyani visaigakerine itovaireegi impogini pimpegakempara Nogoveenka-riegite?

²Irirori ikaemake paniro ananeki yogaratinkakeri niganki inaigakera ³ikantaigiri:

—Nonkantasanoigakempi garira pikantatigaiga pisureku pinkañoigakemparira ananekiegi garatyo pitimimoi-gana impogini nampatoitaigakerira maganiroro kematsaiganarira nompegakempara Igoveenkariegite, ⁴kantankicha tyanirika kañotakemparine yoka ananeki terira isuretumatempa iravisumanatantakera, iriro pinkante pairoty iravisantavagetake impogini.

⁵Aikiro tyanirika kavintsakerine ananeki kañorira yoka kañomataka nantinirikatyo ikavintsaaake, nantitari ikematsatake.

⁶“Kantankicha tyanirika kañovageta-gakerine paniro kematsatakenarira terira impaitumatempa inkisashivageta-kenkanityo kara. Irorotari nonkantantai-gakempirira ganiri ikañotiri maika oketyome irogatsatakotantakenkani itsanoku omarane mapu otononkantaganirira iramanakenkanira iokaatakenkanira otsompogiatira omaraaniku nia. ⁷iMaikaniroro iratsipereavageigake

maganiro timaigatsirira aka kipatsiku, intimaigaketari kogaigankitsinerira inkañovagetagantaigakera! Ariotyo onkañotakempa maika, kantankicha pairotyo iratsipereasanovageigake kañoigakeronerira maika inkisashitasa-noigakenkanira.

⁸“Nonkantantaigakempirira irorora kañovagetagakempine pako ontirika pivonkiti, ariometryo povatuakerome povuokakerora parikoti, pairotari okametitake pinegintetasanovagetakempara impo pinkamanakerika piatakera pintimimotakerira Tasorintsi, avisakero pinkañoovagetakempara impo pinkamanakerika piatakera morekariku garira otsivakumati. ⁹Ontirika poki irorora kañovagetagakempine, ariometryo pinkitsogitakerome povuokakerora parikoti, pairotari okametitake pinegintetasanovagetakempara impo pinkamanakerika piatakera pintimimotakerira Tasorintsi, avisakero pinkañoovagetakempara impo pinkamanakerika piatakera morekariku garira otsivakumati.

Ovisha pegankicharira

(Ir. 15.3-7)

¹⁰“Nonkantaigakempi maika garatyo pikisaigiri yogaegi kematsaiganarira terira impaitumaigempa, añaogitari isankariite Apa pampogiakoigiririra. Iriroegi ikantakani inaigake anta enoku inampinaku. ¹¹Yogari Kañotasanoatakari-rira Matsigenka onti ipokashitake irogavisaakoigakerira pegaigankicharira.

¹²“¿Tyara pinkantaige viroegi? Pine intimera paniro matsigenka impiratakempara 100 irovishate impo imegakempara paniro, ¿matsi gara iokaiganakeri maganiro irovishate iriatakera inkogaaterira pegankicharira? ¹³Impo iragaeririka pairotyo irishineventakempari, iravisaketyo ishineventaigarira maganiro 99 terira imegavetempa. ¹⁴Ario ikañotaka Piri

timatsirira enoku tera inkoge impegumatempara paniro yokaegi kematsaiganarira terira impaitumaigempa.

Tyara ankantaigakempa agametiaigaerira apigematsaegine

(Ir. 17.3)

¹⁵“Tyarika inkantakempi papigematsatene pintentanakeri parikoti piniakerira paniro pinkamantaerira tyarika ikantakempi. Irirori inkemakempirika mataka pogametaiiri. ¹⁶Antari garika ikemimpi pintentanake paniro, ontirika piteni papigematsaegine kameti inkemaigakeniri iriroegi, aikiro irogoigakeniri arisanorika pikogake pogametiaerira. ¹⁷Kantankicha garika ikemi iroventi piatetyo pintentanakerira yapatoitaigara kematsaigatsirira inkanomaakenkanira. Garika ikemaigiri iriroegi iroventi inkañotagakenkanityo terira inkematsateri Tasorintsi intirika kogantaiginiririra koveenkari koriki.

¹⁸“Maika nonkantasanoigakempi tatarika oita pinkantavitantaigake aka kipatsiku, ariotyo inkañotakempara Tasorintsi timatsirira enoku inkantakera onkantavitantakenkanira, matakatarikantavitantakero. Aikiro tatarika oita pinkantaigake kametitake, ariotyo inkañotakempa irirori inkantake kametitake.

¹⁹“Aikiro nonkantaigakempi tatarika oita pikogaigake pineviigakerira Apa timatsirira enoku oketyo pinkemavakagasanoigakempa impo piniagakeri. Irirori inkemaigakempi intsatagakero tatarika oita pikantakerira. Pinaigavetakempari piteni kantankicha pinkemavakagaigakemparika inkemaigakempityo. ²⁰Omirinkatariki tyarika kara yapatoventaigakena iriniaigakenara pitenityo irinaigavetakempa ontirika irinaigavetakempa mavani, ariotyo nonimoigakeri naró.”

**Inampina koveenkari terira
intsarogakagatempa**

²¹Impogini yaiñonitanakari Perero ikantiri:

—Notinkami, ¿akatovaiti nomagisan-taero tyarika inkantakena napigematsa-tene? ¿Ario onkaratanake 7?

²²Ikanti Jeso:

—Garatyo ario okarati 7, ontityo pimagsantakotaeri magatiro tyarika inkantakempi, gara okaratumati.^w

²³“Iroventi maika nokogake nonkamantaigakempira tyara onkantana-kempa impegakempira Tasorintsi Igoveenkarijegite matsigenkaegi onti nonkañotagakemparo koveenkari ikaemai-gakerira inampinaegi inkantaigakerira impunaigaerira ipegakoigakerira. ²⁴Iroo itsititanakera ikaemakagantaigakerira yamaigapaakeneri paniro pegakovagetiri-rira tovaini koriki kara. ²⁵Kantankicha irirori mameri tatampa impunatantaem-pari neroty yomperaventantakaririra koveenkari impimantakenkanira intentagantakenkanira itsinanetsite intiegiri itomiegi ontiri magatiro yashinta-getarira iragantageigakemparora koriki kameti impunataerini ipegakogetirira.

²⁶Kantankicha irirori yompatakaventama-tanakarityo ikantiri: ‘Tsarogakagavagete-nakario, pogiakotakempira impoginityo nompunataempi maganiro koriki nopega-kotimpirira.’ ²⁷Yogari koveenkari itsaroga-gakanakari ikantiri: ‘Iroventi arione, gara pipunataana’, ovasi yapakuairi.

²⁸“Kantankicha iroro iataira itonkivoa-kari itovaire pegakotiririra maani. Yagamatanakerityo ikatikanakerira ikantiri: ‘iPunataena pipegakotanara!’ ²⁹Irirori yompatakaventavetanakari ikantiri: ‘Tsarogakagavagetenakario, impogini nompunataempi,’ ³⁰kantanki-

cha irirori teratyo intsarogakagempari, onti yamakagantakeri irashitakotakenka-nira kigonkero impunataerira ipegakoti-rira. ³¹Impogini ikemakoigakerira itovaireegi ikisaigamatanakatyo iaigake ikamantaigakitirira koveenkari. ³²Iroo ikemavakera ikaemakagantairi ikantiri: ‘iViro tera pinkametite, vinti pairorira pogagavageta pikisantira! Kogapage naro nokantakempi arione gara pipunataana, pikantakenatari nontsarogakagavageta-kempira. ³³Ariometryo pinkañotagake-rime pegakotakempirira viro pintsaroga-kagakemparimera irirori pinkañotake-nara naro nontsarogakagakempira.’

³⁴Ikisamatanakatyo yomperaventakari iratsipereakagaigakemparira ovasi impunataeri magatiro ipegakogetirira.”

³⁵Yagatanakera Jeso ikenkitsatakera ikanti:

—Arioty inkañotagaigakempi Apa timatsirira enoku garira pitsarogakagai-gari pitovaireegi pimagsiantaigaerora tyarikara inkantaigakempi.

**Ikantake Jeso gara tyani
okumatiro itsinanetsite
(Mr. 10.1-12; Ir. 16.18)**

19 ¹Impogini iponianaka Jeso Garireaku iatakera Joreaku intati Jororanku. ²Yogiaiganakeri tovaini matsigenkaegi. Antari anta yovegaigairi maganiro mantsigaiganki-tsirira.

³Impo ikonogagarantaigaka pariseoegi naigankitsirira kara ipokaigapaake inkogakotagantaigakerira ineaigakera tyarikara inkantaigeri irirori, ontitari ikogaigavetaka inkemaigakerira inkantakera tatarika oita terira onkatin-katero ikantaigirira iriroegi kameti intsavetantaigakeriniri inkisakagantai-gakerira, neroty ikantaigapaakeri:

w 18.22 Gara okaratumati: irinianeku virakocha onti okantake *setenta veces siete*.

—¿Okantavitantagani iokakerora surari itsinanetsite?

⁴Irirori ikantaigiri:

—¿Matsi tera piniavantaigero Itsirinka-kagantakerira Tasorintsi okanti ikyasano-kyara yovamparoatake Tasorintsi matsigenka ‘piteniro yovetsikaigakeri surari ontiri tsinane’? ⁵Impo ikantake: ‘Nerotyto yogari surari gankitsinerira tsinane iokanakeri iriri ontiri iriniro iriatakerira iragakerora inkantakani impanirotanakero. Antari okyara tekyara iragero piteni inaigavetaka, kantankicha antari yaganakerora oga ikenake itentaganakaro kañomataka panironirikatyo inai.’^x ⁶Nerotyto yogari surari gankitsirira tsinane garatyto iokumatiro, tenigetari irapiteigaempa, kañomatakatarani panironirikatyo inai, ineaketari Tasorintsi yagakerora ikanti maika tera onkametite iokanaerora, kantakanityo iragakerora.

⁷Iriroegi ikantaigiri:

—Iroroventi, ¿tyara okantakara ikantakera Moiseshi iokanaerorika surari itsinanetsite impakero sankevanti onkantake: ‘Maika mataka nokanaimpi’, impo inkantakero oataera?

⁸Ikantaigiri Jeso:

—Yogari Moiseshi ontitari ineakera tera pinkogaige pinkematsaigerira Tasorintsi, nerotyto ikañotantaigakempirorira maika itsirinkaiganakempira. Kantankicha antari ikyasano-kyara yovamparoatake Tasorintsi matsigenka, tera ario inkañotero maika. ⁹Narori nonkantaigakempi ompanirota-kempirika pitsinanetsite garatyto piokiro. Pokanakerorika impogini pashinikya pagake onti pikañovagetaka.

¹⁰Yogari irogamereegi ikantaigi:

—Iroroventi opomirintsivagetaratyo kara agenkanira tsinane. Onkanteroro tyampa ankantakero agakera tsinane.

¹¹Yogari Jeso ikantaigiri:

—Tera iragaveaigenika maganirio inkemaigakerora nokantaigakempirira maika, intaganitari kemaigakero yagavea-kagaigakerira Tasorintsi. ¹²Aiñoegitari ikonogagarantaigaka tera iragaveaige intomintaigempara. Aikiro aiño pashini onti okitsogitunkani igatsareki. Aikiro aiñoegi pashini onti ishintsitashiigakero tera intsagaigero tsinane kameti impirini-ventaigakeroniri magatiro ikogagetirira Tasorintsi. Tyanirikara gaveankitsine inkemakera nokantaigakempirira maika kantetyo inkemakera.

Jeso iniaventaigakerira ananekiegi

(*Mr. 10.13-16; Ir. 18.15-17*)

¹³Impogini ipokaigake pashini yamaigapaakenerira Jeso ananekiegi impatikaiigakerira igitoku aikiro iriniaventaigakerira. Yogari irogame-reegi ineagavakerira yamaigapaakerira ikantaviigavakeri ikantaigiri:

—Maiganaeri parikoti, gara poverajai-giri.

¹⁴Kantankicha ikemaigakerira Jeso ikañoigakerora maika ikantaigiri:

—Atsi arionenityo iripokaigakera naroku, ishineventaigaritari Tasorintsi impegakempara Igoventkariegitte kañoigaririra yogaegi ananekiegi.

¹⁵Impo ishonkateiganakari ipatikaiigakeri igitoku iniaventaigakerira. Impo irirori iatanai parikoti.

Shintavagetacharira

(*Mr. 10.17-31; Ir. 18.18-30*)

¹⁶Antari ikenanakera Jeso kara ipokashitapaakeri paniro matsigenka ikantapaakeri:

—Gotagantatsirira, atsi kamantena tyara nonkantakempa kameti nonkanira nontimake. ¿Tatoita novetsikakera? ¿Tatoita kametitankitsine?

¹⁷Ikantiri Jeso:

—Tyara okantakara pikantakenara: ‘¿Tatoita kametitankitsine?’, mameritari pashini kametitanotatsinerira, panirotari ikantara Tasorintsi ikametitira. Kantankicha pikogakerika pinkantakanira pintimake, tsatagageteroty magatiro itsirinkakotanakerira Moiseshi pairani.

¹⁸Ikanti irirori:

—¿Tyatityo?

Ikanti Jeso:

—Irorotari kantatsirira: ‘Gara poganti, gara piatashitiro tsinane, gara pikoshiti, gara pitsoeventari pitovaire. ¹⁹Pimpinkatsaigakerira piri ontiri piniro gara pipugatsanaigari, aikiro pintsarogakagavagetakemparira pitovaire pinkañotagasanotakempaty pitsarogakagara vikiro.’^y

²⁰Ikantutarityo irirori:

—Arioniroro nokañotari maika notsititanakero notsatagasanotanakerora notyomiakyaniro ovashi maika. ¿Maika aityokya pashini nontsatagakerira?

²¹Ikantiri Jeso:

—Pikogakerika pairora pintsatagasanotakero ikogagetirira Tasorintsi, piate pimpimantagetakerora magatiropage pashintagetarira pagantakemparora koriki pimpaigakerira kogakoigankicharira impo pimpokake pogiavetanakenara. Impogini ariokya inkavintsaavagetakempi Tasorintsi enoku.

²²Ikemutatyo ikantakerira maika ikenkisureavetanakatyo kara ovashi iatai ipiganaara, intitari shintavagetacharira.

²³Impogini ishonkashiiiganakari Jeso irogamereegi ikantaigiri:

—Arisanoty nonkantasanoigakempi okomuvagetaratyo kara irogavisaakota-

kenkanira shintavagetacharira impegakempara Tasorintsi Igoveenkarite.

²⁴Nonkantutaigaempityo aikiro, ¿matsi ario iragaveake kameyo inkianakera otsempokiku kitsapi iravisakerora aikyara? Garatyo yagaveimati. Irirompasanoty shintavagetacharira intasanotakemparorika yashintagetarira garatyo yogavisaakotagani.

²⁵Ikemaigutaty irogamereegi ariompatyo yogasanovageiganakeri kavako ikantaigiri:

—Irovento ¿tyanimpatyora irogavisaakotakenkani?

²⁶Ipampogiaiganakeri Jeso ikantaigiri:

—Gara tyani gavisaaotumatacha tsikyata, intaganitari Tasorintsi gaveatsi yogavisaakotantira, teranika tatoita komutapitsatumatemparine irirori.

²⁷Impo inianake Perero ikanti:

—Notinkami, naroegei nokaiganakero magatiro nashintaigavetarira nogiavaigeiganakempira. Maikari ¿tatarika impaigakena Tasorintsi?

²⁸Ikantaigiri Jeso:

—Arisanoty nonkantasanoigakempi antari onkyatagetaenkanira magatiro, nompegasanotakempa Igoveenkariegei maganiro. Virogei giavageigakenarira maika pintentaigakena pimpegaigakempara aikiro koveenkariegei pinkantaigakera tyara inkantaigakenkani iyashikiiganakerira itomiegei Iseraere.^z ²⁹Aikiro yogaegi maganiro okaiganakerorira ivankoegi intirika irirentiegei, iritsirogei, iriniro, iriri, itomiegei, aikiro itsamaire, iriaigakera impiriniventaigakerora notigankaviigakeririra impaigakenkani pashini pairoty avisagetakero yashintaigeigavetakarira ontovaigavagetakera,

y **19.19** Ek. 20.12-16; Ire. 19.18. z **19.28** Pimpegaigakempara aikiro koveenkariegei pinkantaigakera tyara inkantaigakenkani iyashikiiganakerira itomiegei Iseraere: irinianeke virakocha onti okantake *se sentarán también en doce tronos para juzgar a las doce tribus de Israel*.

tatarika oita iokaiganake patiro impaigaenkani pashini 100. Aikiro inkantakani intimaigake gara ineimai-gairo igamane. ³⁰Kantankicha ikonogagarrantaigaka aiñoegi ineaigavetunkanirira maika yavisaigakerira itovaire, kantankicha iriroegikyatyo iravisaiganaenkani impogini. Irroegikya ineaigavetunkanirira yavisaigunkanira maika, impogini iriroegikyatyo visantaiganaatsine.

**Jeso ikantakotakerora impegakempara
Tasorintsi Igoveenkariegite
kematsaigiririra ikañotagakaro
shintankicharira itsamaire**

20 ¹“Maika nokogake nonkantakotakerora tyara onkantanakempa impogini irapatoitaigakerira Tasorintsi maganiri kematsaigiririra impegakempara Igoveenkariegite nonkañotagakerora shintankicharira itsamaire. Irirori onti iatamanakeni inkaara tsitekyamani inkogakitera tavageigatsirira intsamaitakoigakenerira iovashite. ²Iroro ineaigapaakerira kogaigankitsirira irantavageigakera ikantaigiri: ‘Pikogaigakerika pintsamaitakoigakerora ova, naro nompagakempi paniro tenario.’ Irroegi ikantaigake kametitake, nerotyto itigankai-gakerira iriaigakera intsamaiigakera. ³Impo yogaenokanakara poreatsiri iatai opimantavagetantapinitaganira inkogaa-tera pashini tsamaiigankitsinerira. Irroro ineaigapaakerira pashini pitaigamatake kogapage tera tatoita irantumaige, ⁴ikantaigiri: ‘Piaige viroegi aikiro pantavageigakera notsamaireku, impogini nompunaigakempi’, ovashi iaigake. ⁵Impo ikatinkatanakera poreatsiri ipigutanaatyto aikiro inkogaatera pashini tsamaiigankitsinerira. Impo ario ikañotagairo itsunkanaira yagaati pashini. ⁶Impo panikyara irishonkanakempa poreatsiri ipigutanaa aikiro ineaigapaake pashini tera tatoita irantumaige ikantaigiri: ‘¿Tyara okantaka

pirinitaigakevi kogapage tera tatoita pantumaige?’ ⁷Ikantaigi: ‘Teranika tyani kogakoigenane.’ Irirori ikantaigiri: ‘Iroroventi piaige viroegi pantavageigakera notsamaireku.’

⁸“Impo ochapinienkatanakera ikantiri tsamaitagaigakeririra: ‘Maika kaemaigeri tsamaiigankitsirira pimpunaigakerira paniropage, pintsitigetanakeri impogei-ganankitsirira pinkaratagagetanakeri iketyorira pokaigankitsi.’ ⁹Impo ipokaigapaake pokaigankitsirira panikyara irishonkanakempa poreatsiri. Imirinkaegi ipaigakeri paniro tenario. ¹⁰Impo ipokaigapaake iketyorira tavageigamanankitsi. Irroegi ineaigiri ariori irogavisaigakeri impunaigakerira, kantankicha ariotyto ikañotagaigakari itovaire ipaigakerira paniro tenario. ¹¹Iroro ineaigakera tera irogavisaigeri impunaigakerira ogatyto ikenaigake iniashinaiganakari shintarorira itsamaire. ¹²Impo ikantaigakeri: ‘Yogaegiri impogei-ganankitsirira maanisano yantavageigavetaka kantankicha viro pipunaigakerityto kañotaka pipunaigakenara naroegei tsipereaigankitsirira nantavageigakera poreatsiriku ovashi maika.’ ¹³Kantankicha yogari shintarorira ikantakeri paniro tavagetankitsirira: ‘Atsi shonkeratyto. Teratyto namatavitempi. ¿Matsi teratyto nonkantempi inkaara nompakempira paniro tenario? ¹⁴Piatae manakeri ipakempirira. Narotari kantakeri impunatakerira impogitanankitsirira yantavagetakera inkañotagakempira viro ipunatakempira. ¹⁵¿Matsi tera naro shintemparine nogorikite kameti ganiri novetsikageti tatarika nokogake? Impa ariorakari pitsimaventaka pineakera pashinira nokavintsaae.’ ¹⁶“Irorotari nonkantantaigakempirira maika aiñoegi ineaigavetunkanirira maika yavisaigakerira itovaire, kantankicha iriroegikyatyo iravisaiganaenkani

impogini. Irroegikya ineaigavetunkanirira yavisaigunkanira maika, impogini iriroegikyatyto visantaiganaatsine.”

**Jeso ikamantutaigaarityo
aikiro inkamakera**

(Mr. 10.32-34; Jr. 18.31-34)

¹⁷Impogini iatanakera Jeso Jerosarenku ikenanakera avotsiku ikaemaigakeri irogamereegi iriroku ikantaigiri:

¹⁸—Maikari onti atonkoaignake aiganakera Jerosarenku. Antari anta agonkeigakemparika onti iragakagantakenkani Kañotasannotakaririra Matsigenka iramanakenkanira inaigakera itinkamiegi saserroteegi intiegiri aikiro gotagantaigirorira itsirinkakotanakerira Moiseshi. Irroegi inkantaigake: ‘Kante irogakenkanira.’ ¹⁹Impo iramanakenkani inaigira terira irroegi jorioegi kameti isamatsanatakenkanira, aikiro impasapatakenkanira, impo inkentakotakenkani, kantankicha omavatanakempara kutagiteri iranianaetyo.

**Ogari iriniro Santiago intiri
Joan okogavetakara impitaigakera
otomiegi inampinaku Jeso**

(Mr. 10.35-45)

²⁰Impogini okenapaake itsinanetsite Severeo otentaigapaakari otomiegi otigeroaventapaakari Jeso. ²¹Irirori ikantiro:

—¿Tatatyto pikogake?

Irirori okanti:

—Impogini pimpegakempara Igoveenkariegite maganiro nokogavetaka povirinitaigakerira yoka notomiegi pinampinaku, paniro pitankitsine pakosanoriraku, yogari irapitene impitake pampateku.

²²Kantankicha Jeso ikanti:

—Viroegi tera pogoigenika yogari pirinitankitsinerira nonampinaku pairotyto iratsipereavageigake aka

kipatsiku, nerotyto pikantantaigakenarira maika. ¿Matsi pagaveaigake viroegi pantsipereagakera pinkañoigakenara naro nantsipereakera?

Irroegi ikantaigiri:

—Jeeje, nagaveaigakeniroro.

²³Ikantaigiri Jeso:

—Pikantasanogakeniroro pantsipereagakera pinkañoigakenara naro nantsipereakera, kantankicha tera naro kantatsine tyani pitankitsine nonampinaku, intitari kantankitsi Apa pairani okyasanokyara.

²⁴Impogini yogari itovaireegi irogameeregi ikemaigavakera ikisaigamatanakerityo Santiago intiri Joan. ²⁵Kantankicha Jeso ikaemaigakeri ikantaigiri:

—Pogoigiritari viroegi yogari igoveenkariegite terira irroegi jorioegi onti ipotetashivageigari itovaireegi. Ario ikañoigaka aikiro itinkamipage yomperaperaigakari. ²⁶Kantankicha viroegi gara ario pikañoigiro maika. Tyanirika kogankitsine iravisagakerira itovaireegi ontityo irimutakovageigakeri. ²⁷Ario okañotaka tyanirika kogankitsine pairora iravisavageigakeri tsikyatyto inkogake irirori irimutakovageigakerira kañomatata irironirikatyto ironampiriaegi. ²⁸Kañotari Kañotasannotakaririra Matsigenka tera iroro iripokashite irogiakovagetakempara, ontityo ipokashitake irimutakotantavagetakera, aikiro inkamaventaigakerira maganiro kameti irogavisaakoigakenkaniniri.

**Jeso inekagaigakerira piteni
terira ineaigavetempa**

(Mr. 10.46-52; Jr. 18.35-43)

²⁹Impogini Jeso intiegiri irogamereegi iponiaiganaka Jerikoku iaiganakera Jerosarenku yogiaiganakeri tovaini matsigenkaegi. ³⁰Ario kara ipitaigake onampinapokiku avotsi piteni terira ineaige. Iroro ikemakoigavakerira

pokapaake Jeso ikaemavaitaigamatana-ketyo ikantaigiri:

—iNotinkamii, Iyashikitanakerira

Iravi, tsarogakagavagetenakario!

³¹Ikantanaigavetakarityo itovaire:

—iAtsi kemisantaigenityo!

Kantankicha iriroegi ariompatyo ikaemasanoiganakeri:

—iNotinkamii, Iyashikitanakerira

Iravi, tsarogakagavagetenakario!

³²Yogari Jeso asatyo yaratinkapaake ikaemaigakeri ikantaigiri:

—¿Tata pikogaigake?

³³Iriroegi ikantaigiri:

—Notinkami, onti nokogaigake noneaiganaera.

³⁴Itsarogakagaigamatanakarityo Jeso itsagaigakeri irokiku. Ogatyo ikenaigake ineaiganai ovashi iaigake yogiaiganakerira.

Yogonketanakara Jeso Jerosarenku

(*Mr. 11.1-11; Jr. 19.28-40; Jn. 12.12-19*)

21 ¹Impogini iaiganake yogonkeigapaaka Vetipajeku otishiku Orivoshi. Ogari Vetipaje onti ochoenitakotakaro Jerosaren. Impo yogari Jeso itigankaigake piteni irogamereegi

²ikantaigavakeri:

—Piaige anta choeni itimageigira

pineaigapaakero kara paniro ashina intiri otyomiani akamotiakyani tsatakoigaka.

Pintsaakoiganakeri pamaigakenarira.

³Aiñorika kantaigakempinerira: ‘¿Matsi tyara pinkantaigakeri?’ viroegi pinkantagakeri: ‘Inti kogakotakari Atinkami, kantankicha paita irogipigaigaempiri.’

⁴Ario okañotaka maika otsataganakara ikantakerira kamantantatsirira pairani itsirinkanakera ikanti:

⁵“Kantaigeri timaigatsirira Shionku:

‘Atsi shonke, pokapaake Pigoveenkariegite.

Irirori inti pairorira ikemisantakova-geta.

Onti ishigakotantapaakari akamotiakyaniyirira ashino, otyomiani kiasevagetatsirira arakintsi.’”

⁶Impo iaigake irogamereegi itsaakoigapaakero ashina intiri otyomiani

⁷yamaiganakenerira Jeso. Ipashimittsaigakeneri imanchakiegiku, impo irirori ipirinitantakari ishigakotantakarira.

⁸Yogiaiganakeri tovaini matsigenkaegi.

Ikonogagarantaigaka yovetsarankaashii-gavakeri imanchaki avotsiku, pashinikya tovishiigavankitsi tsigaroshi ishitavokita-shiiigavakerira kameti inkenakotanakera.

⁹Yogari ivaiganankitsirira intiegiri giaigapaakeririra ikaemageigamatityo kara ikantaigi:

—iPairo ikametiti yogaa Iyashikitankerira koveenkari Iravi! iPairo ikavintsaavagetakeri Tasorintsi yoga itigankakerira impegakempara Agoveenkariegite! iPairo ikametiti Tasorintsi timatsirira enoku!

¹⁰Impogini yogonketapaakara Jerosarenku ogatyo ikenaigake timaigatsirira kara ishigavioveigapaakatyo ikantaigavakerira giaigapaakeririra:

—¿Tyaniratyo yoga?

¹¹Iriroegiri ikantaigi:

—Inti Jeso kamantantatsirira ponian-kicharira Nasareku Garireaku.

Jeso yoneagaigaarira pimantavageigatsirira ivankoku Tasorintsi

(*Mr. 11.15-19; Jr. 19.45-48; Jn. 2.13-22*)

¹²Impo Jeso ikianake ivankoku Tasorintsi ineaigapaakeri pimantavageigatsirira intiegiri punaventavageigatsirira. Yoneagaigapaakari maganiro, aikiro itatsinkagetakero imesane yoginoriantaigarira igorikiegite kampaivageigiririra koriki yogishonkagetakero. Imatakero aikiro ipirinitantaigakarira pimantavageigatsirira shiromega.

¹³Ikantaigiri:

—Okantake Itsirinkakagantakerira Tasorintsi okanti: ‘Ogari novanko onti ashi iripokapiniigera iriniaigakenara’, kantankicha viroegi onti pipegakagaiganakaro ipimantapiniigira matavitantaigatsirira.

¹⁴Impo ipokashiigakeri terira ineaige intiegiri terira iranuitagantsiige. Irirori inekagaigairi terira ineaigavetempa, aikiro yoganuitagantsiigairi terira iranuitagantsiigavetempa.

¹⁵Yogari itinkamiegi saserroteegi intiegiri gotagantaigirorira itsirinkakotanakerira Moisheshi ikisaigamatanakaty ineaigavakerira yovetsikagetakera terira oneimagetenkani, aikiro ikemai-gakerira ananekiegi ikaemavaitaigakera ikantaigakera: “iNeri yogaa Iyashikitanakerira koveenkari Iravi pairorira ikametiti!” ¹⁶Impo ishonkateigamatana-karityo Jeso ikantaigutarityo:

—¿Matsi tera pinkemaigeri yogaegi ananekiegi ikaemavaitaigakera? ¿Tera tyara pinkantumaigeri?

Yogari Jeso ikantaigiri:

—Jeeje, nokemaigakeriniroro, kantankicha ¿matsi tera piniavantumaigero viroegi Itsirinkakagantakerira Tasorintsi niakotakerorira oka? Okantaketari:

‘Yogari Tasorintsi yagaveakagaigakeri ananekiegi

intiegiri aikiro aiñokyarira itsomiigi irishineventaigakemparira inkantaigakera: iPairo ikametiti Tasorintsi!’

¹⁷Impo ovashi iokaiganairi ipiganaa Vetaniaku, ario imaganake kara.

Jeso ikantakerora igeraganiri otimumatai oi
(Mr. 11.12-14, 20-26)

¹⁸Impo okutagitetamanakera ipigaigamanaa Jerosarenku. Yogari Jeso itaseganake. ¹⁹Impo ineventakotapaakaro igeranampinapokiku avotsi ovashi iatapanuti inkamosotapanuterora ineiri aityori oi, kantankicha yagavetapaakaro

aiñoni mameri, onti gotankicha oshi. Ikantutarotyó:

—iMaikari maika gara otimumatai pii!

Ogatyo okenake oshigirikanake okamanake.

²⁰Iroro ineaigakerora irogamereegi yogaianake kavako ikantaigiri:

—¿Tyara okantakara iroro piniimatakera oga okenake okamanake?

²¹Yogari Jeso ikantaigiri:

—Arisanotyó nonkantasanoigakempi pogotasanoigakerika arisano yagaveavageti Tasorintsi magatiro, ario pinkante pagaveaigaketyo pinkañoigakenara naro nogishigirikakerora igerá. Kantankicha gara patiro oka. Pinkantaigakerorika oga otishi: ‘Piate okaatempa omaraanikunia’, oataketyo okaatakempara. Kantankicha gara piniasurentavagetumaigaa maani pinkantaigakera: ‘Ariorikatyo iragaveake Tasorintsi.’ ²²Tatarika oita pineviigakeri Tasorintsi piniaigerira pogotasanoigakerika arisano iragaveake impaigakempirora impaigakempirotyo.

Ikogakotagantunkanira Jeso tyani tigankakeri

(Mr. 11.27-33; Ir. 20.1-8)

²³Impo yogonketapaakara Jeso ikiake ivankoku Tasorintsi yogotagaigapaakerira. Osamanitanakera ipokashiigapaakeri itinkamiegi saserroteegi intiegiri itinkamiegi jorioegi ikantaigiri:

—¿Tyani kantakempira pinkañootakerora maika poneagaigaemparira pimantavageigatsirira? ¿Tyanimpatyora tigankakempira?

²⁴Yogari Jeso ikantaigiri:

—Maikari maika narokya kogakotagantaigakempine, pinkamantaigakenarika viroegi ario nonkañoatakempa naro nonkamantaigakempi tyani tigankakena. ²⁵¿Tyani kantakeri Joan irogiviantavagetakera? Maika viroegi kantaigena tyani kantakeri. ¿Irirorika

kantakeri Tasorintsi intirika kantaiga-keri matsigenkaegi?

Iroro ikemaigavakera iniavakagaigama-tanakatyo ikantavakagaiganakara:

“¿Tyarikatyo ankantaigeri? Ankantaigave-tempari inti kantakeri Tasorintsi, irirori inkantaigakaetyo: ‘Iroroventi ¿tyara okantakara tera pinkematsaigeri?’

²⁶Ariokya ankantaigavetempari inti kantaigaikeri matsigenkaegi, inkisaigakaetyo atovaireegi, maganirotari ikantaigake inti kantakeri Tasorintsi inkamantantavagetakera.” ²⁷Nerotyo ikantantaigakaririra:

—Nirorotyo, tyanirorokari kantakeri.

Impo irirori ikantaigiri:

—Iroroventi arioty nonkañotakempa naro, garatyo nokamantaigimpi tyani tigankakena.

Jeso ikantakoigakerira terira inkogaige inkematsaigakerira

²⁸Impogini Jeso ikantaigiri:

—¿Tyarika pinkantaige nonkantaigakempira maika? Itimi pairani matsigenka año piteni itomi. Impogini ikantakeri itsitiki: ‘Notomi, piatakera pagavagetakera ova.’ ²⁹Irirori ikanti: ‘Garatyo noati’, kantankicha impogini isuretanaka iatake yagavagetakera. ³⁰Impogini iatashitakeri irapitene itomi, ario ikañotagakari irirori yomperataririra. Iriro pinkante ikantake: ‘Je’ee nonkañotakeniroro’, kantankicha tera iriate. ³¹Maikari kantaigena, ¿tyani kematsatasanotakeri iriri?

Iriroegi ikantaigi:

—Inti itsitiki.

Impo Jeso ikantaigiri:

—Arisanoty nonkantasanoigakempi ogaegiri tsinaneegi pogereantaigatsirira intiegiri kogantaigaririra itovaireegi koriki irashi koveenkari ataketyo yogoiganake tyara inkantaigakempa kameti impegakempara Tasorintsi Igoveenkariegite, kantankicha viroegi tekyatyo pogotumaige. ³²Pine ipokashiigavetakem-

pitari Joan Giviatantatsirira yogotagaigavetakempira tyara pinkantaigakempa pinegintevageigakempara, kantankicha viroegi tera pinkematsaigeri. Ogaegiri pogereantaigatsirira intiegiri kogantantagacharira koriki irashi koveenkari iriroegi pinkante ikematsaigakeri. Viroegiri pineaigavetakarityo kantankicha teratyo pinkogaige pinkantatigaigakempara pampakuaiakerora povetsikageigira terira onkametite pinkematsaigakerira.

Jeso ikantakoigakerira itinkamiegi saseroroteegi intiegiri parisoeogi

(*Mr. 12.1-12; Jr. 20.9-19*)

³³“Maika nokogake pinkemisantaigakenara nonkantakotaera pashini. Itimake paniro matsigenka yashintaka igipatsite. Impogini ipankishiatake ova itantakotakero. Impo yovetsikashitakero agaantantenkanirira oani. Imatakeri aikiro impirinitantakemparira enoku sentakero nerira kameti ineventakotasantakemparoniri ganiri okoshitagani. Impo ikaemai-gake pashini intsamaitakoigakenerira. Antari ontimanakerika impagarantai-gaeri irirori. Impo iavagetake samani.

³⁴“Impogini aganaara irakantarira ova itigankaigavetakari iromperaneegi ineviigaaterimera impagarantaigaerira irirori, ³⁵kantankicha yogari tsamaitakoigakerorira onti ikisaigavakeri. Paniro onti ipasapasaigavakeri, yogari irapitene onti yogaigavakeri. Yogari yomavatakarira onti ipitankasenaigavakeri mapuku. ³⁶Impogini yogari shintarorira ova itigankaigavetaa pashini tovaini iromperaneegi yavisaiakeri iketyorira itigankaigavetaka, kantankicha yogari tavageigatsirira ario ikañotagaigaari iriroegi.

³⁷“Impogini ikantake: ‘Impa irirorakari nontigankake notomi, iriro pinkante impinkatsaigakerityo’, ovashi itigankakeri. ³⁸Kantankicha iriroegi irorotyo ineaigavakerira ikenapaakera iniavaka-

gaigamatanakatyo ikantaiganakera: ‘Neri yonta shintakemparonerira magatiro impogini inkamanaera iriri. Tsamekario agaigakerira kameti aroeginiri shintasa-noigakemparone.’³⁹ Impo iroro yogonke-tapaakara yagaigamatanakerityo yamaiganakerira antakona aikyara otantakotakara ova ario kara yogaigakeri.

⁴⁰“Antari impigaera shintasanotarorira ova čtyarika inkantaigakeri yogaegi tavageigatsirira? čTyara pinkantaige viroegi?”

⁴¹Iriroegi ikantaigiri:

—Irogaigakerityo impogereaigakerira maganiro, gara itsarogakagumaigari. Impogini inkaemaigake pashini impugakagaigakerira. Impo ontimanaerika ova iriroegiri pinkante impagarantaigari.

⁴²Ikantaigiri Jeso:

—čMatsi tera piniavantaigero Itsirinkakagantakerira Tasorintsi? Ariotari okantakeri maika:

‘Ogari mapu terira irishineventaigavetemporo vetsikaigakerorira pankotsi

onti opegakagunkani okusotantakarira.

Irirotari kañotagakero maika Atinkami,

impo aneaigakerora aroegi ashinevageigaka.’

⁴³Irorotari nokantantaigakempiriraganige pineaigai impegaempara Tasorintsi Pigoveenkariegite, pashinikya inkaemaigake kematsasanoigakerineririra, iriroegi pinkante pegaigakerine Igoveenkariegite. ⁴⁴Nantitari mapu okusotantakarira pankotsi. Tyanirika kantankitsine tera iriro tigankenane Tasorintsi tyampaty inkantakempa irogavisaakotakenkanira. Inkantakanirika inkañotake maika nonkisashitanotakempari impogini inkisashiigakemparira Tasorintsi maganiro terira inkematsaigeri garatyo yogavisaakotumatagani.

⁴⁵Iroo ikemaigavakerira itinkamiegi saseroroteegi intiegiri pariseoegi yogoigake inti ikantakoigake, ⁴⁶ovashi ikisaiganaka ikogaigavetakara iragakagantaigakerimera, kantankicha ipinkai-gairi itovaireegi, iriroegi ineaigakeritari Jeso inti kamantantatsirira.

Jeso ikantakotakerora ikaemaigirira

**Tasorintsi matsigenkaegi
intimimoigakerira impogini**

(Ir. 14.15-24)

22 ¹Impogini Jeso yogotagaiganairi aikiro ikantakogetakerora posante ikanti:

²“Maikari maika nonkamantaigakempityara ikanta Tasorintsi ikaemaigirira matsigenkaegi intimimoigakerira impogini irapatoitaigakerira maganiro kematsaigiririra impegakempara Igoveenkariegite. Onti ikañotakari koveenkari yonkotagantake posantepage sekatsi inkaemaigakerira itovaireegi isekatagaigakemparira intentaigakemparira itomi iragakera itsinanetsite. ³Impo itigankaigakeri iromperaneegi inkantagakiterira pokaigankitsinerira, kantankicha iriroegi tera inkogaige iripokaigera. ⁴Impo itigankutaaty pashini ikantaigavakeri: ‘Maika pinkantaigakiterira nokaemaigakerira mataka posatake sekatsi. Novetisakagantakeri novakane intiri ityomiani keitavagetankitsirira. Maika mataka vetsikagetaka magatiro. Kantaigakiteri iripokaigakera shintsi isekatakoigakitenara.’ ⁵Kantankicha yogari ikaemaigakerira teratyo inkogaige iriaigera. Paniro iatai itsamaireku, pashinikya iatai impimantavagetaera iaraki. ⁶Impo yogari itovaire yagaigavakeri iromperaneegi koveenkari ipasapsaigavakeri yogaigavakeri. ⁷Ikisamatana-katy koveenkari itigankaigakeri isoraroegite irogaigakiterira gantaigankitsirira ovashi impoigutero ivankoegi

irorori. ⁸Impogini ikantaigiri iromperaneegi: ‘Mataka vetsikagevetaka magatiro kameti iragakeniri notomi itsinanetsite, kantankicha iriroegi nokaemaigavetakarira tera inkametiige, teranika inkogaige iripokaigera, onti ipugatsaigakena.

⁹Maikari maika ariokya piaigake avotsipageku pinkaemaiguterira maganiro tyanirika pineaigake.’ ¹⁰Ovashi iaigake yapatoitaigakeri kametiigatsirira intiegiri terira inkametiige. Iriroegi ipokaigake ikiaigapaake ishatekaitaiganaka pankotsiku.

¹¹‘Impogini ikiapaake koveenkari inkamosoiguterira ikaemaigakerira. Ishonkavetanaka ineitarityo paniro terira irogagutempa kitsagarintsi kañorira yogaguigakarira itovaireegi ipaigunkanirira kameti intentaigakempariniri ikyaenkarira gankitsine itsinanetsite.

¹²Ikantiri: ‘¿Tyara pikantaka viro pikiakera kogapage tera pogagutempa kitsagarintsi pinkañoigakemparira pitovaireegi?’ Kantankicha irirori ikemisantaketyo.

¹³Impo ishonkashiigari iromperaneegi ikantaigiri: ‘Gusoigeri itasagiiku ontiri irakoku maiganakeri okaigakiteri sotsi pavatsaariku intentaigakemparira kaemavaitaigatsirira tsikagisevageigatsirira irai.’ ¹⁴Itovaigavetakatyo ikaemaigunkanirira intimimoigakerira Tasorintsi impogini, kantankicha teratyo intovaike ikogakagai-gunkanirira iriaigakera.”

**Ikogakotagantunkanira
Jeso kametitakerikara
impakenkanira Sesa koriki
(Mr. 12.13-17; Ir. 20.20-26)**

¹⁵Impogini yogari pariseoegi iaigake ikemavakagaigakara iripokashiigakerira Jeso inkogakotagantaigakiterira ineaigakera tyarika inkante, ikogaigaketari inkemaigakerira inkantakera tatarika oita terira onkatinkatero ikantaigirira iriroegi kameti intsavetantaigakeriniri

inkisakagantaigakerira. ¹⁶Impogini iriroegi itigankagarantaigakeri irogame-reegi intiegiri tentaigaririra Erorishi iriaigakera inkogakotagantaigakiterira. Impo yogonkeigapaakara ikantaigiri:

—Gotagantatsirira, nogoigake viro tera pamatagumatempa. Antari pogotagantavagetira katinka pogakero pikamantaigakerira maganiro tyara inkantaigakempa inkematsatasanoigakerira Tasorintsi. Tera tyani pagamaempa, aikiro tera pimpinkumateri matsigenka, pineaigakeritari maganiro ario ikañovakagaigaka. Viro pogotiroitari ikantirira koveenkari Sesa ikantira: ‘Maganirosanotyó jorioegi impaigakena koriki.’ ¹⁷Maika ¿tyara pinkante viro? ¿Kametitake nompagakerira ontirika tera onkametite? ¿Ario nompagakeri ontirika gara nopaigiri?

¹⁸Kantankicha Jeso yogotavaketyo tera kametikya inkantaigiri onti ishinetamampegaigakeri kogapage, nerotyó ikantaigutarityo:

—Viroegi ontityo pishinetamampegaigakena kogapage. ¿Tyara okantakara pikañovintsaigakenara maika? ¹⁹Atsi maigakenanityo pamentaniri koriki ipaganirira Sesa noneakerira.

Iriroegi yamaigakeneri, ²⁰impo yagatakera ineagetakerira ikantaigiri:

—¿Tyani yoka itsirinkakotunkanirira? ¿Tyani shintaro ivairo?

²¹Ikantaigiri:

—Inti koveenkari Sesa.

Ikantaigutarityo:

—Irovoventi intitari tsirinkakotankicha Sesa paigerityo irirori kameti pintsatagaigakeroniri magatiro ikantagetakerira, kantankicha ariotyó pinkañotagaigakempari Tasorintsi aikiro pinkematsatasanoigakerira pintsatagaigakerora magatiro ikantagetakerira.

²²Ikemaigavakerira ikantaigakerira maika oga ikenaiigake yogavageiganake kavako ovashi iaiganai.

**Ikogakotagantunkanira Jeso
anianaenkanira impogini
(Mr. 12.18-27; Ir. 20.27-40)**

²³Impo choeni osamanitanake irirokya aiganankitsi saroseoegi inkamosoiguterira Jeso. Iriroegi inti kantaigatsirira gara yaniaiganai igamaga. Ikantaigapaakeri:

²⁴—Gotagantatsirira, yogari Moisheshi itsirinkanake pairani ikanti: ‘Intimake-rika matsigenka terira intomintempa impo inkamanakerika iokanakero itsinanetsite, aiñorika irirenti irirokya gaerone intomintagaemparoniri kañomataka irironirikatyo tomintari kamankitsirira.’ ²⁵Maika nokogaigavetaka nonkantaigakempira. Pairani itimake paniro notovaire itomintaka 7. Yogari itsitiki yagavetaka tsinane, kantankicha niganki ikamanake tera intomintaganakemparo. Impo irirokya gavetaaro irapitene giatiririra. ²⁶Ario ikañotaka irirori ikamanake tera intomintaganakemparo. Ario ikañovetaka irapitene nigankinirira. Ariompa ipogereanakari maganiro yagaigavetakarora tera intomintagaiganakemparo. ²⁷Impo okamamatityo irorori. ²⁸Maika atsi kantaigena, antari impogini iraniaiganaerika maganiro igamaga, çtyanirikatyo gasanotaerone?, maganirotari yagaigavetakaro.

²⁹Irirori ikantaigiri:

—Viroegi onti pikomuigakaro, teranika pogoigero tyara okanti Itsirinkakagantakerira Tasorintsi, aikiro tera pogoige tyara ikanta yagaveavagetira irirori. ³⁰Impogini iraniaiganaerika maganiro igamaga gatanika tyani gumataatsi tsinane, aikiro tsinane garatyo opimantumataagani iragaigakerora surari, ontitari inkañoiganakempari isaankariite Tasorintsi timaigatsirira enoku. ³¹Maika viroegi onti pikantaigake

gara yaniaiganai igamagapage. çMatsi tera piniavantaigero ikantakerira Tasorintsi pairani?, ikantaketari: ³²‘Nanti Tasorintsisanorira Itinkami Averan, Isaako intiri aikiro Jakovo.’^a çMatsi iriro Tasorintsi Itinkami igamaga? Teratyo iriro, intitari Itinkami niaigankitsirira.

³³Iroero ikemaigavakerira maganiro ikantaigakerira maika yogavageiganaketyo kavako.

**Tyati paio avisake
ontsatagasanotakenkanira
(Mr. 12.28-34)**

³⁴Impogini yogari pariseoegi ikemakoigakerira Jeso yogemisantaigakerira saroseoegi iatashiigakeri iriroegi aikiro ³⁵itentagianakarira paniro gotagantirorira itsirinkakotanakerira Moisheshi inkogakotagantapaakerira ineagakerira tyarikara inkante kameti ontimakeniri onkenantakemparira inkisakagantaigakerira. Impo ikantiri: ³⁶—Gotagantatsirira, pogotitari itsirinkakotanakero Moisheshi pairani magatiro ikantagetirira Tasorintsi. Maika nokogavetaka pinkamantaigakenara tyati paio avisake okametitakera ontsatagasanotakenkanira.

³⁷Yogari Jeso ikantiri:

—‘Pintasanovagetanakemparityo Pitinkami Tasorintsi pisuretasanotanakemparira, aikiro pimpanirotasanotanakakerira irirori.’^b ³⁸Paio avisake okametitakera ontsatagasanotakenkanira oka, avisagetakero magatiro ikantagetakerira Tasorintsi. ³⁹Ogari apitene onti kantatsirira: ‘Pintsarogakagavagetakemparira pitovaire pinkañotagasanotakempatyo pitsarogakagara vikiro.’^c ⁴⁰Yogari tsatagasanotakeronerira oka mataka itsatagetakero magatiro itsirinkakogotanakerira Moisheshi, ontiri aikiro

magatiro yogotagantaigirira kamantan-
taigatsirira.

Tyani yashikitanakeri Kirishito
(*Mr. 12.35-37; Ir. 20.41-44*)

⁴¹Aiñokiyara inaigake pariseoegi
⁴²yogari Jeso ikantaigiri:
—¿Tyara pikantaigi viroegi? ¿Tyani
yashikitanakeri Ikogakagerira
Tasorintsi impegakempara Pigoveenka-
riegite?

Iriroegi ikantaigiri:
—Inti yashikitanakeri Iravi.

⁴³Yogari Jeso ikantaigiri:
—Iroroventi ¿tyara okantakara pairani
iniakagerira Isure Tasorintsi Iravi
ipegakerira Itinkami?, ikantaketari maika:

⁴⁴Yogari Tasorintsi ikantakeri
Notinkami:
Pirinite nonampinaku nakosanori-
raku pintentakenara
kigonkero nagaveaigakerira
maganiro kisashiigakempirira.⁷

⁴⁵Irorotari ikantakerira: ‘Notinkami’,
¿tyara inkantakempara iyashikitakerira?

⁴⁶Impogini tera intimumate paniro
gaveankitsinerira irogipigakerira
neroty ovashi teraty tyani kogakotu-
mataerine.

**Ikantakera Jeso gara yogiatakoigagani
pariseoegi intiegiri gotagantaigirorira
itsirinkakotanakerira Moiseshi**
(*Mr. 12.38-40; Ir. 11.37-54; 20.45-47*)

23 ¹Impogini Jeso iniaigakeri
patoitaigankicharira intiegiri
irogamereegi ikantaigiri: ²Yogari
gotagantaigirorira itsirinkakotanakerira
Moiseshi intiegiri pariseoegi ineaigake
paniro iriroegi yagaveaigiro yogotagan-
taigirora itsirinkakotanakerira Moiseshi.
³Nonkantaigakempi nanityo kematsaige-
rityo pintsatagaigakerora magatiro

yogotagaigakempirira, kantankicha gara
pikañoigari iriroegi. Ontitari yogotagan-
taigavetakaro kogapage, kantankicha
tera intsatagasanogero. ⁴Onti yovashiga-
kovageigakari matsigenkaegi yogotagai-
gakerira posante ikantaigakeri intsatagai-
gakerorika magatiro ario pinkante
irishineventaigakempari Tasorintsi,
kantankicha iriroegi tera intsatagumai-
gero. ⁵Ontityo ineaigantavintsagaikara,
neroty antari yamatsaitakoigarora
itsirinkakotanakerira Moiseshi yovashi-
gagageigamataroty yamatsaitakotantaiga-
karorira ariosarantapagerikatyo kara.
Ario ikañotagaigakaro aikiro yomareta-
koigarora irakoegiku.^d Antari iniaigirira
Tasorintsi onti yogaguigaka imanchaki
timankitsirira oshiroki ogatsantsapageni.
⁶Antari ikaemaigaganira isekataigakem-
para tyarika kara yapatovageigara onti
ikogaigi iroviriniigakenkanira intenta-
gantaigakenkanira kaemantankitsirira.
Ario okañotaka aikiro iaigira pankotsiku
yapatoitantaigarira ikogaigi iroviriniiga-
kenkanira ipiriniigira tinkamiigatsirira.
⁷Aikiro iaigira opimantagetaganira
arakintsipage ontiri ogetaganirira
ikogaigake iriniaigavakenkanira
inkañotagaigakenkanira iniaiganira
itinkamipage ontiri aikiro inkantaigaken-
kanira gotagantaigatsirira.

⁸Kantankicha viroegi gara pikogaigi
inkantaitakempira gotagantatsirira,
aiñotari paniro Gotagaigimpirira,
narotari. Maganiro viroegi ario pikaño-
vakagaigaka. ⁹Akari aka kipatsiku gara
itimumaigi pikantaigirira: ‘Apa’,
aiñotari paniro Piri timatsirira enoku.
¹⁰Aikiro gara pikogumaigi impegaita-
kempira itinkamiegi, aiñotari paniro
Pitinkami, narotari. ¹¹Yogari visavagei-
gakeririra itovaireegi inti yoga tyanirika
mutakotantavagetatsirira tsikyatyato

irirori ikañotagaka nampiriantsi.

¹²Imirinkatari ventakovagetacharira impotetashivagetakempari Tasorintsi irogipashiventavagetakerira. Irrokya terira iraventakotempa irishineventakempari inkavintsavaagetakerira.

¹³“iMaikaniroro pantsipereavageigake viroegi gotagantaigirorira itsirinkakotana-kerira Moiseshi vintiegiri pariseoegi kametitamampegaigacharira! Tera pinkogaigenika pinkematsaigakerira Tasorintsi kameti pintimimoigakeriniri impogini irapatoitaigakerira maganiri kematsaigiririra impegakempara Igoveenkariegite, aikiro antari pogotagai-gakerira kogaigavetankicharira inkematsaiganakerira ontityo povashigakovageigakari pikantaigakerira intsatagageigakerora posante neroty tyampa inkantaigakempa inkematsaigakera iriroegi aikiro.

¹⁴iMaikaniroro pantsipereavageigake viroegi gotagantaigirorira itsirinkakotana-kerira Moiseshi intiegiri pariseoegi kametitamampegaigacharira! Ontitari pamatavinaigakero ogamakotagapage pitsonkatapitsageiganakerora ashintageigarira. Aikiro pineakagantaigakara akaenkintityo piniaiganakeri Tasorintsi teraty aiñokya pagataige. Nokantantai-gakempirira viroegi paio pavisaigake inkisashivageigakempira impogini.

¹⁵“iMaikaniroro pantsipereavageigake viroegi gotagantaigirorira itsirinkakotana-kerira Moiseshi intiegiri pariseoegi kametitamampegaigacharira! Viroegi papagiteavageiganakaro kipatsi ontiri omaraani nia pinkematsatagaigakerira paniro matsigenka inkañoiganakempira viroegi. Antari ikematsaigakempira pairotyo yogagavagetanaka ikañovagetakara yavisavageiganakempityo viroegi. Irerotari iriatantakemparira morekariku intagakempara.

¹⁶“iMaikaniroro pantsipereavageigake viroegi, pogotagantaigavetakatari

kantankicha teraty pogotumaige! Onti pikantaigake: ‘Tatarika oita pinkantai-gake irororika piniakoigake ivanko Tasorintsi pinkantaigakera: Nontsoega-kemparika okyarikatyo tuanankitsi ivanko Tasorintsi, impo garika pitsatagiro pikantakerira kametitaketyo. Kantankicha irororika piniakoigake kori nankitsirira ivankoku Tasorintsi ario pinkante pintsatagakeroniroroty. Garatyo pikantatigumatiro.’ ¹⁷iTeraty pogotumaige viroegi! ¿Matsi tyatimpatyora paio avisake okoveenkatakera, irororikara ivanko Tasorintsi intirika kori nantakarorira? Gamera iroero ivanko gametyo ikametiti kori. ¹⁸Impo pikantai-gake aikiro: ‘Tatarika oita pinkantaigake irororika piniakoigake itagantaganirira piratsipage yamaganirira Tasorintsi pinkantaigakera: Nontsoegakemparika asaty ompegakempa, impo garika pitsatagiro pikantakerira kametitaketyo. Kantankicha irororika piniakoigake piratsi vanketankicharira itagantaganiriraku, ario pinkante pintsatagakeroniroroty. Garatyo pikantatigumatiro.’ ¹⁹iTeraty pogotumaige! ¿Matsi tyatimpatyora visankitsi ikoveenkatakera, irororikara piratsi ontirika itagantaganirira? Gamera iroero itagantaganirira gametyo ikametiti irirori. ²⁰Yogari niakotirorira itagantaganirira piratsi yamaganirira Tasorintsi teranika patiro iriniakote irorori, iniakotakerityo aikiro piratsi vanketankicharira. ²¹Ario ikañotaka yoga niakotirorira ivanko Tasorintsi teraty intagati iroero iriniakote ivanko, iniakotakerityo irirori aikiro Tasorintsi shintarorira. ²²Ario okañotaka aikiro tyanirika niakotiro inkite intityo iniakotake Tasorintsi Igoveenkariegite maganiri, irirotari shintaro.

²³“iMaikaniroro pantsipereavageigake viroegi gotagantaigirorira itsirinkakotana-kerira Moiseshi vintiegiri pariseoegi

kametitampempegaigacharira! Tatarika oita pashintumaiga ontirika mentashi, anishi ontirika komino pipagarantaigiri^e Tasorintsi, kantankicha pimagisantavageigakero pairorira avisake yogotagaigakempirira ikantakera pintsatagageigakerora magatiro ikantagetirira, aikiro pintsarogakagaigakempirira pitovaire negintekyara pogaigakeri. Kametitaketyo pipagarantaigakerira Tasorintsi pashintageigarira, kantankicha gametyo pimagisaingiro otovaire ikantaigakempirira. ²⁴iPogotagantaigavetakaro Iriniane Tasorintsi, kantankicha teratyo pogotumaigero viroegi! Onti pogotagantavintsaigake intsatagaigakerora tesakonarira inkogero Tasorintsi, irorkya ikogasanotirira tera pogotagantaigero.

²⁵“iMaikaniroro pantsipereavageigake viroegi gotagantaigirorira itsirinkakotakerira Moiseshi intiegiri pariseoegi kametitampempegaigacharira! Pikogaigakeri ineaigakempira maganiroro arisano pikematsatasanoigakeri Tasorintsi, kantankicha intagati pipiriniventavageigi pamatavinaigakerira matsigenkaegi pagutageigakerira yashintageigarira. Kañomataka intagatira okivagani pamoko ontiri perato otishitaku antari oteniku pairatamatake potsitasematake. ²⁶iViroegi pariseoegi teratyo pogotumaige! Atsi negintetasanoigempanityo pisureku kameti ineaanoitakempiniri negintetasanoigamatakavi.

²⁷“iMaikaniroro pantsipereavageigake viroegi gotagantaigirorira itsirinkakotakerira Moiseshi vintiegiri pariseoegi kametitampempegaigacharira! Ontitari pikañoigakero ikitatantaganirira igamaga. Onti otiritantunkani kutari kameti oneakenkaniniri onkametivagete, kantankicha antari tsoompogi

pairatamatake inti shatekankicha itonki kamatsirini yovesegakara. ²⁸Ariotari pikañoigakero viroegi ontu pikametitampegaigakero kogapage pineakagantagakara kameti ineaigakempiniri matsigenkaegi, kantankicha antari pisureku tera pinegintevageigempa ontu pisuregisevageigakero terira onkametite.

²⁹“iMaikaniroro pantsipereavageigake viroegi gotagantaigirorira itsirinkakotakerira Moiseshi intiegiri pariseoegi kametitampempegaigacharira! Ontitari povetsikashiigakeri isuretakitantaigaenkanirira kamantantaigatsirira kamaigankitsirira pairani, aikiro pineginteigakeri ikitatantaigarira negintetasanoigacharira kameti isuretakoigaenkaniniri. ³⁰Impogini pikantaigi: ‘Ariome nontimaigeme pairani itimaigira yashikiiganakerira gametyo notentaigari yogagakerira kamantantaigatsirira.’

³¹Antari pikañoigakerora maika vikiirotyo kañotagantaigankicha, pikantaigakeri vintiegi iyashikiiganakerira gaigakeririra. ³²iMaikari maika atanatsira pinkañoigakempari yashikiiganakempirira pairani!

³³“iVintiegi vetsikageigirorira posantepage terira onkametite! Maikari maika ¿tyanimpatyogavisaakoigakempine ganiri pitagaiga morekariku? ³⁴Irorotari nontigankimotantaigakempirira kamantantaigatsirira pairorira yogovageigi intiegiri gotagantaigatsirira, kantankicha impogini pogagarantaigavakeri pinkentakotagartaigavakerira, pashinikyapimpasapavakeri pankotsiku papatoitantapiniigarira, pinkisashivageiganakemparityo pimpatimavageiganakeri itimaveigira. ³⁵Viroegitari kañotagantaigakeri yogantaigunkanirira kematsaigiririra Tasorintsi pairani, iketyo yogiivatunkani Averiterira inkañoavagetempaf ikarataganunkani

e 23.23 Pipagarantaigiri: irinianeku virakocho ontu okantake *ustedes separan para Dios la décima parte* (ontu onkantakera 1/10). **f 23.35** Jen. 4.3-8.

Sakariashi itomi Verekiashi. Yogari Sakariashi onti yogunkani anta ivankoku Tasorintsi inavetakara aikyara itagantaganirira piratsipage. ³⁶Arisanoty nonkanta-sanoigakempi maikaniroro inkisashiigempi Tasorintsi, vintiegitari gakagantaigakeri.

**Jeso iragatsikaigakarira
Jerosarenkunirira**

(Ir. 13.34-35)

³⁷“iJerosarenkunirira, Jerosarenkunirira, pogaigirira kamantantaigatsirira,⁸ aikiro pipitankaigirira itigankimoigakempirira Tasorintsi inkenkitsatimoigakempirora Iriniane! Pineai giro atava osavogai-girira otyomiani, nokoganagevetakatyo naro nonkañotagaigakempimera maganiro viroegi nampatoitaigakempimera pinkematsaigakenara, kantankicha viroegi teraty pinkogumaige. ³⁸Maikari maika ganigetyo inimoigaimpi Tasorintsi panivani pampuntavageigaempa. ³⁹Nonkantaigakempi maika gara pineaigaana kigonkero aganakempara pinkantaigavakenara: ‘iPairo ikametiti yoga itigankakerira Tasorintsi impegakempara Agoveenkariegite!’”

**Jeso ikantakera ogashiriakenkani
ivanko Tasorintsi**

(Mr. 13.1-2; Ir. 21.5-6)

24 ¹Iro ikontetanaira Jeso ivankoku Tasorintsi iriatanaera parikoti yaññoniiganakari irogamereegi ikantaigakerira:

—Gotagantatsirira, atsi geroratyo kavako oga ivanko Tasorintsi.

²Kantankicha yogari Jeso ikantaigiri:

—¿Pineaigakero magatiro oka? Arisano nonkantaigakempi impogini gara otimumatai patiro mapu vikotaachanerira, magatiroosanoty ogashiriagetakenkani.

**Tyara onkantanakempa impogini
ontsonkatanaempara kipatsi**

(Mr. 13.3-23; Ir. 21.7-24; 17.22-24)

³Impogini itonkoaignake iaiganakera otishiku Orivoshi, ario ipirinitake Jeso kara. Impo yogari irogamereegi yaññoniigapaakari ikantaigapaakeri:

—Nokogaigake pinkamantaigakenara tyatirikara agantakempa ontsonkatanaemparira inkaaratirira pikantakerira ogashiriagetakenkanira. ¿Tyatirikara nogotantaigavakempa pimpigantaemparira impogini ontsonkagetanaempara magatiro kipatsi?

⁴Yogari Jeso ikantaigiri:

—Tsikyanira yamatavinaitimpikari, ⁵iripokaigaketari tovaini matsigenkaegi kantaigankitsinerira: ‘Nanti Ikogakagakerira Tasorintsi impegakempara Pigoveenkariegite’, impo inkematsaigakeri tovaini. ⁶Impogini pinkemakoigavakeri pashini iromanatavakagaigakempara aiñoni, ontiri aikiro pashinipageku kipatsi, kantankicha viroegi gara pitsarogaigi. Arioniroroty onkañotanakempari maika, kantankicha gatata aga ontsonkageta-naempara magatiro kipatsi. ⁷Yogari timageigatsirira pashinipageku kipatsi iriatashiigakeri timageigatsirira parikotipageku iromanatavakagaigakempara. Ario inkañoi gake koveenkariegi intimagerantaigake intigankaigakeri isoraroe gite iriatashiigakerira pashini koveenkari iromanatavakagaigakempara irogavagaigakempara. Aikiro ontimaenkagetanake tasegagantsi, ontiri aikiro ontininkagematanakempatyo kipatsi. ⁸Onkañogetanakemparika maika iroro ontsitintanakenkempa antsipereavagetanakenkanira.

⁹“Impogini iragaiganakempi iramaiganakempira inkisakagantaigakempira irogakagantaigakempira. Maganirosano-

tyo inkisaviiganakempiro pikematsaigakenara. ¹⁰Inkonogagarantaigakempa kematsaigavetanarira irapakuaiگانا-kena ganige ikematsaigaana, onti inkisashivakagaiganakempa, aikiro intsoeventavakagaiganakempa iragakagantavakagaiganakempara. ¹¹Inkoneage-matanaketyo aikiro matavitantaigatsirira inkantaiganakera: ‘Onti nokenkitsatakiogi Iriniane Tasorintsi’, kantankicha iriroegi onti iramatavinaigakerira tovaini kematsaiganarira irapakuakagaiganakerira ganige ikematsaigaana. ¹²Omposantegisevagetanakempatyo kara terira onkametite, ganige itavakagaigaa matsigenkaegi. ¹³Kantankicha yogari atanatsirira inkematsatanotanakena iriro pinkante irogavisaakotakenkani. ¹⁴Inkenkitsatimovageiganakenkanityo kara maganiro matsigenkaegi inkamantaigakenkanira tyara inkantaigakempa kameti irogavisaakoigakeriniri Tasorintsi imegakempara Igoveenkariegite. Ario onkañotakempa maika kameti iroigoageniri maganiro. Impogini ario ontsonkagetanaempa magatiro.

¹⁵⁻¹⁶“Yogari kamantantatsirira Iraniere pairani itsirinkakotanakerira samatsanatakeronerira ivanko Tasorintsi impogini. Maika viroegi pineaigakeririka ario irinake anta pinkatimaiganakempara pishigaiganakera otishipageku. Ario inkañoiگakempa aikiro maganiro timaigatsirira Joreaku irishigaiganake. (Tyanirika niavantakotakerone oka isuretaketakemparokameti inkemavakeroniri.) ¹⁷Tyanirika pitankitsine otishitapankoku ivanko irishigapanute garatyo ikiapanaati iragagetapanutera tatapagerika oita. ¹⁸Tyanirika pitankitsine itsamaireku garatyo iatapanaati ivankoku iragapanaa-tera apitene imanachaki. ¹⁹iMaikaniroro antsipereavageige tsinaneegi kamonkiigankitsinerira ontiri tsonitagaigankitsinerira, pairotari avisaigake antsipereasano-

vageigakera oshigaiganakera! ²⁰Viroegi niaventaigempatyo ganiri okatinkatiro pishigaiganakera katsinkagiteriku ontiri aikiro kutagiteriku apishigopireantaganirira, ²¹pairotari antsipereavagetakenkani avisaavagetakeroty magatiro atsipereagetunkanirira okyasanokyara yovetsikagetake Tasorintsi kipatsi ovashi maika. Aikiro gara oneimataagani impogini. ²²Kantankicha gasakona otovaigavageti kutagiteri iratsipereavageigakera ganiri ipogereiga maganiro. Isuretakoigakemparitari Tasorintsi maganiro ikogakagai-gakerira pairani okyasanokyara inkematsaigakerira.

²³“Impogini tyanirika kantaigakempine: ‘Neri yoka Ikogakagakerira Tasorintsi imegakempara Agoveenkariegite’, garatyo pikematsaigiri. Ario onkañotakempa inkantaigakempirika: ‘Año inake anta’, garatyo pikematsaigiri. ²⁴Iripokaigaketari kamantantaigatsirira matagavageigankicharira intiegiri aikiro pashini kantaigankitsinerira: ‘Nanti Ikogakagakerira Tasorintsi imegakempara Pigoveenkariegite.’ Aikiro irovetsikageigamate terira oneimagetenkani kameti iramatavinaiganakeriniri tovaini. Irimaigavetanakemparityo kematsaigiririra Tasorintsi, kantankicha garatyo yagaveimaigiri. ²⁵Nokamantaigakempi magatiro maika tekyara agempa kameti pogoigakeniri ganiri yamatavitumaigimpi impogini. ²⁶Inkantaigakempirika: ‘Neri yonta nankitsirira osarigagitetapaakera’, gara piaigi pinkamosoiگuterira. Aikiro inkantaigakempirika: ‘Año kara tsompogi’, gara pikematsaigiri. ²⁷Pineai-girotari kareti tyara okantaka okantira tsarere tsarere, tera ario maani onkoneagitete, magatirotyo ontenenkagiteapinitakaro. Ario inkañotapaempa Kañotasanotakaririra Matsigenka iripokaera, maganirotyo inasanoigavakeri. ²⁸Antari

panikyara ontsonkatanakempa magatiro katsiketyotari iripokapaake inkomuta-gaigapaakerira kañovageigacharira, kañomataka igamaga tyarika kara inoriaka ineventumatarikara samponero katsiketyo iparigashitapaakeri.

Tyara onkantanakempa impigaatera Jeso
(*Mr. 13.24-31; Ir. 21.25-33*)

²⁹“Iroro avisanakera tsipereagantsi ‘irokyara tsivakanankitsine poreatsiri intiri aikiro kashiri. Yogari impokiropage irashiriageta-nakempa, ganigetari ikusotai.’

³⁰“Impogini oneavakenkani anta inkiteku tyarika onkovoreavagetanake kara ovashi iroro ogotantakenkani panikyasano iripokapae Kañotasanoatakarrira Matsigenka. Ogatyo inkenaigake iriragaiganakempa maganiro kipatsikunirira inkaemavaitaiganakera: ‘Inaa, inaa, maikaniroro nonkame.’ Impogini ineavakenkani Kañotasanoatakarrira Matsigenka iripokapaakera inkenapaakera menkoriku inkoveenkavagetapaakera, aikiro iragaveavagetapaakera iravisaigakerityo maganiro. ³¹Impogini ontivotanakenkanira tivorintsi intigankai-gakeri isaankariite iriaigakera intsotenka-giteaiganakemparora magatiro kipatsi irapatoitaigakerira irashiegi Tasorintsi.

³²“Maika kemisantaigena nonkantai-gakempira. Pineaigirora igera okyaenkara mechoshiatanaatsi oshi pogoigake panikya aganaempa osariganaera.

³³Arioty onkañotakempa impogini pineaigavakerorika onkañotanakempara nokamantaigakempirira maika iroro pogotantaigavakempa panikyasano impigaate Kañotasanoatakarrira Matsigenka. ³⁴Arisanoty nonkantaigakempi magatirotyo oka nokantaigakem-

pirira maika ontsatagagetanakempatyo tekyanaka pimpogereaigempa viroegi. ³⁵Ogari inkite ontiri kipatsi ontsonkage-tanaempa, kantankicha ogari nokantagetakerira garatyo okantatigumata, ontityo ontsatagagetanakempa magatiro.

Tera ogotenkani tyati impigantaatempa Jeso

(*Mr. 13.32-37; Ir. 17.26-30, 34-36; 12.41-48*)

³⁶“Tera tyani gotumatatsine tyati impigantaatempa Kañotasanoatakarrira Matsigenka. Ario ikañotaka irirori tera irogote. Aikiro isaankariite Tasorintsi tera irogoige. Panirotyo ikantakara Tasorintsi irirori yogotakerora.

³⁷“Antari impigaera onti onkañotakem-paro aiñokyara itimaveta Noe pairani^h

³⁸tekyanaka irogivarigero Tasorintsi omarane inkani ampamankagiteanakerora magatiro kipatsi. Maganirosanoty shinevageigamatakaty, isekataigakara, yoviikaigakara, yagaigakera tsinane, ipavakagaigakara irishintoegi oimentai-gakempara, ovashi aganaka kutagiteri ikiantanakarira Noe tsonpogi yomatetakarira ivitoku okantaganirira areka.

³⁹Impogini okomutagaigapaakeri inkani opogereasanoigakerityo kara. Arioty onkañotakempa impogini iripokaatera Kañotasanoatakarrira Matsigenka ontityo inkomutagantapaakempa.ⁱ ⁴⁰Antari iripokaatera irinaigake piteni matsigenka itsamaireku, paniro iraganakenkani, yogari irapitene iokanakenkani. ⁴¹Ario onkañoigake piteni tsinane ompitaigake ontononkavageigakera, paniro aganakenkani, ogari apitene okanakenkani.

⁴²“Irorotari nokantantaigakempirira pinkantanakara pogiaigavaeri Pitinkami, tera pogoigenika tyati impigantaatempa. ⁴³Atsi sureigemparaty, intimera pashini shintankicharira ivanko irogotemera

tyatirikara iripokantakempa koshinti, ¿matsi ario irimagake? ¡Garatyo imagi! Ontityo inkireaventakero iaraki ganiri ikoshitagani. ⁴⁴Irorotari nokantantaiga-kempirira pinkantakanira pineginteva-geigakempa pogiaigavaerira Kañotasa-notakaririra Matsigenka impigaatera, gatanika pogoiginika tyati impigan-taempa, ontitari katsiketyo inkomutagai-gapaempi.

⁴⁵“Onti pinkañoigakempari nampirian-tsi govagetatsirira kematsatasanotiririra shintaririra. Pine intimera shintacharira ironampiriaegi impo iriatakera parikoti inkantanaeri paniro ironampiria ineaigaerira maganiro irapinampirian-tsiegitene impaigaeri omirinka isekaegi. ⁴⁶⁻⁴⁷Antari iripokaerika inepaakeririka itsatagasanotakero ikantanakeririra, ariompatyo irishineventasanotanakem-pariri inkantanakerira: ‘Maika nokogake pineagetakenarora magatiro nashintage-tarira.’ Impo irirori irishinevetakem-patyo kara. ⁴⁸Kantankicha antari intrika terira inkematsatante gara yogiavairi shintaririra onti inkantake: ‘Gatarorokari ipokai’, ⁴⁹ovashi intsititanakero inkisakisaiganakerira irapinampiriant-siegitene, aikiro inkonoivageiganakempari shinkisenari onti impiriniiventuntetanake isekatavetakempara, aikiro ishinkiva-getakempara. ⁵⁰Impo katsiketyo inkomu-tagapaakeri shintaririra ⁵¹inkisashivage-tapaakemparityo kara intentagantaiga-kempirira kematsatamampegaigacharira kogapage iokakerira parikoti inkaema-vavagetake iratsikagisevagetakerora irai.

Jeso ikantakotakerora impegakempara Tasorintsi Igoveenkariegite maganiro ikañotagakaro 10 tsinaneegi okyaenkarira antaroiganankitsi

25 ¹“Maika nonkantakotakero tyara onkantanakempa impogini irapatoitaigakerira Tasorintsi maganiro

kematsaigiririra impegakempara Igoveenkariegite, onti nonkañotagakem-paro 10 tsinaneegi okyaenkarira antaro-iganankitsi. Iroroegi amakoiganake omecheroegite oaignanakera ontonkivoaigavakemparira gankitsinerira tsinane. ²Onaigake 5 terira osuretsanovagei-gempa. ³Iroroegi amaigavetanaka omecheroegite, kantankicha tera amakoig-anake aseite ompiajagavaera paita intoatanakempara. ⁴Ogari otovaireegi iroro pinkante amakoiganake. ⁵Impo tekyatanika aiñokya iripoke gankitsine-rira tsinane opochokiigamatanaketyo ovashi omagaiganake. ⁶Impo onigankigi-tetanakera okemaigutatyo okaemunka-nira: ‘¡Pokapaake gankitsinerira tsinane! ¡Piaigekario pintonkivoaigavakemparira!’ ⁷Ogaty okenagake otinajaiganaka maganiro onoshikakoiganakera omeche-roegite. ⁸Ogari terira amakoige oaseitete okantaigiro shintakoigankicharira: ‘Pajaigenakario maani piaseitete panikya nontsivakakoiganake.’ ⁹Kantankicha iroroegi okantaigiro: ‘Garorokari nopajai-gimpi. Antari nompajaigavetempi onti nontsoatakoiganakempa shintsi maganiro. Piaigetyo pimpunaventaigaki-tera pashini.’ ¹⁰Kantankicha iroro oaignavetanakara ompunaventaigemera mataka gonketapaaka gankitsinerira tsinane. Ogari makoigankitsirira oaseitete okiaiganake tsompogi otentai-gakarira, oga okenake ashitanunkani shitakomentontsi. ¹¹Impo opokaigaveta-paaka otovaire oneaigapaakero shitaka okaemaigapaake okantaigi: ‘¡Shireakoig-enakario!’ ¹²Kantankicha irorori ikantaigavakero: ‘¿Matsi noneaigimpira-tyo kameti nashireakoigakempiniri?’ ¹³“Irorotari maika nonkantantaiga-kempirira pinkantakanira pineginteva-geigakempa, tera pogoiginika tyatirikara impigantaatempa Kañotasa-notakaririra Matsigenka.

**Jeso ikantakotairora imegakempara
Tasorintsi Igoveenkariegite maganiro
ikañotagakaro matsigenka
shintavagetacharira koriki
(lr. 19.11-27)**

¹⁴“Maika nonkantakotaero tyara onkantanakempa impogini irapatoitai-gakerira Tasorintsi maganiro kematsai-giririra imegakempara Igoveenkarie-gite, onti nonkañotagakemparo matsigenka shintavagetacharira koriki. Panikyara iriatake pashniku kipatsi ikaemakagantaiganakeri maganiro iromperaneegi ipaiganairi koriki irogitovaigaigakerira. ¹⁵Yogari gotasanotankitsirira ipanakeri 5,000 korikimenta. Yogari irapitene intagani ipanakeri 2,000. Yogari yomavatakarira intagani ipanakeri 1,000. Impo iavagetake samani. ¹⁶Yogari ipanakerira 5,000 yagantaari pashini 5,000. ¹⁷Ario ikañotakari irapitene ipanakerira 2,000 yagantaari pashini 2,000. ¹⁸Kantankicha yogari ipanakerira 1,000 iatake ikigantashitakeri kipatsiku ikitatakerira.

¹⁹“Impogini yavisavagetanakera tovaini kashiri ipigaa shintaigaririra ikantaiga-paakeri: ‘Tsame aneaigakerira koriki akarikara pagaigake.’ ²⁰Yogari ipanakerira 5,000 yamakeneri pashini 5,000 yagantakaririra igorikite ikantiri: ‘Intagani pipanakena 5,000, neri yoga pashini nagantakaririra pigorikite.’ ²¹Yogari shintaririra ikantiri: ‘Kametitake, pitsatagakerotari nokantakempirira. Maikari maika pikematsatakenatari, nokogake pineagetakenarora pashini pairorira avisakeri yoga 5,000. Taina ashinevageigakempara.’ ²²Yogari irapitene ipanakerira 2,000 yamakeneri pashini 2,000 yagantakaririra igorikite ikantiri: ‘Intagani pipanakena 2,000, maika neri yoga pashini 2,000 nagantakaririra pigorikite.’ ²³Yogari shintaririra

ikantiri: ‘Kametitake, pitsatagakerotari nokantakempirira. Maikari maika pikematsatakenatari, nokogake pineagetakenarora pashini pairorira avisakeri yoga 2,000. Taina ashinevageigakempara.’

²⁴“Kantankicha yogari yomavatakarira ipanakerira 1,000 ikantiri shintaririra: ‘Noneimpitari vinti terira pintsarogakagantavagetempa, aikiro vinti pairorira patsipereakagantavageta pantavagetagantira pagakera tovaini koriki. Aikiro onti pagantakari koriki kogapage tera pantavagetumate. ²⁵Irorotari nopinkantakempirira noantakarira nokitatuturira pigorikite. Maika neri yoga pipanakenarira.’ ²⁶⁻²⁷Yogari shintaririra igorikite ikantiri: ‘Virori vinti terira pinkamete, vinti peranti, iroroventira pogotaketari natsipereakagantavagetakera nantavagetagantira kogapage nagakera nogorikite, aikiro nagantarira koriki kogapage tera nantavagetumate, ðtyara okantakara tera pimperi nogorikite pinantavagetatsirira pagantaemparimera pashini, impo nopokavetaara maika pimpavaenarime?’ ²⁸Ishonkashiigari naigankitsirira kara ikantaigiri: ‘Gapitsaigeri yoga 1,000 korikimenta nopavetakaririra pimpaigakerira gankitsirira 5,000. ²⁹Pairotari impasanotakenkani tyanirika shintasano-tankicharira, kantankicha yogari terira irashintavagetempa irogapuntarenkapitsatakenkanityo yashintagevetakarira. ³⁰Maika yokari yoka nomperane terira inkematsatante maiganakeri pokaigakiterira sotsi pavatsaariku intentaigakemparira kaemavaitaigatsirira tsikagisevageigatsirira irai.’

**Tyara inkantaigakenkani matsigenkaegi
impogini imegakempara Jeso
Igoveenkariegite maganiro**

³¹“Maika nonkantaigakempi impogini impigaera Kañotasantakaririra Matsigenka inkoveenkavagetapaaketyo

intentaigapaakemparira isaankariite impegakempara Igoveenkariegite maganiro. ³²Irapatoventavageigapaa-kemparityo maganiro matsigenkaegi. Irirori irashirikoigavakeri inkañotagaiga-kemparira sentaigiririra ovisha yashirikoigirira irovishate ganiri ikonoitari igaverate. ³³Yogaegiri kematsaigiririra irogaigavakeri irakosonoriraku. Yogaegiri terira inkematsaigeri irogaigavakeri irampateku. ³⁴Impogini inkantaigakeri naigankitsirira irakosonoriraku: 'Tainaegi viroegi ikavintsajaigakerira Apa pashintaigakemparora magatiro yovetsikaigakempirira. Pairani okyasanokyara yovetsikaigetake kipatsi viroegitari isariaigaka inkavintsajaigakempira. ³⁵Natsipereavagetira notasegane viroegi pipaigakena nosekatakara. Nomirevagetira pipaigakena noviikakara. Tyarikara nanuivage-take pikaemaigakena pivankoku nomagi-moigakempira. ³⁶Notsonkasetakovageta-tera viroegi pipatsaraigakena nogagutaara. Nomantsigavagetira viroegi pitsarogakagaigakena pipokaigake pikamosoigutanara. Aikiro yashitakoitanara pipokaigake pikamosoigutanara.' ³⁷Impo yogari kematsaigatsirira inkantaigakeri: 'Notinkami, ¿tyara noneaigakempira kara pitasegakera nopaigakempi piseka? ¿Tyara kara noneaigakempira pimiretakera nopaigakempi pimire? ³⁸¿Tyara kara noneaigakempira panuivagetakera nokaemaigakempi pimagimoigakenara? ¿Tyara kara noneaigakempira pitsonkasetakovagetanakara nopatsaraigakempi pogagutaara? ³⁹¿Tyara kara noneaigakempira pimantsigatakera, aikiro yashitakoitakempira noaigake nokamosoigutimpira?' ⁴⁰Kantankicha irirori inkantaigakeri: 'Arisanoty nonkantaigakempi antari pitsarogakagumaiga-

karira paniro yoga kematsatanarira terira impaitumatempa, kañomataka nantinirikatyo pitsarogakagaigaka.'

⁴¹"Impo inkantaigakeri yogaigavakerira irampateku: 'Maika piaige viroegi parikoti anta morekariku garira otsivakumati yovetsikashitunkanirira kamagarini intiegiri itovaireegi, ikisashiigakempitari Apa. ⁴²Natsipereavagetira notasegane tera pimpaigena nosekatakempara. Nomirevagetira tera pimpaigena noviikakempara. ⁴³Nanuivagetira tera pinkaemaigena pivankoku nomagimoigakempira. Notsonkasetakovagetara tera pimpatsaraigena nogagutaempara. Nomantsigavagetira ontiri aikiro yashitakoitanara tera pitsarogakagumaigena pimpokaigakera pinkamosoigutenara.' ⁴⁴Iriroegi inkantaigakeri: 'Notinkami, ¿tyara kara noneaigakempira pitasegakera, panuivagetakera, pimiretakera, pitsonkasetakovagetakera, pimantsigatakera, aikiro yashitakoitakempira tera nontsarogakagaigempi?' ⁴⁵Irirori inkantaigakeri: 'Arisanoty nonkantaigakempi, terika pitsarogakagaigempari yogaegi ikantaganirira tera impaitumai-gempa, kañomataka nantinirikatyo pikisaigake tera pitsarogakagumaigena.' ⁴⁶Maganiro yogaegi iriaigake inkantakanira intagaigakempa morekariku. Kantankicha yogari kematsaigakeririra Apa onti iriaigake enoku, inkantakani intimaigake gara ineimaigairo igamane."

Isarianunkanira Jeso iragakagantakenkanira

(Mr. 14.1-2; Ir. 22.1-2; Jn. 11.45-53)

26 ¹Yagatakera Jeso yogotagaigakerira irogamereegi ikantaigiri: ²—Viroegi pogoigaketari pitenivati kutagiteri agantakemparira Pasekoa.^j Iroro iragakagantantakenkani Kañotas-

notakaririra Matsigenka inkentakota-gantakenkanira.

³Impo yapatoitaigaka ivampatuireku Kaipashi maganiro itinkamiegi saseroro-teegi, gotagantaigirorira itsirinkakotana-kerira Moiseshi intiegiri itinkamiegi jorioegi. Yogari Kaipashi inti itinkamisanorira saseroroteegi. ⁴Ario kara ikemavakagaigaka iramatavinaigakerira Jeso iragakagantaigakerira irogakagantaigakerira. ⁵Kantankicha ikantaigake: —Antari avisanakera Pasekoa ario agakagantaigakeri. Maikari maika gatata agakagantaigiri ganiri ikisakoiganakari maganiro patoventaiganakaririra.

Isagutantunkanira Jeso kasankaari

(*Mr. 14.3-9; Jn. 12.1-8*)

⁶Impogini iatanake Jeso Vetaniaku inkamosoterira Sumo ikantaganirira Vesegavetankicharira. ⁷Antari inakera ivankoku opokashitakeri tsinane amakotapaake kasankaari punatasantacharira. Ogari opiaatantakarira oni ovensikantunkani aravasetero, shatekaamatakatyo kara. Ipitaigakera Jeso isekatavageigakara irorori aiñonitapaakari otintsanorenkakat-akero osagutantakarira igitoku. ⁸Yogari irogamereegi iro-ro ineaigavakerora ogatyo ikenai-gake ikisaiganaka iniavakagaiganakara ikantaigi:

—¿Antari gara aparaatagantiri?

⁹iMatsi tera ogote opunavagetaratyo tovai kara! Ariometyo ompimantakenkanime agantakenkanira koriki impaigakananira kogakovageigacharira.

¹⁰Kantankicha Jeso iroroty ikemaigavakerira ikantaigutarityo:

—Atsi arionenityo, gara pikisaigi-ro, pairotari okametitake okañotakenara maika osagutakenara. ¹¹Yogari kogakovageigacharira kantakatari pintentaigaemparira, kantankicha narori gatanika pikantakani pitentaigana.

¹²Ogari oga tsinane ontitari osaguvita-

kena kasankaari inkitaitaenara impogini nonkamakera. ¹³Maika nonkamantasa-noigakempi tyarika kara inkenkitsatokat-akenkani Tasorintsi tyara ikanta yogavisaakotantira ario onkañotagakenkani oga tsinane onkenkitsatokat-akenkani tyara okantakena osagutakenara kameti osuretakotaenkaniniri irorori.

**Jorashi ikogakera
iragakagantakerira Jeso**
(*Mr. 14.10-11; Ir. 22.3-6*)

¹⁴Impo yogari irogamere Jeso paitacharira Jorashi Ishikariote iatake ikamosoigutirira itinkamiegi saseroro-teegi ¹⁵ikantaigapaakeri:

—¿Aka tovaini koriki pimpunaigakena nagakagantaigakempirira Jeso?

Iriroegi ipaigakeri koriki 30 imenta.

¹⁶Impo iatai ovashi isuretanaka tyarikatyo inkantakeri iragakagantakerira.

Jeso isekatagaiganaarira irogamereegi
(*Mr. 14.12-21; Ir. 22.7-18; Jn. 13.21-30*)

¹⁷Impo aganakara vieseta ogantaganirira pan terira onkonogempa opoegantarira yogari irogamereegi Jeso yaiñonii-ganakari ikantaigiri:

—¿Tyara kara pikogake novetsikaigakerora magatiro kameti asekatagakempara paita?

¹⁸Irorori ikantaigiri:

—Piaige Jerosarenku ivankoku pashini matsigenka pinkantaigapaakeri: ‘Yogari Gotagantatsirira ikanti: Ataketari omonkaratapaaka nopokashitakerira, irorotari nokogantakarira nosekatagavageiganakemparira nogamereegi pivankoku nosuretakoigaemparora Pasekoa.’

¹⁹Ovashi iaigake yovetsikaigakerora magatiro itsatagageigakerora ikantaigavakeririra Jeso.

²⁰Impo ochapinienkatanakera yogari Jeso itentaigakari irogamereegi ipitaiga-

kera mesaku ²¹isekatavageigakara. Impo ikantaigiri:

—Maika nonkamantasanoigakempi, paniro viroegi pagakagantakena paita.

²²Yogari irogamereegi ogatyo ikenaiigake ikenkisuraiganaka ikantai-ganakera paniropage:

—Notinkami, ¿naro gagagantakempine?

²³Ikanti Jeso:

—Inti gagagantakenane tsiantakotakenarira maika peratoku. ²⁴Ontitari ontsataganakempara okantakerira Itsirinkakagantakerira Tasorintsi iniakotakerira Kañotasanotakaririra Matsigenka, kantankicha imaikaniroro iratsipereavagetake yoga gagagantakerinerira! Gamerakari itimi okyara.

²⁵Iniamatanaketyo Jorashi gagagantakerineririra ikanti:

—Gotagantatsirira, ¿naro gagagantakempine?

Ikantiri irirori:

—Viotari kantankitsi.

Jeso ikotagakerora pan ipaigakerira irogamereegi

(Mr. 14.22-25; Ir. 22.19-23; 1 Kor. 11.23-26)

²⁶Impo panikyara iragataiganae isekataigakara inoshikakero Jeso pan yapagotakero iniakeri Tasorintsi ikanti: “Apa, noshineventakempi pipakenarora oka pan.” Impo ikotagakero ipaigakerira irogamereegi ikantaigiri:

—Okari oka pan kañomatata ontinirikatyo novatsa. Nero gaigemparo.

²⁷Impo osamanitanakera irorokya inoshikakotake vino, iniari aikiro Tasorintsi ikanti: “Apa, noshineventakempi pipakenarora oka vino.” Impo ipakoigakeri irogamereegi ikantaigiri:

—Okari oka vino kañomatata ontinirikatyo noriraa. Nero viikaigemparo.

²⁸Antari nonkamaventaigakerira

maganiro ovoatanake noriraa.^k Irorotari maika irogavisaakotantaigakenkanirira maganiro kematsaigakenanerira ganiri ikenkiimatairo Tasorintsi ikañovageigara. ²⁹Maika nonkamantasanoigakempi gara noviikumataaro vino. Antari impogini irapatoitaigakerira Apa maganiro kematsaigiririra impegakempara Igoveenkariegite, ario pinkante nontentaigakempi aviikaigakemparora vino okyaakyarira.

Jeso ikamantakerira Perero interatakotakerira

(Mr. 14.26-31; Ir. 22.31-34; Jn. 13.36-38)

³⁰Impo yagataiganakera imatikaventaigakerira Tasorintsi ikonteiganake itonkoaganakera iaigakera Orivoshiku.

³¹Impo ikantaigiri Jeso:

—Maika maganiro viroegi pintsarogaiganake paita pokaiganakena piaigakera parikoti. Ariotari okantakeri Itsirinkakagantakerira Tasorintsi okanti: ‘Impogini nogakeri sentiririra ovisha. Yogari ovisha ogatyo inkenaiigake irishigavioveiganake.’

³²Kantankicha impogini nanianaera naketyo ivaiganakempine noatakera Garireaku.

³³Inianake Perero ikantiri:

—Intsarogaigavetanakempatyo maganiro iokaigavetanakempityo, kantankicha narori garatyo nokumatimpi.

³⁴Kantankicha Jeso ikantiri:

—Nonkamantasanoigakempi, paita tekyara irinie atava pinteratakotakena mavati.

³⁵Iniitanaatyo Perero ikanti:

—Intagarora intentagantaitenara irogaitakenara irogaitenatatyo, kantankicha garatyo noteratakotumatimpi.

Ario ikañoigakero maganiro ikantai-gakera.

Jeso iniakerira Tasorintsi Jetsemaniku*(Mr. 14.32-42; Ir. 22.39-46)*

³⁶Impogini iaigake Jetsemaniku. Iroro yogonkeigapaakara yogari Jeso ikantagiri irogamereegi:

—Pitaigeta aka, narori noateta anta noniakerira Apa.

³⁷Intagani itentaiganaka Perero intiegiri itomegi Severeo. Irirori ikenkisureavaganakatyo kara yovankinavaganaka.

³⁸Osamanitanakera ikantaigiri:

—Nokenkisureavaganakatyo kara panikya agavaganakena. Pitaigeta viroegi aka pintentaigakenara pinkireaventaigakenara.

³⁹Irirori iatake antakona anta yompatakasetapaaka inianakerira Iriri ikanti: “Amaa, nokogavetaka pogavisaakotae-nara ganiri natsipereavageti, kantankicha impatyora viro.”

⁴⁰Impo yagatanakera iniakerira iatai inkaaraku inaigakera irogamereegi ineaigapaakeri magasevageigake.

Ikantapaakeri Perero:

—¿Matsi tera pagaveaigumate samanikonara pinkireaigake? ⁴¹Kireaige gara pimagaigi. Niaventaigempa ganiri pikañovageiga. Viroegi pikogaigavetakaniroro pinkematsatanoigakerira Tasorintsi, kantankicha tera pishintsishiigero posante terira onkamentite.

⁴²Osamanitanaira ipiganaa aikiro iniairi Iriri ikantiri: “Amaa, gatanika pikantatigironika ganiri natsipereavageti, arioty onkañotakempa maika onsatagakempa pikogakerira viro.”

⁴³Impo ipigavetaa ineaigapairi magasevageigaityo aikiro, avisaiganakeritari ivochokine tera ineaikoigavakempa imagantaiganaarira. ⁴⁴Iokaiganairi ipigutanaara aikiro iniairira Iriri, okiiri ikantairi inkaaratirira ikantakeririra.

⁴⁵Impo yagatanakera iniairira ipiganaa inaigakera irogamereegi ikantaigapaakeri:

—¿Oгаа, magaiganatsivi pishigopireaganachavi? Gapaaka iragakaganta-kenkanira Kañotasanotakaririra Matsigenka irogaigakerira kañovageigacharira. ⁴⁶Maikari maika tinajaiganake, tsame, mataka pokapaake gakagantakenanerira.

Yaganunkanira Jeso*(Mr. 14.43-50; Ir. 22.47-53; Jn. 18.2-11)*

⁴⁷Tekyara iragate Jeso iniavagetakera ipokapaake Jorashi itentaigapaakeri tovaini matsigenkaegi yamashiigapaakeri savuri ontiri inchakii. Intiegi tigankaigakeri itinkamiegi saserroteegi intiegiri itinkamiegi jorioegi. ⁴⁸Yogari Jorashi gakagantakerineririra Jeso yogotagaigakeri okyara ikantaigiri: “Agonkeigapaakemparika pineaige tyanirika noatashitake nasaraanatapaakemparira, irerotari pikogaigakerira, pagaiganakerira.”

⁴⁹Impo iroro yogonketapaakara inakera irirori ikantapaakeri:

—iGotagantatsirira!, ¿aiñovi?

Impo yasaraanatakari. ⁵⁰Yogari Jeso ikantiri:

—Jeeje, aiñona. Maika aityotari pipokashitakerira atsi nani kañotero.

Impo yogari tentaigakaririra Jorashi yaifiñoniigapaakeri Jeso inoshikaigapaakeri yairikaigakerira. ⁵¹Kantankicha aiño paniro itentakirira Jeso inoshikamatanaketyo isavurite iserogempitatutarityo ironampiria itinkamisanorira saserroteegi.

⁵²Kantankicha Jeso ikantaigiri:

—Atsi arionenityo, piataero pisavurite. Tyanirika ventoririra isavurite ontityo irogantakenkani savuri. ⁵³¿Matsi tera pogote narora kogankitsine nonkantakerityo Apa intigankakera isaankariite intovaigavagetaketyo kara impugamentaiganakenara? ⁵⁴Kantankicha ariomera nonkañotagakerome maika, ¿ario tyara onkantakempara ontsataganakempara Itsirinkagakantake-

rira irirori pairani okamantakotakenara nantsipereavagetakera?

⁵⁵Impo ishonkashiigari ikantaigiri itentaigakarira Jorashi:

—¿Matsi naro koshinti nerotyto pamashiigakenara savuri ontiri inchakii pagaiganakenara? Omirinkatari kutagiteri notentaigakempi viroegi anta ivankoku Tasorintsi notagantavagetakera tera ario pagaigena, ⁵⁶kantankicha okañotantakarira maika onti ontsatagetanakerora ikamantakoigakenara pairani kamantantaigatsirira itsirinkakoigakenara okyara.

Impo ishigavioigamatanakatyo maganiro irogamereegi iokaiganakeri Jeso paniro.

Yamanunkanira Jeso yapatoitaigakara itinkamipage jorioegi

(*Mr. 14.53-65; Ir. 22.54-55, 63-71;*

Jn. 18.12-14, 19-24)

⁵⁷Yogaegiri gaigakeririra Jeso yamaiganakeri ivankoku Kaipashi. Irirori inti itinkamisanorira saseroroteegi. Ario inaigake kara gotagantaigirorira itsirinkakotanakerira Moisheshi intiegiri aikiro itinkamiegi jorioegi yapatoitaigakara.

⁵⁸Impo yogari Perero intaina inapaake yogiatapaakerira Jeso. Antari yagapaakerora pampatuiku ineaigapaakeri soraroegi pirinitaigake kara. Irivoegi intiegi sentaigirorira ivanko Tasorintsi. Ovashi ipirinitapaake irirori kameti ineaotakeriniri Jeso tyarikara inkantakenkani.

⁵⁹Yogari itinkamiegi saseroroteegi itentaigakari itinkamiegi jorioegi ikaemakagantaigakeri pashini tsoventaigakamparineririra kameti ontimakeniri onkenantakemparira irogakagantagakerira. ⁶⁰Ipokaigavetapaakatyo tovaini tsoventaigakaririra, kantankicha irorokya ikantaigi irorokya ikantaigi, nerotyto tyampa inkantaigakeri. Impo ipokaigamatapaakatyo piteni kantaigankitsirira ⁶¹ikantaigi:

—Naroegi nokemaigakeri ikantakera: ‘Naro nagaveake nogimamerinkakerora ivanko Tasorintsi impo novetsikaero, omavatakotanakempa kutagiteri nagataero.’

⁶²Impo ikavirimatanakatyo Kaipashi ikantiri Jeso:

—¿Tera tyara pinkantumate?, pikemaigakeritari ikantanaigakempira. Maika ¿tyara pinkantera viro?

⁶³Kantankicha irirori ikemisantanaketyo, teratyto tyara inkantumate. Osamanitanakera imatutaarityo aikiro ikantiri:

—Maika nonkantakempi kañomataka irironirika kantakempi Tasorintsi ikantakanirira itimi, atsi kamantena ¿arisanotyto vinti Ikogakagakerira Tasorintsi impegakempara Nogoveenka-riegite? ¿Viro Itomi Tasorintsi?

⁶⁴Iniamatanaketyo Jeso ikantiri:

—Jeeje, naroniroro katinka pogakero, kantankicha maika nonkantaigakempi impogini pineaigakeri Kañotasanotakaririra Matsigenka impirinitakera inampinaku irakosanoriraku Tasorintsi Gaveavagetatsirira. Aikiro pineaigavakeri iripokaera inkenantapaemparora menkori.

⁶⁵Ogatyto ikenake ikisamatanakatyo Kaipashi itisaraitarotyto imanchaki tseerererere ikanti:

—iYokari yoka onti ikañotagumanata-kari Tasorintsi! Irroventi maika intagati-tyo akaemakagantaigi pashini iripokaigakera inkamantaigakera ikañotakerora maika, matakaniro pikemaigakeri tsikyata viroegi ikantakera. ⁶⁶Maika ¿tyara pinkantaige viroegi?

Irivoegi ikantaigi:

—Kantetyo inkamakera, tsikyatatari ikañotagantaka irirori.

⁶⁷Impo itoanaigakeri ivoroku, itaataaigakeri togn togn, aikiro pashinikya patosanaigakeri ivoroku ⁶⁸ikantaigakerira:

—Irorotari vintira Ikogakagakerira Tasorintsi impegakempara Igoveenka-

riegite jorioegi, iatsi gotenityo tyani taakempi!

Perero iteratakotakerira Jeso

(Mr. 14.66-72; Ir. 22.56-62;

Jn. 18.15-18, 25-27)

⁶⁹Yogari Perero aifiokya inake anta parikoti pampatuiku. Impo okenapaake nampiro nampiriansi okantiri:

—Viro aikiro pitentavagetari Jeso Garireakunirira.

⁷⁰Kantankicha yogari Perero ikemamampeganakatyo ikantiro:

—¿Jaa? ¿Tyara pikanti? Tera nonkeme tyarika pikanti.

Ikemaigakeri maganiro naigankitsirira kara. ⁷¹Impo iavetakara anta sotsimoroku oneitaarityo aikiro pashini nampiriansi okantaigiri naigankitsirira kara okanti:

—Yogari yoga inti itentavagetarira Jeso Nasarekunirira.

⁷²Kantankicha irirori ikantutaaroty aikiro ikanti:

—iTeraty noneimateri yoga piniakotakerira! Ineakenatari Tasorintsi tera ario nontsoegumatempa.

⁷³Choeni osamanitanakera yaiñoniiga-paakari naigankitsirira kara ikantaigiri:

—Arisanoniroro pitentavagetari nokemaigavaimpitari piniakera.

⁷⁴Yogari Perero ikantutaaty aikiro:

—iNokantakeniroro teraty noneimateri! Arisanoty nokantake, ineakenatari Tasorintsi tera ario nontsoegumatempa. Antari ontirika nontsoegaka inkisashitakenaty, tera noneimaterinika piniakoi-gakerira maika.

Iroroty ikantakera maika, iniamatana-ketyo atava ovashi ⁷⁵isurematanakaroty Perero ikantakeririra Jeso inkaara ikantiri: “Paita tekyara iriniimate atava pinteratakotakena mavati.” Ikaviritapannuta iataira ogatyo ikenake iragamatanakatyo jiii jiii jiii, ikaemavavagetaketyo kara.

Yamanunkanira Jeso Piratoku

(Mr. 15.1; Ir. 23.1-2; Jn. 18.28-32)

27 ¹Impogini okutagitetanakera maganiro itinkamiegi saseroro-teegi intiegiri itinkamiegi jorioegi ikemavakagaiganaka tyarika inkantaigakeri Jeso irogakagantaigakerira. ²Impo yagaiganakeri yogusoiganakeri yamaiganakerira Pirato. Irirori inti inampina Sesa.

Ikamakera Jorashi

³Impogini yogari Jorashi gakagantakeririra Jeso yogotake arisano irogakagantakenkani ovashi isurematanakatyo ikanti:

—iNarotakaniroro! Ario nokantavagetaka naro gamerakari nagakagantiri okyara.

Impo iatake inaigakera itinkamiegi saseroroteegi intiegiri itinkamiegi jorioegi irogipigaigaatenerimera yoga 30 korikimenta ipaigakeririra okyara iragagantakerira Jeso ⁴ikantaigavetapaakari:

—Narori onti novetsikake terira onkametite nagakagantakeritari terira tatakona irovetsikumate, maika irogakenkani.

Kantankicha iriroegi ikantaigavakeri:

—¿Ario tyara nonkantaige naroege?

Virompaty, virotari kañotankicha okyara.

⁵Neroty yovuokagisetapanutiri koriki kara tsoompogi ivankoku Tasorintsi iatakera ishitikakara.

⁶Impo yogari itinkamiegi saseroro-teegi yapatogiseigairi koriki ikantaigi:

—Tera kameti agaigaerira ankonogiseigaerira yamaigirira pashini ipaigirira Tasorintsi. Ontitari ipunavitunkani iragagantakerira irogakenkanirira.

⁷Impogini ikemavakagaigaka impunaventantaigakemparora kipatsi paitacharira Igipatsite Vetsikioririra Koviti kameti ontimakeniri inkitatantaigemparira poniaigankicharira parikotipage. ⁸Irorotari

otantanakarira oga kipatsi opaitanakara Iraatsigiteri ovashi maika. ⁹Okañotantakarira maika onti otsatagagetanakerora ikantakerira pairani kamantantsirira Jeremiashi ikanti: “Yogaegiri iseraereegi yagaigakeri yoga 30 korikimenta ivunaro pairorira ikametiti ¹⁰ipunaventantaigakarora kipatsi paitacharira Igipatsite Vetsikrorira Koviti, ariotari ikantakenari Notinkami.”

Pirato ikogakotagantakerira Jeso

(Mr. 15.2-5; Ir. 23.3-5; Jn. 18.33-38)

¹¹Impogini yogari Pirato ikogakotagantakeri Jeso ikantiri:

—¿Arisano viro Igoveenkariegite jorioegi?

Ikanti Jeso:

—Jeeje, arisano pikantasanotakeniroro, naroniroro.

¹²Antari itsoeventanaigakarira itinkamiegi saseroroteegi intiegiri itinkamiegi jorioegi tera tyara inkantumate Jeso onti ikemisantanake. ¹³Irorotari ikantantakaririra Pirato:

—¿Matsi tera pinkeme ikantanaiganakempira?

¹⁴Kantankicha yogari Jeso teratyo iriniimate. Iroro ineavakerira Pirato ikañotakerora maika, yogavagetanake-tyo kavako, tyampatyo inkantero.

Ikantunkanira Jeso irogakenkanira

(Mr. 15.6-20; Ir. 23.13-25; Jn. 18.38—19.16)

¹⁵Omirinkatyo agara iviesetaegite jorioegi okantaganirira Pasekoa yogari Pirato yopakui paniro yashitakovitunkanirira yovetsikakera terira onkametite, tyanirikara ikogaigakerira itovaireegi irapakuaigaerira. ¹⁶Ario inake kara paniro shitakotankicharira ipaita Varavashi, yapagitekovagetatyo kara ikemakotaganira. ¹⁷Impo Pirato ineaigakerira yapatoventaiganakarira maganiro ikantaigiri:

—¿Tyani pikogaigake nampakueraira? ¿Irirorika Varavashi intirika Jeso pikantagirira inti Ikogakagakerira Tasorintsi imegakempara Pigoveenkariegite?

¹⁸Irirori ineaketari onti ikisavitunkani ineinkanira intira yapatoventanunkani, irorotari yamantanunkanirira iriroku.

¹⁹Aiñokyara ipiriniti Pirato anta ikanomaantapinitira okantakagantakeri itsinanetsite okanti: “Gara pimavageta viro, tyampa ankantakeri yoga terira tatakona irovetsikumate. Nokisanigisevagetaketari inkaara posantegisematakatyo nogisanire. Irirorakari gimanatakena.”

²⁰Kantankicha yogari itinkamiegi saseroroteegi intiegiri itinkamiegi jorioegi yogotagaigakeri maganiro inkantaigakera: “Irirompatyo pampakuae Varavashi, yogari Jeso pinkentakotagantakerityo.”

²¹Yogari Pirato iniitaigaarityo aikiro ikantaigiri:

—¿Tyani pikogasanoigake nampakueraira? ¿Iriro Varavashi intirika Jeso? Ikaemaigamatanaketyo:

—iInti pampakuae Varavashi!

²²Ikantaigiri Pirato:

—Iroroventi, ¿tyaratyo nonkantakerira yoga Jeso pikantaigirira inti Ikogakagakerira Tasorintsi imegakempara Pigoveenkariegite?

Ikaemaigutanaatyo aikiro maganiro:

—iKentakoteri!

²³Ikantaigiri Pirato:

—¿Matsi tyara ikantakara? ¿Tatampatyora yovetsikakera?

Ikaemaigutanaatyo aikiro:

—iNokantaigaketari kentakoteri!

²⁴Impo yogari Pirato ineavakera atanatsi ikaemavaitaiganakera tyampa inkantaigavakeri, ovashi ikaemakagantake nia inkivakotakempara kameti ineaigakeriniri maganiro impo ikanti:

—Irogakenkanirika maika tera naro kañotachane. Virompaegityo, viroegitari kañoigankicha.

²⁵Maganirosanoty o ikaemaiganake:
—iAriompa naroeigityo kañoiganki-
chane intiegiri aikiro notomiegi,
naroeigitari gakagantaigakerine!

²⁶Iroto ikemaigakerira Pirato yapakua-
kagantairi Varavashi. Impo yomperaven-
takari Jeso impasatakenkanira iramana-
kenkanira inkentakotakenkanira.

²⁷Yogari soraroegi yamaiganakeri
tsoompogi impo ikaemakagantaigakeri
maganiro irapisoraroegitene yapatoven-
taiganakari isamatsanaigakerira. ²⁸Impo
isapokaigakeri imanchaki yogagutantai-
gakari pashini kamisa kiraamagori.

²⁹Yagaigake kivitsa yovetsikashiigakeri
iramatsaire yamatsaitakerira. Aikiro
yairikakagakeri inchakii irakosanori-
raku, impo itigeroaventaigakeri
isamatsanaigakerira ikantaigakerira:

—iOjojoo, neri yogaaa! iAtsi neaigeri-
kario Igoveenkariegite jorioegi!

³⁰Itoatoaigakerityo kara impo
yagapitsaigairi inchakii ipasatantaigakerira
igitoku tagn tagn. ³¹Impo yagataiganakera
isamatsanaigakerira isapokaigairi irorokya
yogagutantaigaari irashi imanchaki
yamaiganakeri inkentakoigakerira.

Ikentakotunkanira Jeso

(Mr. 15.21-32; Ir. 23.26-43; Jn. 19.17-27)

³²Antari iaiganakera inkentakoigake-
rira itonkivoigakeri paniro Surenekuni-
rira ipaita Sumo. Yogari soraroegi
ikantaigavakeri inatanakenerira Jeso
igoroshite. ³³Impo yogonkeigakara
Gorogotaku, (onkantakera: “Ontaikara
Itutai Kamatsirini”), ³⁴ipaigavetakari
vino okonoatunkani kepishiari, kantan-
kicha irirori yoviikavetaka maani ovashi
tera inkoge roviikasanotemparora.

³⁵Impo yagataigakera ikentakoigakerira
yogari soraroegi isokagaigakero mapuki-
cho ogotantaganirira kameti irogotantai-
gakemparora tyanirika shintakemparone
imanchaki. ³⁶Impo ovashi ipitaigake kara

ikamaguigakerira. ³⁷Antari enoku
oatakara igitoku ogunkani inchakota
otsirinkunkani okanti: “Yokari yoka inti
Jeso, Igoveenkariegite jorioegi.”

³⁸Aikiro itentagantunkani piteni
koshinti ikentakotunkanira, paniro
yogaratinakatunkani irakosanoriraku,
yogari irapitene onti yogaratinkatun-
kani irampateku. ³⁹Yogari visapiniigan-
kitsirira kara ineiaigakerira iokookonai-
gakerityo ⁴⁰ikantaigakerira:

—iEejee tyanirityo maika! Kogapage
pikantira: ‘Nogimamerinkakero ivanko
Tasorintsi impo novetsikaero, omavata-
kotanakempa kutagiteri nagataero.’
Maikari atsi pugamentanakempanityo.
Irorotari vintira Itomi Tasorintsi
kentakoreanaempanityo paguitanaera.

⁴¹Ario ikañoigaka itinkamiegi saseroro-
teegi itentaigakerira gotagantaigirorira
itsirinkakotanakakerira Moisheshi intiegiri
itinkamiegi jorioegi isamatsanaigakerityo
iniavakagaiganakera ikantaigakera:

⁴²—Kogapage ikantunkani yagaveava-
getityo ikavintsasantavagetakera
yogavisaakotakerira pashini matsigenka,
tyara okantakara maika tera iragavee
impugamentanakempara ikiiro iraguita-
naera. Antari irirora Agoveenkariegite
inkentakoreanaempametyo iraguita-
naera koroshiku kameti ankematsaigake-
riniri. ⁴³Irorotari ikematsavintsatakerira
Tasorintsi kantetyo impugamentaerira
maika arisanorikara itakari, irorotari
ikantira: ‘Nanti Itomi Tasorintsi.’

⁴⁴Imaiganakatyo aikiro itentagantun-
kanirira ikentakotunkanira ikantanaiga-
kerityo kara.

Ikamanakera Jeso

(Mr. 15.33-41; Ir. 23.44-49; Jn. 19.28-30)

⁴⁵Impo ikatinkatanakera poreatsiri
oga okenake apavatsaasetanaka
magatiro ovashi itsunkavagetanake.
⁴⁶Ogatyo ikenake ikaemamatanaketyo

Jeso ikanti: “Eri, Eri, ñirema savakatani?” (onkantakera: “Apa Tasorintsi, Apa Tasorintsi, ÷tyara okantakara povashigantakenara?”)

⁴⁷Ikonogagarantaigaka naigankitsirira kara iroro ikemaigavakerira ikantaiganake:

—Atsi kemeri kanika ikaemakotakerira kamantantatsirira Eriashi.

⁴⁸Ishigamatanakatyo paniro yaganakera chomiatirorira nia iokaatakerora kachoariku vino yogaenokakovetakenerira savorokiiku irachomiatagakerimera.

⁴⁹Kantankicha yogari itovaireegi ikantaigiri:

—Atsi pampogieri, aneaigakerira iripokashitakeririka Eriashi iroguitaerira.

⁵⁰Impo yogari Jeso ikaemapanaati aikiro imaraenkarikatyo kara ovashi ikemisantanake ikamanakera.

⁵¹Irorotyo ikamanakera ogaty okenake osaraamatanaketyo kamisa tsatamagotacharira ivankoku Tasorintsi¹ okantanakera katinkasano niganki tseerererere oponianakara enoku oatakerora savi pairatamatake kotarenkasannotake.

Ontininkamatanakatyo tinin tinin tinin otsiraagematanaketyo imperitapage,

⁵²oga okenagetake ashirenakigetana kikitantagetaganirira igamagapage, yaniagematanaityo tovaini kematsaigiririra Tasorintsi. ⁵³Impogini yanianaira Jeso iaigake iriroegi Jerosarenku ineaigavairi tovaini timaigatsirira kara.

⁵⁴Yogari itinkamiegi soraroegi intiegiri itentashiigakarira ipampogiaigakerira Jeso ineaigavakera ontininkanakara, aikiro pashinipage oposantetanakara itsarogavageiganaketyo kara ikantaigi:

—iArisanoniroro inti Itomi Tasorintsi!

⁵⁵Ario onaigake kara tovaini tsinaneeigi gaigakeririra Jeso iponianakara Garireaku, aikiro omutakovageigakeri. Iroroegi onti aratintiitaigake antakona

anta opampogiaigakerira. ⁵⁶Ario onaigake aikiro kara Maria Magarena ontiri Maria iriniro Santiago intiri Jose, ontiri aikiro iriniro itomiegi Severeo.

Yogaataganira Jeso imperitanakiku
(Mr. 15.42-47; Jr. 23.50-56; Jn. 19.38-42)

⁵⁷Impogini panikyara onchapinitanae ipokake paniro shintavagetacharira ipaita Jose. Irirori onti iponiaka Arimateaku.

Ario ikañotaka aikiro inti irogamere Jeso.

⁵⁸Irirori iatashitakeri Pirato ikantakerira ikogakera iramanaerira Jeso inkitataerira. Yogari Pirato ikantakeri:

—Iroroventi nanityo.

Impo ikantaigakeri soraroegi:

—Kametitake pimpakerira iramanaerira.

⁵⁹Ovashi yaganairi iponatanankarira mechomagori kamisa okyamagokyarira ovetsikantunkanirira irino. ⁶⁰Impo yamanairi yogaatirira imperitanakiku okyaenkarira ikigakagantake irogantaenkanimera irirori inkamanaera. Impogini itikakotantanakari omarane mapu iatai.

⁶¹Ario onaigake kara Maria Magarena ontiri apitene Maria opirinaitagakera kara katinka yogaaganira.

Soraroegi sentaigavetakarorira
yogantavetunkanirira Jeso

⁶²Impo okutagitetanakera apishigopireantaganirira yogari itinkamiegi saseroroteegi intiegiri pariseoegi iaigake inkamo-soiguterira Pirato ⁶³ikantaigapaakeri:

—Naroegi nosureiganakaro ikantakerira yoga tsoenti tekyara inkame

ikantakera: ‘Nonkamakerika impo omavatanakempara kutagiteri naniana.’

⁶⁴Maika kamani iroro iromavatakotantanakempa, irorotari nonkantantaigakempirira atsi tigankenityo soraroegi irisentasa-noigakerora yogantunkanirira ganiri ipokashiigiri irogamereegi iragaigapanu-

terira impo inkantaigakeri maganirō atake yanianai. Intagarora inkañoigerora maika pairorokari avisavagetakero iramatagaigakempara avisakerorokari yamatagaikoigakarira tekyara inkame.

⁶⁵Yogari Pirato ikantaigiri:

—Iroroventi nanityo, neri yogaegi soraroegi. Piaigetyo pisentaigakiterira, virompaegityo tyarika pinkantaigakeri.

⁶⁶Iriroegi iaigake yogunkanira Jeso yavitsajaigapaakerora mapu itikakotan-tunkanirira impo ikantaiganakeri soraroegi irisentasanoigakerora ganiri tyani pokashitumatiri.

Yanianaira Jeso

(Mr. 16.1-8; Ir. 24.1-12; Jn. 20.1-10)

28 ¹Impo iroo okutagitetamana-
kera tominko, ogari Maria
Magarena ontiri apitene Maria oaigama-
nake onkamosoigaaterira yogaaganira,
ataketari avisanake kutagiteri apishigo-
pireantaganirira. ²Antari tekyara
ogonkeigempa ontininkanaka kipatsi
tinin, tinin, tinin, ipokapaaketari
isaankariite Tasorintsi iponiapaaka
enoku itiguronkapaakerora mapu
tikakovetakaririra Jeso ipirinitantaka-
rora. ³Ikovoreavagetiratyo kara
kañomataka kareti okantira tsaarere
tsaarere. Ogari igitsagare onkutavagete-
ratyo kañomatakatyō okutatira mampe.
⁴Yogaegiri soraroegi iroo ineaigavake-
rira ogatyō ikenaiigake itsarogavageiga-
naketyō kara ishigekavageiganakera
shige shige shige ituaigamatanaketyō
ikamaigakitityō. ⁵Impo iroo ogonkeiga-
vetapaakara tsinaneegei yogari isaanka-
riite Tasorintsi ikantaigiro:

—Gara pitsarogaigi. Naro nogotake
inti pikogaigake Jeso ikentakovetunka-
nirira. ⁶Kantankicha akari aka mameri,
ataketari yoganiaagani, ariotari
ikantakeri irirori tekyara inkame. Atsi
tainaegi pineaigakerora yoginoriavetun-

kanira, ⁷impo piaigepage pintsatimaiga-
nakera pinkamantaigapaakerira
irogamereegi pinkante: ‘Atake yanianai.
Maika iketyo ivatanankitsine iriatakera
Garireaku. Antari anta ario pineaigapaa-
keri.’ Irorotari nopokashitake
nonkamantaigakempira.

⁸Iroo okemaigavakera otsarogavagei-
ganake, kantankicha oshinevageiganaka
aikiro. Akyatyō otsatimavageiganake
tsikyari onkamantaigapaakeri irogame-
reegi. ⁹Impo itonkivoaigavakero Jeso
avotsiku iniaigavakero. Iroroegi aiñonii-
ganakari otigeroaventaiganakarira
avinaigakerira itasagiiku. ¹⁰Irirori
ikantaigiro:

—Gara pitsarogaigi. Piaige pinkaman-
taigakerira nogamereegi iriaigakera
Garireaku. Antari anta ario ineaigapaa-
kena.

Ikamantaigunkanira jorioegi

¹¹Iroo oaiganakera ikonogagarantai-
gaka soraroegi sentaigavetakaririra Jeso
ario ikañoigaka iriroegi iaigake
Jerosarenku ikamantaigakerira
itinkamiegi saseroroteegi magatiro
ineageigakerira. ¹²Iriroegi iniavakagai-
gaka itentaigakarira itinkamiegi
jorioegi. Iroo ikemavakagaigakara
ipaigakeri tovaini koriki ¹³ikantaigava-
keri:

—Viroegi onti pinkantaigake: ‘Antari
apavatsaanakara naroegei nomagaseva-
geigake impo ipokashitaninkaigakeri
irogamereegi yagaigapanutiri.’ ¹⁴Antari
intagarora inkemera Pirato nonkaman-
tagaigakeri nogishineigaerira ganiri
tyara ikantumaigimpi.

¹⁵Yogari soraroegi yagaiganakerira
koriki iaigake itsatagageigakerora
ikantaigakeririra. Ario ikañoigakero
maganirō jorioegi kantanakaniroro
ovashi maika ikantaigira tera iranianae
Jeso, onti yagaigapanutiri irogamereegi.

**Jeso ikantaiganairira irogamereegi
inkamantakoigakerira**

(Mr. 16.14-18; Ir. 24.36-49; Jn. 20.19-23)

¹⁶Impogini maganiro irogamereegi iaigake Garireaku iatantaigaka otishi ikantaigakeririra Jeso tekyara inkame.
¹⁷Irooro ineaigapaakerira ikantaigi: “iInti Atinkami!” Ovashi itigeroaventaigakari, kantankicha ikonogagarantaigaka iniasurentavageigaka ikantaigake: “Terorokari iriro.”

¹⁸Kantankicha Jeso yaiñoniiganakari ikantaigiri:

—Yogari Tasorintsi ikantakena:
‘Maika viro vinti gaveagetakerone

enokupagekutirira ontiri kipatsipagekutirira.’ ¹⁹Irorotari maika nonkantantagakempirira piaige pampagiteavageiganakemparora kipatsi pinkenkitsatimoi-gakerira maganiro matsigenkaegi pinkematsatagaigakerira kameti impegaigakempaniri nogamereegi. Impo pogiviaigakerira kameti iokotagantaigakempaniri arisano ikematsaigakeri Apa Tasorintsi intiri Itomi intiri aikiro Isure.
²⁰Pogotagaigakerira inkematsaigakenara intsatagaigakerora magatiro nokantaigakempirira. Narori nonkantakani nontentaigakempi omirinka kutagiteri ovashi ontsonkatanaempara kipatsi.